

DXUS YUWE SAN LUKAS FXI'JNI

Teofxilo's neewe'wena fxi'jni

1-4 Adx namiku Teófxilo, idxa's khiyu'jna fxi'jaçthu kwe'sx ensu na'wē yuuk txā'sna. Txā'sa' txā'wē yūuya' takheçíyna, Kristo yakh u'jusawe'sxa' ma'wēçxahne'ta ew uy txā'wēytxi txāawe'sxa' kwe'sxtxi pta'sx, aç'a' txā'sa' maawa txā'wēyta ew pta'sxna fxi'jçxa nvxiit wēe. Txāa pa'ga adxwa ma'wēçxahne' yūu txā'sa' wala ew jxpa'yakx paapējxçxa idxna pta'sxna fxi'jaçthu, kxah isa yuh pta'sxi'ne'ta sūjūne'ga.

Juan Bautista upxwa'ja's pta'sxni

5 Judea kiwete ne'jwe'sx Herodes ensu', teeçx sacerdote Zakarias yaasesak u'pu'. Txāa yu', sacerdote ne'jwe'sx Abias ji'kh yu'. Aç'a' txajx nyu Elisabet yu', Aarón ji'kh yu'.

6 Ptamí Dxus jxkaahnitxi' nwēesē'jsatx yu', txāa pa'ga Dxus dxi'pte ew fxi'zesatx yu'.

7 Nawa txāawe'sxa' luuçx ji'phmeetx yu', Elisabeta' luuçx ji'phuwa'jsameene' yu' naa pa'ga. Khīçxawa wala thē'khwe yā'j yu'tx.

8 Zakarias yakh ūssawe'sxtxi dxuus yatte selpiwa'j en āhte', na'wēk yuu:

9 Dxuus yat altalte wēt putasá incienso's kabxa' u'kawa'jsa kimtewa jiyuya', sacerdotewe'sxa' swerte na'wēsa kutxi'jtx. Aç'a' kxteea' Zakariasku kaseh.

¹⁰ Txajũ' Zakariasa' Dxus altalte wēt putasa's kabuçte', nasa pa'jsa' jxukaysa ekajuçxáatx Dxus yakh puutx we'wena ũsu'.

¹¹ Naapkaçxha' Zakariasa's vxyaak Dxus jxkaahni teeçx angel altal pukate paçu ju'gte.

¹² Aça' Zakariasa' txã's uyçxa', kuh yajxna wala ũukhku.

¹³ Nawa txãa angel yu' na'jik:

—Zakarias, ũukhnu. Iidx pxthaa we'weni's Dxus pasçxa kxtey yuuça', aça' iidx nyu Elisabetha' luuçx ji'phuna. Txãa luuçxa's Juan yasene'ga.

¹⁴ Txã'wē yuute', idxa' wala weçxana neeyũune'ga, aça' maawa txã'wēçxaçxáa weçxaatxna txajx upxni's jiyuçxa',

¹⁵ txãa pa'gatey txãa luuçxa' Dxus dxi'pte walasa yuuwa'jsa'. Txãasa kīhwa ktũ'ju'jwa'jsa yu'sa' tudxmeena, naasáa Dxus Espiritu yuuçxáana ũuste jxuka ji'phuna njī'j tutxhu yuu kasehmey.

¹⁶ Sa' Israel kiwesuwe'sxtxi maazkuēesatxwa taki'sa Dxus tasxtey ki' kuutxa'jana.

¹⁷ Txãa Juana' Dxus Nçxi'k yaçte pekũjuna, sa' Dxus yuwe pta'sxsa Elias Espiritu kīhtewa ājawa'jsa's ji'phu'k txã'sna íçxáa ji'phuna. Txãasa neywe'sxtxi luuçx yakh kaapui'jmée kaafxī'ze'jena, sa' nwēesē'jsameetxwa nwēesē'jya' kaapiya'jana. Txã'wē yũuna nasatx pheu'juna Dxus Nçxi'ka's jxpa'gakahn jīte',

¹⁸ Zakariasa' na'jīnak pējx:

—Kwe'sxa' ptamī wala thē'jyā'tha'w, aça' çma'wē yuuçxa iidx txã'jīni' kxtey yuune'thewa ew jii neeyũuki'th? jīk.

19 Aça' Dxus angela' pta'sxku:

—Adxa' Dxusna selpiina fxi'zesa Gabrielthu. Txãa pa'gak adxa's jxkaah, idxa's naa yuwe ewsa's pta'sxkahn.

20 Nawa adx pta'sxni's txã'wẽ dxih yuuna sũhmeeg naa pa'ga ãçxhíi we'weya' ewumée neeyũune'ga iidx nçxi'k upxpkaçx jík.

21 Dxuus yat dxiite txã'wẽ jxthëeyũute', ekaju nasa yu' Zakariasas' ũythasnatx ũsu', ¿kĩh yuuçxaki'k txakwe jxthëeyũu? sũhna.

22 Txajũ' Zakariasas' kasehçxa', we'weya' ãjãmeeçxa', kuseju vxijxaçxaçxáak khiyu'ju'. Aça' txã'wẽ yũute', dxuus yat dxiite kĩa' uyyuhne' sũjũ'tx nasa yu'. Sa' Zakariasas' txã'wëesa neeyũuk.

23 Dxuus yatte selpiina jxã'jçxa', Zakariasas' txajx yatna u'kh.

24 Txãa ensu' Zakarias nyu Elisabetha' nasa ji'ph neeyũuçxa', txajx yatu kasehmeeek u'pu' tahç a'tepkaçx, naa sũhna:

25 ãçxha' ũ'kwe Dxusa' na'wëk yũu, aça' nasa' ũ'kwe's peena yu' açewe'wemeetxna sũhna.

Jesus upxwa'ja's pta'sxni

26 Elisabetha' nasa ji'ph neeyũuni seis a'teju', Dxusa' angel Gabriela's Galileasu teeçx çxhab Nasaret yaasesatek kaah,

27 teeçx kna'sa Maria yaasesa yatte pa'jçxa' yuwe pta'sxkahn. Txãa kna'sa yu', teeçx piçthë'j Jose yaasesa yakh iimi'ya' puutx we'weçxak u'p yu'. Txãa Jose' jxkaahsa Davxid ji'kh yu'.

28 Aça' Dxus angela' Maria u'pnite pa'jçxa' na'jík:

—Dxusa' ijçxa yakh ũsa', naa pa'ga Dxus bedi-
ciona's maa maa u'ytewa jxthaakwe jxpa'gaçxa
u'pi'çxa. Txãasa weçxana me'pçxi ewçxáa jíte',

²⁹ Maria' Dxus angel we'weni's wēsē'jçxa
thegçxa', kujk yajkx ¿ma'wēteki'k txã'jĩ'?
sũhna.

³⁰ Aça' Dxus angela' na'jĩk:

—Maria, ũukhnuçx, Dxus peeygãanisa i'çxa.

³¹ Txãa pa'ga açxhíi teeçx luuçx pihç ji'ph
neeyũuçxa txã'sa' Jesus yasene'çxka.

³² Txãa luuçxa' jxtuhthe walasa yuuwa'jsa'.
Txãasa cielute Dxus Nçxi'k ya'kxsusuna. Aça'
txã'sa' Dxusa' jxkaahwa'jsa vxituna, yaçgathē'j
Davxid na'wēysa.

³³ Kxah Israelwe'sxtxi kiiwey jxkaajana, nawa
txajx jxkaahni' bagaçxte yuhwa pçumeena jĩk.

³⁴ Txajũ' Maria' txãa angela's pējxku:

—¿Ma'wē txã'wē yuja' yũukx? Ũ'kwe' kna'sa
nmi' ji'phmeeth açyuja' jíte',

³⁵ angela' na'wēk pta'sx:

—Dxus Espiritu' içxa kakwe's txãaçxaçxáa
jxuka iiyamuna. Txã'wē yuuniteçxáa nasa
vxyaana. Txãa pa'ga luuçx upxsa' Dxus jĩi yuuna,
sa' Dxus Nçxi'k ya'kxsusuna.

³⁶ Txã'wēy içxa pukakhē nyakh Elisabethwa
luuçx pihç ji'phuya'wa', thē'khuē yã'jçxawa.
Bagaçx yuhwa nasa ji'phusameeçxawa, açxha'
seis a'te yã'j yuuça' nasa ji'phuni.

³⁷ Dxus yakha' kĩh yuhwa thēysa yu' meea' jĩna
pta'sxte',

³⁸ Maria pasçxa':

—Txã'wě', ũ'kwe' Dxusna selpisáa ne'tka, açá' ũ'kwe's Dxusa' kxtey yuuna na'wěg pta'sx txã'sa' jĭk.

Txajũ' Dxus angela' Maria tasxu txuteena u'kh.

Elisabet tasxna Maria u'jni

³⁹ Txãa ensuy Maria' jxthěeyũumée u'kh Judea thã'jsu teeçx çxhab ũsu'k kxtee pa'jya'.

⁴⁰ Sa' Zakarias yatte pa'jçxa', Maria' Elisabetha's weçxak.

⁴¹ Maria weçxana we'weni's wěsě'jeçpkaçxa', Elisabet nasa tutxhtewe'sxa' ěsěk. Naapkaçxa' Dxus Espiritu' Elisabet ũuste jxuka kaajiyu'kh.

⁴² Açá' Elisabetha' Maria's na'jĭnak sus we'we: —Dxusa' ijçxa's maa maa u'ytewa jxthaakwek bedekĭy, sa' txã'wěyku içxa nçxi'ka'swa bedekĭy.

⁴³ Açá' ũ'kwe' ĵkĭhte seelpitka açga ũ'kwe's Nwe'wesa njĭ'ja' thegya' pa'já'?

⁴⁴ Içxa weçxana we'weni's wěsě'jeçpkaçxa', ũ'kwe luuçx tutxhtewe'sxa' ěsěk weçxana.

⁴⁵ Dxus we'weni' kxtey yuuna sũhpa'ga, kxtey yuuya'wa' açá' weçxana mfxi'zeçx jĭk.

⁴⁶ Açá' Maria we'weçxa': ũ'kwe' ũusuh jxukath Dxusa's weçxá'.

⁴⁷ Sa' ũ'kwe Dxus nwe'wesa's ũuste peçxkanameeth weçxana fxi'ze'.

⁴⁸ Txã'wě makwe pxthaa ähmeekuětewa, Dxusa' peeygãhçxa txã'sna selpiwa'jsa vxitku.

Açá' äçxhũyã'ja' ũ'kwe's Dxus txhitxhnisak yu' jĭna nes yuutxna maa nasawa jxuka.

⁴⁹ Txã'wě yaakxkahnĩiçxáak Dxus txakwe walasa ũ'kwe's txakwe ew yũu.

Txã' wala peeygãasa'.

50 Txãasa maawa txã'sna nwëesë'jsatxi' багаçxtewa peeygãhna nes yuuna.

51 Dxusa' kījīhnawa jxukak vxit, sa' ūuste ii-wejçx yaakxsatxwa kpaasu'jme'.

52 Jxkaahsatxwa txãawe'sx jxkaahnijū kutxi'kh, Sa' kīhtewa āhmée pxthaakuēsatxi' walasak vxit.

53 Kīhwa ji'phmée peejiina fxi'zesatxi' txãawe'sx peejini's jxukak ūs.

Sa' wala ji'phsa yuutxi'sa' kīhwa ji'phmeek nvx-ih.

54 Txã's selpisáa Israel nasatxi' pu'çxku, Sa' peeygãhna fxi'zewa'ja's peçxkaname'.

55 Ma'wëne' kwe'sx yaçgawe'sx Abrahamwe'sxtxi' багаçxtewa ew yūuya' neeyūu, txã'sa' kxteyku yuu jīk.

56 Txajū' Maria' Elisabet yakh tekh a'te u'pçxak txajx yatnay ki' sxawedna u'j.

Juan Bautista upxni

57 Txãa ensu' Elisabet açã'wa'j āhte', luuçx piħç ji'phuk.

58 Aça' Elisabet nwe'sx vxite' namikuwe'sxwa jiyuçxa', weçxaya' u'jtx Dxusa' Elisabetha's txã'wë ew yūupa'ga.

59 Txajū' teeçx ki'sute', luuçxa's cirkuncidāyya' u'jtx. Sa' ney yase Zakariastxi ki'p wëe.

60 Nawa njī'j we'weçxa':

—Txã'wëmée wejxwa Juan yasewa'ja' jīte', pi'kxna u'jsawe'sx pasçxa':

61 —I'kwe nwe'sxa' maa yuhwa Juan yaasesa meetx yu' aça' ¿ma'wētekwe Juan yase ki'p wējē'? jī'tx.

62 Txajū' neya's pējxtxi ma'wē yasewa'thewa.

63 Aça' neya' Juan yasewa'ja' jīnak fxi'jçxa ũs. Txã'wē yūute', jxukaysa kuhtx yajkxna neeyūu.

64 Txãa dudtey Zakarias ki' we'weya' ewuuçxa', Dxusa's seena' wala weçxak.

65 Txã'wē yūute', kxsū utxasū u'psa' wala ũukh we'wena neeyūutx. Aça' Judea thã'jsuwe'sxwa txã'wē yūuni's jxuka jiyutx puutx ya'pta'sxna.

66 Txã'wē jiyuçxa', na'wētx yajkxna puutx paapēyī':

—Isa, txãa luuçxa' Dxus bedekīynisane' yu' sa' ¿ma'wē yūuwa'jsakx? jī'tx.

Zakarias's Dxus Espiritu kwe'we'jni

67 Txajū' Juan ney Zakarias's Dxus Espiritu txajx ũuste kwe'we'the', na'jīnak āate pta'sx:

68 Israelwe'sxtxi jxpe'jsa Dxusa' kīhtewa jxuka ewsa'.

Kwe'sxa' txajx nasatha'w, aça' nwe'weya' kīhçxa', ewte nvxihtku.

69 Dxusna selpisáa Davxid ji'thewe'sx teeçx kaakh kīhtewa jxuka nwe'weya' ājãwa'jsa.

70 Nyafxiiitey Dxus yuwe pta'sxsawe'sx yakhwa na'wēk puutx we'we nwe'weya' kaahwa'ja's:

71 Kwe'sxtxi açesawe'sx kuseju nwe'weçxa ewte nvxiitu'nja,

72 Sa' kwe'sx yaçgawe'sxtxiwa peeygãhna, txã'wē adx puutx we'weni yuutxi'

le'çxkuẽçxáa yuhwa peçxkaname'nja
jĩ'k.

73 Sa' kwe'sx yaçgawe'sx Abrahan yakhwa
txã'wěyku na'wě puutx we'wena jurãy:

74 Kwe'sxtxi açesawe'sx kuseju nwe'weçxa ewte
nvxiitu'nja, açã' ũukhmée mselpiwe,

75 Adx yuuçxáana nwěesě'jna uu entepkaçx jĩ'k.

76 Açã' adx nçxi'kkuẽ idxa' Dxus itxísa yuwee
pta'sxsa yuuçxa, kwe'sxtxi Nwe'wesa
pa'jwa'ja's pheu'jna pekũjune'ga yaçte.

77 Kxah nasa' pkalpa'ga peltunãywa'ja's maawa
jiyuçxa, ewte neeyũuwa'ja's ji'phutxna.

78 Kwe'sx Dxusa' peeygãhçxa, cielujuy sek na'wě
kaakweethe'kh,

79 Çxhi'dxte uu ente na'wě yã'j ũstewa, wět
eena'te nvxiht-ya'.

Sa' kwe'sxtxiwa jxpubamée ewte kaafxize'jya'k
txã'wě yũu jĩnak we'we Zakariasã'.

80 Txajũ' Juana' walaana u'kh Dxus yuwe's
jiyuna, sa' nasa u'pnimée kiwesuk u'p-ya' u'j,
Israelwe'sxtxi pta'sxya' kasehwa'j en ãhpkaçx.

2

Jesus upxni (Mt 1.18-25)

1 Txãn ensu' Romate jxkaahsa Augusto Cesara'
txajx jxkaahni kiwesu nyafxçxah nasatx jxuka
eçte ãsxkahn jxkaakh,

2 Sirate u'psa ne'jwe'sx Cirenio yaasesa's.

3 Açã' jxukaysatx u'jwa'j ji'phu' txãawe'sx up-
xni çxhabte, eçte ãsxkahn.

4 Txãa pa'gak Jose' Nasaret çxhab Galilea kiweju kasehna u'j Judea kiwen Belen çxhab Davxid upxnite, Jose' Davxid ji'kh yu' naa pa'ga.

5 Belenna u'jweçça', txajx nyu yuuwa'jsa Maria yakhku u'j. Nawa Maria' nasak ji'ph yu'.

6 Aça' Belente ùsíyna, Maria's ãçã'wa'j en ähte',

7 kxtee ji'phuk nyafx nçxi'kkuẽ's. Sa' paadeewa'j yat ähmeete', klaa sã'jĩni yattek luuçxkuẽ's yapçxa khikh.

Dxus angel piisxáa-thegsawe'sxtxi we'weni

8 Belen utxasu kuswa dehméetx piisxáa-thegsa u'p yu'.

9 Naapkaçxha' Dxus angel teeçx vxyaak txãawe'sx u'pnisu jxuka eena' kweethna. Aça' txãawe'sxa' wala ùukhtxi.

10 Nawa Dxus angela' na'wêk we'we:

— Ûukhnuwe, yuwe ewsa jxũna yuhth, txã'sa' maawa jxuka wala weçxaatxna.

11 Äçxha' Davxid çxhabte teeçx upxku i'kwe'sxtxi nwe'wewa'jsa txã' Dxus kaahni Kristo'.

12 Aça' thegya' u'jçxa', uyuune'kwe luuçxkuẽ's yapçxa klaa sã'jĩni yatga khikhni ùste jĩçpkaçxha',

13 txãa dudtey txãa angel yakh wala kuh angel cielujũwe'sx vxyaatx, Dxusna weçxana:

14 jDxus êe walatewe'sxa' seena' yuh ew yuuk!

Naa kiwete nasa wêtwêt fxi'zewa'ja's ùsku peeygãhçxa jĩ'tx.

15 Txajũ' angeleswe'sxa' cielun ki' sxawedna u'jweçpkaçxa', piisxáa-thegsawe'sxa' puutx we'wetx:

—Belenna u'jwega Dxus pta'sxni's thegya' kĩh yũutewa uyu'nja'w jĩna.

16 Txajũ' wala dud u'jtx Belenna, sa' Mariawe'sxtxi' uytxi txã'wẽ luuçxkuẽ's klaa sã'jĩni yatga khikhçxa u'pte.

17 Sa' luuçxa's uyçxa', Dxus angel ma'wẽ we'weni'swa jxuka pta'sxtxi Mariawe'sxtxi.

18 Txajũ' vxitetxwa txã'wẽçxaçxáa pta'sxte', wala kuh we'wena neeyũutx.

19 Nawa Maria yu', txã'wẽ yũuni's jxuka peçxkanamée ũusteçxáak yajxna fxi'ze'.

20 Txajũ' piisxáa-thegsawe'sxa' Dxus angel ma'wẽ pta'sxtewa txã' kxtey yuutewa uyçxa', Dxusa's wala weçxana sxawedna u'jtx.

Jesus le'çxkuẽyna Dxus yatna jxũna u'jni

21 Upxnijũ teeçx ki'sute' luuçxkuẽ's cirkuncidãyya' u'jçxa txãa entey JESUS yasetx, Maria nasa ji'phumeyna Dxus angel ma'wẽne' yase's pta'sx txã'wẽytxi yase.

22 Moises leya' nasate açã'satx ma'wẽne' ki'skaja' açã' Maria' txãa entxi kxtey yuuçxa', Jose yakh luuçxkuẽ's Jerusalen çxhabna jxũna u'jtx, dxuus yatte Dxusna weçxana neewe'weya'.

23 Dxus leyte we'weçxa': Nyafxte piçkuẽ yũute', Dxus jĩ nvxiitwa'ja' jĩ'k txãa pa'gatx Dxusna neewe'weya' u'j.

24 Vxite ahte Dxus leyte we'weçxa': e'z tub çxihme meeçxawa tub luuçx jxũna u'jçxa dxuus yatte ikhwa'ja' jĩ'k açã' txã'wẽy yũuya' u'jtx.

25 Txãn ensu' Jerusalen çxhabte' teeçx piçthê'j Simeon yaasesak u'pu'. Txãa piçthê'ja' Dxusna yuuçxáak neewe'wena fxi'zesa yu', ¿bagaçx Israelwe'sxtxi nwe'wewa'jsa pa'jakx? sũhna ũythãsna. Aça' Dxus Espiritu' Simeona's kaajiyu'kh

26 Nwe'wewa'jsa Dxus kaahni Kristo's uumey uywa'ja's.

27 Sa' Dxus Espiritu' Simeona's kaayaki'kh dxuus yatna u'jwa'ja's, aça' u'jçxa' uyku txã'wẽ Jesus njĩ'jwe'sxa' Dxus ley jxkaahni's kxtey yuuya' Jesusa's nuypa'jaçte.

28 Aça' Simeona' txãa luuçxkuẽ's yakhçxa na'jĩnak Dxusna weçxa:

29 Idxa' adx yakh puutx we'weni's kxtey yuug na' ãçxhã' adx uuwa'ja's ũsune'ga weçxana uukahn.

30 Nwe'wesa's nasa jxukaysa dxi'pte kaag.

31 Aça' txã'sa' adx yafxju yuu uythu.

32 Txãaí Israel nasa meetxwa eena' kweet-hwa'jsa' na' Israelwe'sx yuutxi' jweeíçxáa weçxweçxa kaayaki'jwa'jsa' jĩ'k.

33 Simeona' txãa luuçxkuẽ's txã'wẽ we'wete', Jose ptamwe'sxa' kuhtx yajxna neeyũ.

34 Aça' Simeona' bedekĩçxa', Jesus njĩ'j Maria's pta'sxku:

—Mwẽesẽ'çx, naa luuçxkuẽ' Israelwe'sxtxi wala kçxhãaçxha'jwa'jsa' nawa txã'sna jiyusamée yu' wala jxpubawa'jsata'. Mpa'yajxwe wakx txã'sa' wala açetxna.

35 Aça' maaçxah txã'wẽ açewa'jsatxna aça' maaçxah txã'wẽ jxpa'gawa'jsatewa txã'wẽ

yūunisa içxa ũusuy we'thu yājāni na'wē yuuna jīk.

³⁶ Kxteea' Fxanwel niisa, Aser ji'kh ũsu' wala thē'khuēsa Ana yaasesa. Txā' Dxusna selpisaak yu' sa' wala kna'satey iimi'k nawa siete anxute' nmi'a' uuk.

³⁷ Açxha' nmi' uuni oçxenta y kuarto anxu', nawa dxuus yatte pu'vxitumée een isak Dxusna selpiina, orāyna nes yu'.

³⁸ Sa' Ana' utxaana kūhçxa, Dxusna weçxaçxa' pta'sxku Israelwe'sxtxi nwe'wewa'jsa's ũythāsna ũssawe'sxtxi's: Naa luuçx txā'wē yūuwa'jsa' jīna.

Nasaretna sxawedni

³⁹ Txajū' Dxus jxkaahni leya's kxtey yuuçxa', Galilea kiwesu txāawe'sx çxhab Nasaretnay Maria Josewe'sxa' sxawedtxi.

⁴⁰ Aça' luuçxkuē' walaana u'kh Dxus yuwe's jweeíçxáa piyana, txā'sa' Dxusí pu'çxhi'ne' naa pa'ga.

Jesus doce anxu ji'phçxa Jerusalenna u'jni

⁴¹ Jesus njī'jwe'sxa' anxu iisatx Jerusalen çxhabna Paskua fxiestan u'jwe'.

⁴² Sa' Jesus doce anxu ji'phpkaçxha', Jerusalen çxhabna fxiestate ki' u'jtx, ma'wēne'ta anxu iisa u'jwe' txā'wēy.

⁴³ Aça' fxiesta pçuute', Maria Jose yakh sxawedna u'jtx. Sa' txāawe'sx jiyunimeete Jesusa' Jerusalentee neeyūuk.

⁴⁴ Nawa njī'jwe'sx yu', Jesusa' nasa wala ksx-avxyte yuhna sūhnaçxáatx teen uta dxi'the u'j.

⁴⁵ Txajũ' nwe'sx ksxavxysu jxuka pakweçxawa uymeeçxa', Jerusalen çxhabnay pakweya' sx-awedtxi.

⁴⁶ Sa' tekh ensu' dxuus yatte ley kaapiya'jsawe'sx ksxavxyte wësë'jna paapëjxna u'ptetx uy.

⁴⁷ Txã'wë luuçxkuëçxáaçxawa txakwe wala leya's jiiçxa ew paste', jxukaysa kxtee wësë'jna ũssa' wala kuh yaaki'tx.

⁴⁸ Txajũ' nji'jwe'sx uyçxa', kuhtx yajkx sa' nji'ja' na'jik:

—Idxa' çkijxa'ga pta'sxmée txã'wë neeyũu? Kwe'sxa' wala nxusna pakwetha'w jite',

⁴⁹ Jesus pasçxa':

—Adxa' Adx Tata jxthãasniçxá's selpiina u'pthu aça' çkijxa'kwe adxa's pakwé'? jite',

⁵⁰ txajx pasni'sa' jiyuya' ajãmeeta'.

⁵¹ Txajũ' Jesusa' neywe'sx yakh Nasaret-nay sxawedna u'jçxa txãawe'sxtxi nwëesë'jnak fxi'ze. Aça' txajx nji'ja' ma'wë we'weni'swa jiyumeeçxawa txajx ũuste peçxkana yu' meek yajkxna fxi'ze'.

⁵² Txajũ' Jesusa' walaana u'kh Dxus yuwe's jweeiiçxáa piyana, sa' Dxus dxi'pte ew yũuçxak fxi'ze, nasaa dxi'ptewa txã'wëy.

3

Juan Bautista nasa u'pnimée kiwesu Dxus yuwe's pta'sxni

(Mt 3.1-12; Mr 1.1-8; Jn 1.19-28)

¹ Tiberio Cesar Romate jxkaahna u'pni kince anxusu' Poncio Pilato' Judeate ne'jwe'sxku yu'

aça' Herodesa' Galileate ne'jwe'sxku yu'. Naapkaçxha' txajx nyakh Fxelipe' Iturea vxite' Trakonitete ne'jwe'sxku yu'. Aça' Lisaniasa' Abiliniate ne'jwe'sxku yu'.

² Naapkaçxha' sacerdote npiiçthê'jwe'sx yu' Anas vxite' Kaifxas txãawe'stxi yu'. Txãn ensuk Dxusa' txajx yuwe's nasa u'pnimeesu pta'sxya' u'khan pa'ya Zakarias nçxi'k Juana's.

³ Aça' Juana' Jordan yu'wala utxasu msuu msuuwa jxuka pekũjk nasatx pta'sxna:

—I'kwe'sx pkaltxi nvxihtçxa Dxus tasxte sxawedçxa yu'te mkhêewe ya'bautisãyna, i'kwe'stxi Dxus peltunãykahn jĩ'k.

⁴ Dxus yuwe pta'sxsa Isaias na'jĩna fxi'jni' kxtey yuuk:

Nasa u'pnimée kiwesu sus we'wenik pthũuse' na'jĩna:

Dxus pa'jwa'ja's mpheu'jwe,
Txã' thêymée pa'khan.

⁵ Kiwe kafx u'psuwa jxuka yuutawa'j yuuna, Sa' thã'j wala vxite' vxiç ma'k yuu nawa jxuka uukwe'jni yuutxna.

Dxi'j ta'gusawa ku'le'jni yuutxna.

Dxi'j ewmeesa's pheu'jni yuutxna.

⁶ Aça' nasa jxukaysa uyuutxna nwe'wewa'jsa Dxus kaahnisa's jĩna fxi'jni'.

⁷ Juan tasxte ya'bautisãyya' pa'jsatxi' na'jĩnak we'we:

—I'kwe'sxa' ul weesweesa ji'ji'kwe, txãa pa'ga kastigo seena'sa yuja' aça' txajũ iyuwa'ja's ¿kinga pta'sx?

⁸ Txã'wê kastigo seena'saju iyuwa'ja's jiyuyã'jçxa', ewçxãa yũuna mfxi'zewe, kxah

maawa uysa': Naawe'sxa' pkaltxi nvxihtçxa Dxus tasxte sxawed yuhta sũjũtxna. Txã'jĩte', kwe'sxa' Abrahan ji'tha'w sũhna iiwejçx yajkxna fxi'zewa'jme'. Na'jĩ'th na': I'kwe'sxçxáamée naa kwet yuhtxwa Abrahan ji'j vxit-ya' âjãna Dxusa'.

⁹ Txã'wě ewçxáa yũuna fxi'zemeete', ama' ih yã'j ũsa' fxtũu tasxtxi spě'thya'. Maa fxtũu tasxwa ew yũnmeena aça' spě'thçxa ipxte kabwa'jçxáa yuuna jĩnak yu'kxpeh.

¹⁰ Txã'jĩte' nasa' paapějxtxi:

—¿Kĩhçxa yũuna ewçxáa fxi'zekxtha'w? jĩte',

¹¹ Juan pasçxa':

—E'z atxh ji'phçxa', ji'phmeesa'sa' teeçx ũswa'ja'. Aça' ũ'niwa jxthaakwe ji'phçxa', vxite ji'phmeesa's puuçwa'ja' jĩk.

¹² Txã'wěy gobierno jĩ vxyu pkhakhsawe'sxwa yu'te ya'bautisãyya' utxaaçxa', Juana's na'wětx paapějx:

—Mpeeta'sx, kwe'sxa' ¿ma'wě yũuna fxi'zekxtha'w? jĩte',

¹³ Juan pasçxa':

—Ley makwene' vxyu's pěkaja' txã'sçxáana mpějxwe, ĩsxĩçxa thaakwe pějxmée jĩk.

¹⁴ Txajũ' soldauwe'sxwa maai' yũ' txã'wěy pějxtxi:

—Kwe'sxa' ¿ma'wě yũuna fxi'zekxtha'w? jĩte', txãawe'sxtxiwa pta'sxku Juana':

—Maa nasa yuhtxwa juuna' we'weçxa txãawe'sx jĩitx kusa'jnuwe kĩh yuhnawa. Sa' kĩh yuhwa yuuwemeetewa ĩsxĩçxa pãatxhĩ'khna fxi'zenuwe. Sa' i'kwe'sxtxi makwe dewetewa txãa yakhçxáa weçxana mfxi'zewe.

15 Txã'wẽ we'wena ũste', nasa wẽsẽ'jsa yu' wala yajkxna ũsu'tx: Meeçxa' ¿naa wáa Kristona? sũhna.

16 Aça' Juana' jxukaysatx pta'sxku:

—Adxa' bautisãyna naasáa yu'teçxáath akhe'. Nawa adx e'suh vxite yuja', txã' Dxus Espiritu ipx na'wẽsa's i'kwe'sx ũuste kxu'akhe'jya' ãjãwa'jsa'. Aça' adxa' txajx pelgatxi wesçxáa yuhtxwa khibbxa' ãjãwa'jmeesath.

17 Txã' yujxa' skuutxh kweejxa'jni plaatu's kusete at yã'jçxa ũsa'. Sa' kweejxa'jçxa skuutxha's jxaawuuna, nawa tama'sa' ipx bagaçxte yuhwa ũçxhawa'jmeesate kabuna jĩk.

18 Txã'wẽk wala kuh jwed yu'kxpehna Dxus yuwe's pta'sxi' Juana'.

19 Sa' ne'jwe'sx Herodesa'swa yu'kxpejk txã'wẽ nyakh Fxelipe nyu Herodiasa's kusa'jçxa, txãa yakh nyu na'wẽ fxi'zeçxa vxite' kĩhwa ewmeeçxáak yũuna ũsu'. Aça' txãa pa'gak txã'wẽ yũuwa'jme' jĩna yu'kxpeh Juana'.

20 Nawa Herodesa' nwẽesẽ'jepkaçxte jweeĩçxáak thaakwe ewmée yũu, Juana's karcelte kaakxuupha'jna.

Jesus ya'bautisãyni

(Mt 3.13-17; Mr 1.9-11)

21 Txã'wẽ yũumeyna Juana' nasatx yu'te bautisãyna ũste', Jesuswa pa'jçxa yu'te ya'bautisãyku. Sa' oraĩçpkaçxha', cielu' phaatek.

22 Aça' Dxus Espiritu' Jesus kajkwete tub çxihme na'wẽsak vxyaana kĩh. Naapkaçxha' cieluju na'wẽ we'wenik pthũuse:

—Idxa' adx Nçxi'k wala wedxnisag, aça' iidxpaga wala weçxana ũsthu jïni.

Jesukristo ji'j nyafxiiteywe'sxtxi pta'sxni
(Mt 1.1-17)

²³ Jesusa' treinta anxu ji'phçxak Dxus yuwe's pta'sxya' takh. Jesusa' Jose nçxi'ka' jïnisak yu'. Josea', Eli nçxi'kku yu'.

²⁴ Elia', Matat nçxi'kku yu'. Matatha', Levxi nçxi'kku yu'. Levxia', Melki nçxi'kku yu'. Melkia', Jana nçxi'kku yu'. Jana', Jose nçxi'kku yu'.

²⁵ Josea', Matatias nçxi'kku yu'. Matatiasa', Amos nçxi'kku yu'. Amosa', Nahum nçxi'kku yu'. Nahuma', Esli nçxi'kku yu'. Esli', Nagai nçxi'kku yu'.

²⁶ Nagaia', Maat nçxi'kku yu'. Maatha', Matatias nçxi'kku yu'. Matatiasa', Semei nçxi'kku yu'. Semei', Jose nçxi'kku yu'. Josea', Juda nçxi'kku yu'.

²⁷ Juda', Joana nçxi'kku yu'. Joana', Resa nçxi'kku yu'. Resa', Zorobabel nçxi'kku yu'. Zorobabela', Salatiel nçxi'kku yu'. Salatuela', Neri nçxi'kku yu'.

²⁸ Neri', Melki nçxi'kku yu'. Melkia', Adi nçxi'kku yu'. Adi', Kosam nçxi'kku yu'. Kosama', Elmodam nçxi'kku yu'. Elmodama', Er nçxi'kku yu'.

²⁹ Era', Joswe nçxi'kku yu'. Joswe', Eliezer nçxi'kku yu'. Eliezera', Jorim nçxi'kku yu'. Jorima', Matat nçxi'kku yu'.

³⁰ Matatha', Levxi nçxi'kku yu'. Levxia', Simeon nçxi'kku yu'. Simeona', Juda nçxi'kku

yu'. Juda', Jose nçxi'kku yu'. Josea', Jonan nçxi'kku yu', Jonana', Eliakim nçxi'kku yu'.

³¹ Eliakima', Melea nçxi'kku yu'. Melea', Mainan nçxi'kku yu'. Mainana', Matata nçxi'kku yu'. Matata', Natan nçxi'kku yu'.

³² Natana', Davxid nçxi'kku yu'. Davxida', Isaí nçxi'kku yu'. Isaía', Obed nçxi'kku yu'. Obeda', Booz nçxi'kku yu'. Booza', Salmon nçxi'kku yu'. Salmona', Naason nçxi'kku yu'.

³³ Naasona', Aminadab nçxi'kku yu'. Aminadaba', Aram nçxi'kku yu'. Arama', Esrom nçxi'kku yu'. Esroma', Fxares nçxi'kku yu', Fxaresa', Juda nçxi'kku yu'.

³⁴ Juda', Jakob nçxi'kku yu'. Jakoba', Isaak nçxi'kku yu'. Isaakha', Abraham nçxi'kku yu'. Abrahamana', Tare nçxi'kku yu'. Tare', Nakor nçxi'kku yu'.

³⁵ Nakora', Serug nçxi'kku yu'. Seruga', Ragau nçxi'kku yu'. Ragaua', Peleg nçxi'kku yu'. Pel-ega', Heber nçxi'kku yu'. Hebera', Sala nçxi'kku yu'.

³⁶ Sala', Kainan nçxi'kku yu'. Kainana', Arfxaxad nçxi'kku yu'. Arfxaxada', Sem nçxi'kku yu'. Sema', Noe nçxi'kku yu'. Noe', Lamek nçxi'kku yu'.

³⁷ Lamekha', Matusalen nçxi'kku yu'. Matusalena', Enok nçxi'kku yu'. Enokha', Jared nçxi'kku yu'. Jareda', Mahalaleel nçxi'kku yu'. Mahalaleela', Kainan nçxi'kku yu'.

³⁸ Kainana', Enos nçxi'kku yu'. Enosa', Set nçxi'kku yu'. Seta', Adan nçxi'kku yu'. Adan yu', Dxus kuseju yuu pheu'jnisak yu'.

4

Eçxthē'j Jesusa's ĩsxii wēeni
(Mt 4.1-11; Mr 1.12-13)

¹ Dxus Espiritu Jesusa's jxpe'jya' jxukate vxyaanijũ', Jesusa' Jordan yu'walaju kasejk, aça' Espiritu' pe'jna u'kh nasa u'pnimeesu.

² Kxteea' kuarenta en kĭh yuhwa ũ'mée u'pçxa', wēek. Aça' eçxthē'ja' pa'kh ewmée vxit wēeçxa.

³ Sa' pa'jçxa na'jĭk:

—Dxus Nçxi'k dxihçxa', naa kweta's pan myuukaah jĭte',

⁴ Jesus paşçxa':

—Nasa' pan yakhçxáa yu' ĩtxĩ fxi'zemeetxna, naasáa jxuka Dxus we'weni yakh yuuçxáa ĩtxĩ fxi'zetxna jĭna fxi'jni ũsa' Dxus librute' jĭnak pas.

⁵ Txajũ' eçxthē'ja' teeçx thā'the Jesusa's pe'jna u'jçxa', txāa vxıçu mtee mtee çxhab walatxwa kaavxya'ja'jçxa,

⁶ na'jĭk:

—Naa çxhabtxi petx kiwe kĭjkĭhtxwa jxuka idxçxaçxá's ũsu'nja. Na' jxuka adx kuseteçxaçxáa dukhnisata' aça' maawa adx wedxnisa yu'sa' ũsuçxá'nja.

⁷ Idxwa adx tasxte peejxũkweçxa neewe'wene'ga aça', jxuka iidx jĭiçxaçxáa yuutxna jĭte',

⁸ Jesus paşçxa':

—Idxna jxpe'jsa Dxusçxá's neewe'wewa'ja', sa' txāaçxá's selpiwa'ja' jĭ'k Dxus librute aça' eçxthē'j adx tasxu me'j jĭk.

9 Txãa e'su', eçxthê'ja' Jesusa's Jerusalenna pe'jna u'jçxa, dxuus yat êete kaateka'jçxa' na'jîk:

—Dxus Nçxi'k dxihçxa', kute ayjxu mûph kiwekhê.

10 Txãa pa'gatey Dxus librute we'weçxa': Txajx angeleswe'sxtxi jxkaajana idxa's nwe'wekahn.

11 Aça' angeleswe'sxa' kusete jxpa'gatxna, iidx çxida kwette kpã'yũukahmén jîte',

12 Jesus pasçxa':

—Dxus librute': Idxna jxpe'jsa Dxusa's jxkaahwa'j ji'phmeeg jî'k jîna paste',

13 eçxthê'ja' ãjãmée yã'jçxa', Jesusa's nvxi-htçxa u'kh sa' maz en yu' vxyaame'.

Galilea kiwesu Jesus mjüya' takhni

(Mt 4.12-17; Mr 1.14-15)

14 Txajü' Jesusa' Dxus Espiritu jxpe'jni ki' Galileate sxawedna pa'the', txãa kiwesu nasa' jxuka Jesusçxaçxá'stxi we'we' kîjkîhwa yü'k jîna.

15 Txajü' Jesusa' judiuwe'sx pkhaakhenisu Dxus yuwe's kaapiya'the', jxukaysa wala weçxana tuuthe'je'tx.

Jesusa' Nasaretna u'jni

(Mt 13.53-58; Mr 6.1-6)

16 Txajü' Jesusa' Nasaretnak u'j, txajx walaní çxhabna. Sa' kxte pa'jçxa', sapatu jxkaase ensu' ma'wêne' yü' txã'wëy, judiuwe'sx pkhaakhenite u'kaçxa yujuk Dxus libru's lëeyya'.

17 Aça' Dxus yuwe pta'sxsa Isaias libru'stxi üs. Aça' na'wë fxi'jnikhêk libru's phaade:

18 Dxus Espiritu' adx yakh üsa',

Txãasak adxa's txhitxh yuwe ewsa's puupletx pta'sxkahn.

Ūuste nxusna u'psatxku kvxiisxa'jya' adxa's
kaah,

Yuuwesa preesutx nwe'wewa'ja'sku pta'sxya'
kaah,

Sa' uysameetxi' kaauyu'jna,

Pkxuunisatxi' nwe'weçxa,

¹⁹ Jxukasa weçxana neeyũuwa'j anxu āani's
pta'sxya'k kaah jīni's lēeyçxa',

²⁰ Jesusa' libru's aphçxa, judiuwe'sx pkhaakhen-
ite pu'çxsa's dukhna'wa, kaçxku. Aça' jxukaysa
judiuwe'sx pkhaakhenite ūssa' ivxiitumeetx Je-
susa's thegna neeyũu ūythāsna.

²¹ Aça' Jesusa' na'jīnak pta'sx:

—Na'wē fxi'jnisa's wēsē'ji'kwe txā' āçxhā'
kxtey yuuwa'j en ājk jīk.

²² Txajū' jxukaysa Jesusa's ewçxáatx we'wena
kuh yajkxna neeyũu, txā'wē zhiçxkwe pta'sxte'.
Sa' puutx paapēyi'tx:

—Naa piçthē'ja' ¿Jose nçxi'k meená'? jīte',

²³ Jesus pasçxa':

—Isa yuuwa i'kwe'sxa' adxa's naa
sūjū'ne'kwe: Yu'çe'jsa, idxíi mya'yu'çe'j. Sa'
na'jīya'wane'kwe: Kapernaumte kījkihwa ew
yūuk jīni's wēsē'je'tha'w txāatxi' txā'wēy myūu
ayte iidx kiwetewa jīya'wane'kwe jīçxa',

²⁴ ki' we'wek:

—Isath we'we': Dxus yuwe pta'sxsa' peekx
kiwesu' weeçxni yuuçxáa fxi'zetxna maawa.

²⁵ Dxus yuwe pta'sxsa Elias ensu Israel kiwesu'
wala kuh vxiuda ūsu'tx, na'wē tekh anxu y
medio nus pa'jmeete', wala wējē pa'kh txāa ensu.

²⁶ Nawa Dxusa' Eliasa's kxazkuē vxiuda tasxsu
jxuka yu' kaahmēe, naasáa Sidon çxhab wala

pukasu Sareptate teeçx vxiuda tasxte yuuçxáak kaah.

²⁷ Txã'wěy Israel kiwesu' wã'jy weete wala ãçã'sa ũsu'tx, Dxus yuwe pta'sxsa Eliseo ensu. Nawa maa yuhtxwa nuykatxhimée, naasáa Naaman Siria kiwetewe'sx yuuçxá'sku nuykatxhi jíte',

²⁸ wēsě'jçxa', judiuwe'sx pkhaakhenite u'psa' wala ũusaçxana,

²⁹ kiiteçxa Jesusa's çxhabuh kutxi'jtx. Txãa çxhab Nasaret yu', thã'j vxiçgak ũsu', aça' txãa penxa vxiçuhtx ukapajkxya'wa yu'.

³⁰ Nawa Jesusa' txãawe'sx ksxavxysu uymeyna skhēwçxa u'kh.

Eçx iiyamunisa (Mr 1.21-28)

³¹ Txajũ' Jesusa' Galileate Kapernaum çxhabte pa'jçxa', sapatu jxkaase ensu' Dxus yuwe's pta'sxna ũsu'k.

³² Aça' nasa' wala kuh yajkxna wēsě'je'tx, txã'wē Dxusa's nwēese'jwa'ja's ũukhnus pta'sxpa'ga.

³³ Aça' kxte judiuwe'sx pkhaakhenite teeçx piçthě'j u'pu'k, eçx iiyamunisa. Txã' susku na'jĩna we'we:

³⁴ —Jesus Nasarethuwe'sx, kwe'sxtxi' çkĩhga yũu wějě'? Kuçx yuunu. Meeçxa' çivxi-ituya'wagá'? Idx kimtewa jiith. Idxa' Dxus kaahnisag jíte',

³⁵ Jesusa' txãa eçx luuku vxit-sa's juuna'k na'jĩna we'we:

—Sxuuna' myuu, sa' naa piçthê'j ũusuh mkaaseh jîte', txãa eçxa' txãa piçthê'ja's nasaa ksxavxysu pêtçxa txajx ũusuh kasejk kîh yuhwa kpâ'vxitmée.

³⁶ Txã'wê yūute', jxukaysa ũukhçxa txãawe'sx pwe'sx na'jĩnatx puutx we'we':

—Jesusa' ĸkimki saki'k txã'wê juuna' jxkaahna we'weteçxáa eçx yuhwa nwēesê'jçxa' kaseje'? jĩ'tx.

³⁷ Aça' Jesus txã'wê yūuni's msuuwa jxukatx wala tuuthe'je' txãa ja'dasu.

Pedro nyu njĩ'ja's Jesus nuykatxhini

(Mt 8.14-15; Mr 1.29-31)

³⁸ Txajũ' Jesusa' judiuwe'sx pkhaakhenijũ kasehçxa', Simon yattek pa'j. Aça' Simon nyu njĩ'ja' wala kakwesekte açã'na ũusu'k. Txajũ' Jesusa's pxthaa we'wena pta'sxtxi.

³⁹ Aça' Jesusa' açã'sa tasxte kũhçxa kakwesek ũçxhakahn we'wek. Naapkaçxha' kakweseka' ũçxhate', kiiteçxa selpiiya' kasejk.

Jxuka çxhi'dxiçte maazkuēesatxwa nuykatxhini

(Mt 8.16-17; Mr 1.32-34)

⁴⁰ Txajũ' sek khějēçte', nasa kījkih weeteçxah açã'satxwa jxuka Jesus tasxte nuypa'jtx. Aça' açã'sa kakwesu kuseju jxa'dxçxaçxáa jxuka nuykatxhik.

⁴¹ Txãa açã'sawe'sx maái yu' eçx luuku vxit-sa's ũuste ji'phtewa txãa eçxwa suhs na'jĩna kasehtx:

—Idxa' Dxus Nçxi'kgu jĩna. Txãawe'sxa' Dxus Nçxi'ktewa jiitx yu'.

Nawa Jesusa' juuna' we'weçxa jwee yu' kwe'we'jme'.

Galileasu Dxus yuwe's Jesus pta'sxni
(Mr 1.35-39)

⁴² Khikhiiçte', Jesusa' çxhab eka jxu'j lajkxsuk kaseh. Nawa nasa' kxteewa pakwena pa'jtx, vxite ahsu u'khamén neevxisxaya'.

⁴³ Nawa Jesusa' na'wëk pta'sx txãawe'sxtxi':

—Dxus jxkaahwa'j yuwe's pta'sxwa'j ji'pthu vxite çxhabsuwa. Txã'wë yũuya' íçxáa kaahnisath jík.

⁴⁴ Txãasak Galilea kiwesu judiuwe'sx pkhaakhenisu Dxus yuwe's pta'sxna peküh.

5

Wedx ukhete wedx seena' wala khëeni
(Mt 4.18-22; Mr 1.16-20)

¹ Teeçx ente' Jesusa' Genesaret íkh pukate ũste', nasa' kxtee zuuna'çxáatx utana pa'j Dxus yuwe's wësë'j wëeçxa.

² Txajũ' Jesusa' e'z barko íkh pukasu namu ji'phméé ũstek uy, namu wedx-uwesaaawe'sx yu' kasehçxa, wedx ukhetx thethnatx ũs yu'.

³ Aça' Jesusa' teeçx barko Simon jíte khëeçxa', yu'te wejkuë u'jçxak, kxtee kaçxçxa, Dxus yuwe's pta'sx nasatx.

⁴ Sa' Dxus yuwe's pta'sxna jxã'jçxa', Simona's na'jík:

—Barko's íkh wala pxãhte pa'j jxūna u'jçxa txkhëe ukhe's makh wedx uweya' jíte',

⁵ Simon pasçxa':

—Kwe'sxa' teeçx kus utatha'w mjïina pe'te, nawa teeçx wedxçxáa yuhwa uwemeetha'w. Nawa iidx jxkaahni's kxtey yu'nja jïçxa',

⁶ kxtey yuute', wedx wala kuh khêetx, açá' ukhe' suteeçku yu'.

⁷ Txajũ' vxite barkote ũssatx pu'çxya' yuukahn kuseju pa'yatx. Açá' txãawe'sxwa kũhçxa', kasxisx pu'çxçxa txãawe'sx jïitewa äsxtxi. Nawa e'z barkotey utaçxa dujuaate', ïkh dxiikhê khêeya'watx yu'.

⁸ Txã'wê yuute', Simon Pedro' Jesus tasxte peejxũkweçxa na'jïk:

—Adxa' pkalsath açá' adx tasxu mtxutéé jïk.

⁹ Kxaazkuêe wedx khêete', Simon Pedro' wala ũukhçxak txã'jï', açá' nasa kxtee ũssawa txã'wëytxi ũukh.

¹⁰ Zebedeo nçxi'kwe'sx Jakobo Juan txãawe'sxa' Simon yakh wedx uwe pu'çxna u'jusatx yu' sa' txãawe'sxwa txã'wëytxi wala ũukh. Nawa Jesusa' Simona's na'jïk:

—Ũukhnu, äçxhÿyã'ja' peena yu' wedx uwen u'jumée nasatx Dxus jïi pkhakhsa yuune'ga jïte',

¹¹ barkotx ïkh pukatee jxuka nvxihtna'wa Jesus yakh u'jtx.

Teeçx piçthê'j wã'jy weete açã'sa's Jesus nuykatxhini

(Mt 8.1-4; Mr 1.40-45)

¹² Jesusa' teeçx çxhabte ũste', teeçx piçthê'j wã'jy wee seena' kazx ji'phsak pa'j. Sa' Jesusa's uyna'wa, kïçhuçxa peejxũkwek na'jïna:

—Adxa's nuykatxhiwá'ga ahçemeeçxa' jïte',

¹³ Jesusa' kuseju jxa'dxna'wa, na'jïk:

—Ahçeme'nja, naa pa'ga katxhiçxa mneeyũ jĩçpkaçxa', txãa wã'jy weeju katxhiçxak neeyũu.

¹⁴ Aça' Jesusa' na'wëk jxkaah:

—Maa yuhtxwa pta'sxmeene'ga, naasáa sacerdotexá's iidx kakwe's txwesya' me'j. Sa' txãa weeju katxhipa'ga Dxusna peesune'ga Moises ma'wëga jxkaah txã'wëy, kxah nasa jxukaysa jiyutxna idx ew katxhiçxa neeyũutewa jĩnak jxkaah.

¹⁵ Tuuthe'khameetewa, nasa' jweeíçxáatx Jesus ew yũuni's tuuthe'je'. Aça' wësë'jya' wala pkhaakhe'tx, açã'satxwa kĩh weejuwa nuykatxhikahn.

¹⁶ Nawa Jesusa' nasa u'pnimeesu u'jçxak, Dxus yakh puutx we'we'.

Ësëya' ajasame's Jesus nuykatxhini

(Mt 9.1-8; Mr 2.1-12)

¹⁷ Jesusa' teeç çxhabte Dxus yuwe's pta'sxna ũste', kxteea' fxariseowe'sx vxite' Dxus leya's kaapiya'jsawe'sxwa Galileaju Judeaju vxite' Jerusalenu txajũwe'sx pa'jçxatx kxsũ kaççxa u'pu'. Aça' Dxus pu'çxni yakha' Jesusa' açã'satxwa nuykatxhi'k.

¹⁸ Txajũ' ësëya' ajãsameea's yakhçxa nuypa'jtx. Sa' Jesus tasxte pa'j nuykũh wëetx.

¹⁹ Nawa nasa wala ũste', u'kaya' ajãmeeçxa yat èete tejkaçxatx txkhë nuykĩh açã'sa's Jesus ũsnikhë.

²⁰ Txajũ' açã'sa's yakhsawe'sxa' Jesusa' nuykatxhiyujuna sũhni's jiyuçxa', açã'sa's na'jĩk:

—Iidx pkala' peltunãyni yã'jtx neeyũu jĩte',

²¹ Dxus leya's kaapiya'jsawe'sx vxite' fjarise-
owe'sxa' ũuste na'wêtx yajkxna u'pu': Naa
piçthê'ja' ¿kiimna saga Dxusa's iiweeçx we'wé'?
Dxus yuuçxáa pkaltxi peltunãyya' ãjawa'jsa',
açã' jweeju yu' ¿kimçxá' peltunãyya' ãjãma'k?
sũjũ'tx.

²² Aça' Jesusa' txãawe'sx ũuste yaakxni's
jiyuçxa' na'jĩk:

²³ —¿Kĩh yũutekwe txã'wê yaakí'? ¿Maa
thêymeesakx? Iidx pkala' peltunãyni yã'jtx
neeyũu ¿jĩniá'? Meeçxa': Kiiteçxa me'j ¿jĩniá'?

²⁴ Txã'wê thêysatewa Dxus Nçxi'k Nasa Yuusá'
naa kiwete pkaltxi peltunãyya' ãjãwa'jsa' naa
pa'ga kaajiyu'jya'wath açxha' jĩçxa', txajũ' txãa
êsêya' ãjãsameea's we'wek:

—Idxa'sthu we'we': Kiiteçxa iidx deeni's
tu'sçxa yatna me'j jĩte',

²⁵ dudtey txãa açã'sa' kiitena' txajx deeni's
tu'sçxa yatna u'kh, Dxusna weçxana tuuthe'jna.

²⁶ Jxukaysa kxtee ũssa' wala kuh yajkxna
we'wena, Dxusçxáanatx weçxana tuuthe'je' sa'
txã'wê ũukhnawa na'jĩ'tx:

—Bagaçx yuhwa txã'wê yũunisa yu'sa'
iiuymeetha'w jĩ'tx.

Mateo's Jesus pa'yani
(Mt 9.9-13; Mr 2.13-17)

²⁷ Txãa skhêwa', Jesusa' kasehçxa', gobierno jĩi
vxyu pkhakhsa Levxi yaasesa's vxyu pkhakhnite
kaçxçxa u'pte uyçxa':

—Adx yakh myuh jĩte',

28 Levxia' kiitena'wa kīhnawa jxuka nvxihtçxa Jesus yakh u'kh.

29 Txãa e'su', Levxia' txajx yatte fxiesta wala ewsa vxitku Jesusa's pi'kxçxa'. Aça' kxte' gobierno jīi vxyu pkhakhsawe'sx wala kuhsa vxite' nasa ma'wēsawa Jesus yakh ih mesate kaçxtxi.

30 Aça' fxariseowe'sx vxite' ley kaapiya'jsawe'sxa' Jesus yakh u'jusawe'sxtxi' na'wēttx açewe'we:

—I'kwe'sxa' ¿ma'wētekwe txã'wē gobierno jīi vxyu pkhakhsawe'sx yakh vxite' pkalsawe'sx yakh ũ'wé'? jīte',

31 Jesus paşçxa':

—Yu'çe'jsa's jxpeejxmeeta' aka ji'phmée wēt ũssa', naasáa açã'sa yuuçxáa yu'çe'jsa's jxpee-jxta'.

32 Adxa' nasa ewsatx pakweya' kīhmeeth, naasáa pkalsatx pakweya'çxáath kīh, kxah ewmée yūuna fxi'zeni's nvxihtçxa Dxus tasxte sxaweduutxna jīk.

Yūunani's Jesusa's pēyni

(Mt 9.14-17; Mr 2.18-22)

33 Txajū' txãawe'sxa' Jesusa's na'wēttx paapējx:

—¿Ma'wēçxata Juan yakh u'jusa vxite' fxariseowe'sx yakh u'jusa txãawe'sxa' tahtatey yūunaana Dxus yakh puutx we'wena fxi'ze'? Naapkaçxha' idx yakh u'jusawe'sx yu' yūunameetx fxi'ze' jīte',

34 Jesus paşçxa':

—I'kwe'sxa' ¿ptamu en fxiestate', pi'kxnisatxi' kaayūuna'jya' ājāma'kwe, novxio txãawe'sx yakh nee ũsiite'?

³⁵ Nawa novxio' txãawe'sx tasxu txuteewa'j en pa'jana, txajũ isa yũunaatxna jĩçxa',

³⁶ naa ejemplo's kaaja'da'jnak pta'sx:

—Ropa ñisx suteniite, tela u'sesa yakh ya'pã'khe'çme'. Txã'wẽme' tela u'sesa' jweeĩçxáak sude' ñisxsa's.

³⁷ Sa' txã'wẽy beka u'se aahnisa's slun ñisxsate ya'awu'çme'. Txã'wẽme' beka u'sesa' slun ñisxsa's sude'k, açá' beka yakh slun yakh e'zĩ vxitu'tx.

³⁸ Txãa pa'ga beka u'sesa's slun u'sesate awwa'ja'. Txã'wẽ yu', maa yuhwa vxitumeetxna.

³⁹ Açá' maawa beka jxaawniisa's tudxsa', beka u'sesa's yu' tudxya' wa'lu'k, jxaawniisaçxáa jx-thaakwe ewa' jĩçxa.

6

*Jxkaase entewa skuutxhtxi çxuktedeçxa ũ'ni
(Mt 12.1-8; Mr 2.23-28)*

¹ Teeçx sapatu jxkaase ente', Jesusa' skuutxh ehsu u'jweçte', txãa yakh u'jusawe'sxa' skuutxhtxi ũhdena nxinxtxi sũupi'jçxa ũ'tx.

² Açá' fxariseowe'sx maaí yu' pějxtxi:

—I'kwe'sxa' çmjĩpa'gakwe mjĩ en meetewa txã'wẽ yũ? jĩte',

³ Jesusa' na'wẽk pas:

—I'kwe'sxa' Dxus librute iilëeymeewá'kwe' Davxida' çkĩhga yũu? txãa yakh pi'kxna u'jusawe'sx yakh teeçx ente' wẽeçxa',

⁴ dxuus yatte u'kaçxa kxtee pantxi ũ'k, sa' txãa yakh u'jusawe'sxtxiwa ũsu'sku. Txãa pana'

naasáa sacerdotewe'sxçxáa ù'wa'the jiiçxawa txã'wěk yūu.

⁵ Aça' Dxus Nçxi'k Nasa Yuusaawa makwe sapatu jxkaase entewa jxkaahwa'j ji'pha' jĭk.

Teeçx piçthē'j paçu kuse udxnisa
(Mt 12.9-14; Mr 3.1-6)

⁶ Vxite sapatu jxkaase ensu', Jesusa' judiuwe'sx pkhaakhenite u'kaçxa, Dxus yuwe's pta'sxya' takhku. Aça' kxte' teeçx piçthē'j paçu kuse udxnisak u'p yu'.

⁷ Aça' Dxus leya's kaapiya'jsawe'sx vxite' fxariseowe'sxa' Jesusa's peethegu'natx ũsu' txã'wě sapatu jxkaase entewa nuykatxhite' pāatxhī'khya' sūhçxa.

⁸ Nawa Jesusa' peethegu'sawe'sx txã'wě ũus yaakxni's jiyuçxa', na'jĭk txāa piçthē'j kuse udxnisa's:

—Kiiteçxa, nasaa pxāhte myuju jĭte', txāa piçthē'ja' nasaa pxāhtek yuju.

⁹ Aça' Jesusa' nasa kxte ũssatx na'jĭk:

—I'kwe'sx ¿ma'jĭki'kwe? Sapatu jxkaase entewa, pu'çxte ¿ewmanx? meeçxa' ¿pu'çxwa'jmeemanx? Nasa's nwe'wete ¿ewmanx? meeçxa' nwe'wemeete ¿ewmanx? jĭçxa',

¹⁰ Jesusa' nasatx thegçxa', txāa āçā'sa's na'wěk jxkaah:

—Kuse's mku'le'j jĭçpkaçxha' txã'wěy yūute', txajx kuse' ewuuk.

¹¹ Nawa vxitesa yu' wala ũusaçxatx, sa' puutx paapēyi'tx: Jesusa's ¿ma'wě yūuçxa ewmeete nvxiitukxtha'w? jĭna.

*Docesatx Dxus yuwe's pta'sxya' kaahni
(Mt 10.1-4; Mr 3.13-19)*

¹² Txān ensuy Jesusa' Dxusna pējxya' u'kh thā'the sa' teeçx kus utak Dxusna pējxna pe'te.

¹³ Sa' khikhyna sēhte', txā'sna pi'kxna u'jusa kuhsatx pa'yaçxa', doce nasa txhitxhku txajx jxkaahwa'j.

¹⁴ Txāawe'sxa' naaçxahtx yu': Simon, txā'sa' Pedro yasek ki'p. Vxite' nyakh Adres, txajū' Jakobo, Juan, Fxelipe, Bartolomé,

¹⁵ Mateo, Tomas, Alfxeo nçxi'k Jakobo, Simon kananista nasa,

¹⁶ Jakobo nyakh Judas, vxite' Judas Iskariote, Jesusa's açesawe'sx kusete dukhwa'jsa.

*Nasa seena' wala kuhsatx Jesus kaapiya'jni
(Mt 4.23-25)*

¹⁷ Jesusa' txāa yakh u'jusawe'sx yakh thā'j vxiçu jxsa'jna kīhçxa', teeçx ahte txaktek yuju nasa wala kuhsawe'sx yakh. Txāa nasa' Judea kiwesuwe'sx, Jerusalen çxhabuwe'sx, vxite' ĩkh wala pukasu Tiro Sidon çxhabsuwe'sxtxi Jesus pta'sxni's wēsē'jya' pa'j, aç'a' vxite' āçā'sa Jesus nuykatxhikahntxi pa'j.

¹⁸ Sa' eçx luuku vxit-satx ũuste ji'phsawa Jesus kutxi'the', katxhiçxatx neeyū'.

¹⁹ Aça' nasa jxukaysa kxte ũssa' Jesusa's jxa'dxya' wala pa'pçxu'tx, txā'wē jxa'dxçxaçxáa maawa katxhiçtetx uyu', txāasatx txā'wēy yūu wējē'.

*Weçxana fxi'zewa'jsa vxite' nxuste pa'jwa'jsa
(Mt 5.1-12)*

20 Txajũ' Jesusa' txãa yakh u'jusawe'sxtxi thegçxa', na'jik:

—I'kwe'sxa' kîhwa ji'phmeeçxawa kuh ya-jkxmée weçxana mfxi'zewe, txãa pa'gatey Dxus jxkaahna ũsni' i'kwe'sx jĩ' naa pa'ga.

21 I'kwe'sxa' açxhíi yu' wēena ũsçxawa weçxana meswe, txãa pa'gatey wala sã'jĩni yuune'kwe.

I'kwe'sxa' açxhíi yu' nxusna ũsçxawa weçxana meswe, txãa pa'gatey sxijkana fxi'zewa'ja's jxpa'gawa'jsai'kwe.

22 I'kwe'sxa' Dxus Nçxi'k Nasa Yuusa's nwēesē'pha'ga ewmeesathas i'kwe'sx yasetx açewe'wena txãawe'sx tasxu kutxi'jna txã'wē yũuçtewa, weçxana mfxi'zewe.

23 Txãniitey Dxus yuwe pta'sxsawe'sxtxiwa txã'wētx ppxuu na' açxwa txã'wēyçxáa yu-utxna. Nawa nxusmée weçxana mfxi'zewe, txãa pa'gatey cielute peesni's jxpa'gawa'j ji'phi'kwe.

24 Nawa ji'phsawe'sx açxhíi weçxana fxi'zeni pçunijũ', wala yuh nxuste pa'jane'kwe.

25 I'kwe'sxa' açxhí' wēt txikna ũsi'kwe, nawa e'su pxthaa yuh wējēne'kwe. I'kwe'sxa' açxhí' sxijkana ũsi'kwe, nawa e'su nxusna ũ'nene'kwe.

26 I'kwe'sx yu', açxhíi yu' maa maa na-sawa ewçxáa tuuthe'jni fxi'zeçxawa, e'su nxuste neeyũune'kwe. Nyafxiiteywa Dxus yuwe's pta'sxsatha'w jĩna ĩsxĩina u'jusatxi' txã'wētx ewsata' jĩna tuuthe'je'.

Açesatx peeygãawa'ja'
(Mt 5.38-48; 7.12)

27 Nawa ayte wēsē'jna ūssa i'kwe'sxtxi' na'wēth jxkaaja': Puíi jxpakwesatxi' mpeeygāhwe. Açesatxi' ew yūuna mfxi'zewe.

28 Ewmée nuywe'wesatxi's ka'tu' ewçxáa mwe'wewe. Wēesxusatxi' txāawe'sx pa'gate Dxusa's mneewe'wewe.

29 Idxa's pukakwetga pehtxate', ka'tuwe'sxa'swa petxakahn mes. Maaí' atxha's kusa'jaçyā'the', puiimée kmiisa yuhnawa mes.

30 Pe'wsa's mes, sa' iidx jī's kusa'jçxa', dukmeetewa pāatxhī'khna pēynu.

31 Maa nasawa i'kwe'sxtxi ewçxáa yūuna fxi'ze jxthāasçxa', i'kwe'sxwa txā'wēy maa nasatxwa ewçxáa yūuna mfxi'zewe.

32 I'kwe'sxtxi peeygāasaçxáatx ka'tuwa peeygāhçxa', ew yūusatha'w çjīya' ājāma'kwe? Makwe nasa ewmeesaçxawa txā'wē peeygāasaçxáatx peeygājxa' yu' ājā'tx aça'.

33 I'kwe'sxtxi ew yūusaçxáatx ka'tuwa ew yūuçxa', i'kwe'sxa' ew yūusatha'w çjīya' ājāma'kwe? Makwe pkalsaçxawa txā'wē ew yūusaçxáatx ew yūuya' yu' ājā'tx.

34 Sa' i'kwe'sxtxi ki' kaasxwedu'jya' ājāwa'jsaçxá's pki'jçxa', i'kwe'sxa' pu'çxsatha'w çjīya' ājāma'kwe? Makwe nasa ewmeesaçxawa, txā'wē kaasxwedu'jya' ājāwa'jsaçxáatx pki'jya' yu' ājā'tx.

35 Wejxwa i'kwe'sxa' puíi jxpakwesaatx peeygāhna fxi'ze jī'phi'kwe, sa' pki'jçxawa jxthaakwe kaasxwedu'juna sūhmée mfxi'zewe. Txā'wē ew yūusaatxi' Dxusa' wala deweena, aça' i'kwe'sxa' cielute Dxus luuçx yuune'kwe, txāa pa'gatey Dxus cielutewe'sxa' txā'sna yaakxsamée

makwe ewmeesatewa ka'tu' ewçxáa yũuna ũsa'.

³⁶ I'kwe'sxa' peeygãasa myuuwe, i'kwe'sx
Tatawa ma'wē peeygãasana txā'wēy.

Jiimeeçxa' nuywe'wewa'jme'

(Mt 7.1-5)

³⁷ Ma'wēsatewa jiimeeçxa', ewmeesata' jīna
we'wewa'jme', txā'wē yũupa'ga i'kwe'sxwa
Dxus dxi'pte ewmeesa yuuya'mée. Vxitetx
nuywe'wewa'jme', ka'tuwa nuywe'wekahmén.
Āhmée yũusaatx peltunāywa'ja', Dxuswa
i'kwe'sxtxi peltunāykahn.

³⁸ Vxitetx peeswa'ja', ka'tuwa i'kwe'sxtxi
Dxusa' peeskahn. Makwe isaçxa vxitetx
peeste', ka'tuwa i'kwe'sxtxi Dxusa' txāa isanitey
ew uta pu'kisu'sna zuuna' āsxçxa peesnisa's
jxpa'gane'kwe.

³⁹ Teeçx ejemplo kaaja'da'jçxa' na'wēk pta'sx:

—¿Yafx ji'phmeesa' vxitewa txā'wēysa's
dxi'the pe'jna u'jya' ājāma'k? ¿E'zī kafxkhē
khēemeema'tx?

⁴⁰ Piyasá' kaapiya'jsate jxthaakwesame'.
Nawa maawa jxuka piyan jxā'jçxa yuuçxáa,
kaapiya'jsa na'wēy yuuna.

⁴¹ ¿Ma'wēçxa iidx yakthē'j yafxte kxtā'
le'çxkuēesa khēeçxa ũstewa, uyya' ājāki'g? iidx
yafxte yu' fxtū pe'la yuu walasa khēeçxa ũste'.

⁴² ¿Ma'wēçxa iidx yakthē'ja's pēyiki'g: iidx
yafxte kxtā'a's kutxi'ji'nja jīna? iidx yafxte yu',
fxtū pe'la walasa khēeçxa u'ptewa txāa yu'sa'
uymeeçxa'. Āakhēçxáa ew we'wena u'jusathē'j,
iidx yafxte fxtū pe'la walasa khuē'yna mkuutxi'j,

sa' txã'wẽ yũuçxaçxáa iidx yakhthê'j yafxte kxtã'
le'çxkuẽsa's kutxi'jya' ãjãne'ga.

Nasa ma'wẽ yũuçtewa mpa'yajkxwe jiyuya'
(Mt 7.17-20; 12.34-35)

⁴³ Fxtũu tasx ewsa', ewsaíçxáak yũnu', nawa
fxtũu tasx ewmeesa', ewmeesa íçxáak yũnu'.

⁴⁴ Fxtũu tasx ma'wẽsatewa yũntek isa ew
ya'jiyu'. Brewa's khãas tasxte ya'ude'çme', sa'
uwa's çhũçh tasxte ya'ude'çme'.

⁴⁵ Nasa ewsa' ewçxáatx we'we', ewsa's ũuste
ji'phna txãa pa'ga. Nawa nasa ewmeesa',
kazxçxáatx we'we', txãa pa'gatey ũuste yuu,
kazxsa u'pna aç'a we'wenisa' ũusuhne' kaseje'
naa pa'ga.

Dxusa's nwẽese'jsa vxite' Dxusa's
nwẽese'jsamée
(Mt 7.24-27)

⁴⁶ I'kwe'sxa' adxa's Jxpe'jsa jĩ'i'kwe sa' çkĩh
yuuçxakwe adx jxkaahni's kxtey yu'çmée?

⁴⁷ Maa nasawa adx tasxte utxaaçxa', adx
we'weni's nwẽesẽ'jçxa jxkaahni's kxtey yũusa'
txã' na'wẽsa':

⁴⁸ Teeçx piçthê'ja' yu'wala pukate kwet walate
kaaçxida'jçxa yat txajk. Txajũ' yu' walaçxa',
kxsũ afxihbna skhẽwçxawa yata's kẽesẽ'jme',
kwette kaaçxida'jçxa txaahnipa'ga.

⁴⁹ Nawa maa nasawa adx we'weni's
wẽsẽ'jçxawa, adx jxkaahni's kxtey yuumeena
txã' teeçx piçthê'ja' yu'wala pukate yata's
kwetmuse kajkweteçxáa txaahni na'wẽsa'. Yu'
walaçxa', tũçxhaçxa txãa yata's pẽtxçxa jxuka
suwku.

7

*Soldau kpiitan jxpe'jnisa's Jesus nuykatxhini
(Mt 8.5-13)*

¹ Txajũ' Jesusa' nasatx Dxus yuwe's pta'sxna jxã'jçxa', Kapernaum çxhabna u'kh.

² Txãa çxhabte' teeçx kpiitan ũsu'k romanowe'sx. Sa' txãa kpiitana' teeçx selpisáa ji'phu'k wala peeygãanisa. Nawa wala ãçã'çxa uuya'wayã'kh yu'.

³ Txajũ' kpiitana' Jesusa' ma'wēsatsxwa nuykatxhi'k jĩni's wēsē'jçxa', judiuwe'sx pkhaakhenite npiiçthē'jsatx jxkaakh Jesusa's pxthaa we'weya', txã'sna selpisa's nuykatxhiya' yuukahn.

⁴ Aça' txãawe'sxa' Jesusa's utxaaçxa', na'jĩnatx pxthaa pi'kxna we'we:

—Txãa kpiitana'sa' idx pu'çxwaça' ewna sũjũ'tha'w.

⁵ Txã' kwe'sxtxi peeygãhçxa pkhaakhewa'j yat yuhwa ktxaaja'kh naa pa'ga jĩte',

⁶ Jesusa' txãawe'sx pe'jni u'kh. Nawa yat utxa pa'jaçteçxáa, kpiitana' txajx namikutx kaakha Jesusa's na'jĩkahn:

—Adxa' wala ãhmeekwesath aça' wejx yuuwa adx yatte u'kaya' yuhmée tee yuu.

⁷ Adxa' txã'wē ãhmeekwesaçxa iıçxáath idxa's adx yuu pakweya' yujxa' thaame. Aça' wejx yuuwa txãjũçxáa yuwejuçxáa mwe'we aççxáa adxa's selpisa' katxhina.

⁸ Adxwa jwee npiiçthē'jsa jxkaahni's nwēesē'jna ũsthu, nawa jweeju adx jxkaahnisa soldau ji'pthu. Sa' txãawe'sxtxi' teeçxsa's me'j

jĩte', adx jxkaahni's kxtey yu'k. Sa' vxite's pa'yate', txãawa kxtey nwẽesẽ'je'k. Sa' adxa's selpisa's kĩh jxkaathewa, kxtey yu'k jĩnak yuwekaah.

⁹ Txajũ' na'wẽ kpiitan yuwe kaahni's Jesus wẽsẽ'jçxa', kuh yajkxnak neeyũu. Sa' e'ste yuusatx thegçxa' na'jĩk:

—Isath we'we', Israelwe'sx mteewe'sx yuhwa txã'wẽ adx we'weteçxáa katxhina sũhsa yu' iuymeeth naa kpiitan na'wẽsa yu' jĩk.

¹⁰ Txajũ' jxkaahnisawe'sxa' yatnay sxawedçxa', kpiitan jxpe'jnisa' katxhyã'j u'ptetx uy.

Vxiuda nçxi'ka's Jesus ĩtxi vxitni

¹¹ Txãa e'su', Jesusa' teeçx çxhab Nain yaas- esatek pa'jya' u'j, txãa yakh u'jusawe'sx vxite nasa kuhsa yakh.

¹² Sa' çxhabte u'kaçte', teeçx uusá's pedaaya' nasa wala kuh u'jweçtek uy. Txãa uusá' vxiuda nçxi'k txãaçxáasak yu'.

¹³ Aça' Jesus uyçxa', txãa vxiuda's peeygãhçxa kvxiisxa'jna:

—Û'nenuçx jĩnak we'we.

¹⁴ Sa' Jesusa' utxaaçxa, taula's jxa'dxku. Aça' yakhçxa u'jsa', nee yujutx. Naapkaçxha' Jesusa' uusá's na'jĩk:

—Piçtakx, mkiite jĩ'th idxa's jĩte',

¹⁵ uusá' kaçxçxa we'wek. Aça' Jesusa' njĩ'ja's dukhku.

¹⁶ Na'wẽ yũuni's nasa uyçxa', jxukaysa wala ùukhçxawa, txã'wẽytxi Dxusa's wala weçxana na'jĩ':

—Dxus jxkaahni wala yuhsa kwe'sx ksxavxyte vxyaak jĩ'tx. Sa' ki' we'weçxa':

—Dxusa' txajx nasatx pu'çxya' kĭjk jĩ'tx.

¹⁷ Txajũ' Jesus txã'wẽ yũuni's nasa jxuka jiyutx Nain çxhab peeku'jsuwe'sx vxite' Judea kiwe-suwe'sxwa jxuka.

Jesus tasxna kaahnisawe'sx

(Mt 11.2-19)

¹⁸ Jesus txã'wẽ yũuni's Juan Bautista' jxuka jiyuk Juan yakh u'jusawe'sx pta'sxte'. Sa' txãa yakh u'jusa e'zsatx pa'yaçxa',

¹⁹ Jesus tasxna kaakh paapějxya':

—Idxa' çisa Kristo naa kiwete kĭiwa'jsa ũsu'k txãa dxihgá', meeçxa' vxite ũythasuwá'nja'w? jĭnak pějkaah.

²⁰ Aça' e'z jxkaahnisa' Jesus tasxte pa'jçxa' txã'wẽy pějxtxi:

—Juan Bautista' kwe'sxtxi' kaakh idxa's paapějxya': çKristo naa kiwete kĭiwa'jsa ũsu'k txãa dxihgá', meeçxa' vxite ũythasuwá'nja'w? jĭnatx pějx.

²¹ Sa' txã'wẽ paapěysawe'sx pa'jaçte', Jesusa' nasa wala kĭjkĭh wee kazxsate açã'satxwa nuykatxhik, eçx luuku vxit-satx ũuste ji'phsa vxite' uyya' ajãsamée maazkuēesatxwa jxuka nuykatxhik.

²² Sa' Jesusa' paapěysawe'sxtxi' na'wěk pas:

—I'kwe'sx ma'wēne'kwe wēsē'jna uy txã'wẽy pta'sxine'kwe Juana's na'jĭna: Uyya' ajãsameewa uyu'tx. Aça' legsawa katxhiçxa legmeetx neeyũ'. Wã'jy wee kazx ji'phsawa katxhinitx neeyũ'. Aça' wēsē'jya' ajãsameewa

wēsē'jya' ājā'tx. Uuniisawa ki' itxī yu'tx. Sa' naa kiwete pxthaakuēsa yuutxi' Dxus tasxte pa'jwa'ja's pta'sxnik yuu.

²³ Aça' adxa's kuh yajkxna jxpubasame', weçxana fxi'zesa yuuna jīnak pta'sxkaah.

²⁴ Juan yuwe kaahnisawe'sx u'the', Jesusa' Juan ma'wēsatewa pta'sxku na'jīna:

—Nasa u'pnimée kiwesu' i'kwe'sxa' ¿kīja'skwe thegya' u'j? ¿Khīih tasx wejxate ēsē'sesa's wá'kwe thegya' u'j?

²⁵ ¿Khīmeeçxa' teeçx piçthē'j ropa zhiçxkwesa athçxa u'pna sūhçxa wá'kwe thegya' u'j? I'kwe'sxa' jii i'kwe txā'wē ropa zhiçxkwesa athçxa wēt weçxana fxi'zesa' jxkaahni yat-suçxáatx u'pu'.

²⁶ ¿Kim yuunakwe thegya' u'j? ¿Dxus yuwe pta'sxsa's wá'kwe thegya' u'j? Isa txā'wē dxih yuuçxa' Dxus yuwe pta'sxsate teeçx jxthaakwe walasa's ne'kwe uy.

²⁷ Juana's we'weçxak Dxus libroute na'wē pta'sxi':

Adx yuwee pta'sxsa's iidx yaçte kajaçthu, iidx pa'jwa'ja's pheu'khan jīna fxi'jni'.

²⁸ Na'jī'th na': naa kiwete Dxus yuwe pta'sxsate maa maatewa jxthaakwesa' Juan Bautistak yu'. Txā'wētewa, maawa makwe āhmeekwesaçxawa Dxus jxkaahnite u'kasa yu', Juante jxthaakwesa yuutxna jīte',

²⁹ Juan bautisāynisa nasa jxukaysa vxite' go-bierno jīi vxyu pkhakhsa txāawe'sx wēsē'jçxa', Dxusa' maa yakhwa jxuka ewsana sūhnatx neeyūu.

30 Nawa fxariseowe'sx vxite' ley kaapiya'jsawe'sx Juan bautisãynimeesa yu', txãawe'sxtxi Dxus ew yũu wēeni yu'sa' jxpa'gamée ahçetx.

31 Aça' Jesusa' na'jĩk:

—Naa ensu nasatxi' ¿kiim yakh kaaja'da'jaki'th? ¿Kiim na'wēta yu'?

32 Luuçx le'çxkuẽ na'wētx yu'. Txãawe'sxçáatx plaasasu pweesa'jya' kaçxçxa, vxite luuçxtxi sus pa'yana na'jĩ': Zhiçxkwetha'w tujkana kuvxí' nawa ku'ju'çmeei'kwe. Sa' nxus nxustha'w memu', nawa ũ'ne'çmeei'kwe jĩ'tx. Txã'wēsata' naa entewe'sxa'.

33 I'kwe'sxa' Juan Bautista's eçx luuku vxit-sa's ji'phna txãasak pan ũ'mée vxinowa tudxi'çmée jĩ'i'kwe, txã'wē kĩhwa ũ'mée tudxpa'gameeçxáa.

34 Nawa Dxus Nçxi'k Nasa Yuusáa kĩhçxa', ũ'we'th, tudxi'th, aç yu': Naa thē'ja' wala pũ'we', wala tudxsa'. Gobierno jĩi vxyu pkhaksawe'sx vxite' pkalsawe'sx yakh namiku' jĩ'i'kwe.

35 I'kwe'sxa' jiimeeçxai'kwe txã'jĩ'. Nawa maawa jiyuwa'jsa yuutxi' Dxusa' kaajiyu'juna adx ma'wēsatewa jĩk.

Simon yatte Jesus pa'jni

36 Teeçx fxariseo' Jesusa's pi'kxku sã'jĩya', aç'a' Jesusa' txãa fxariseo yatna u'jçxa', mesate kaçxku ũ'ya'.

37 Naapkaçxha' teeçx u'y iiméh kazx ewmée yũuna u'jusa' txãa çxhabtey u'psa jiyuk Jesusa' fxariseo yatte ũ'ya' u'jni's. Sa' teeçx fxrasko aceite wēt putasana atçxa fxariseo yatte pa'kh.

³⁸ Sa' ũ'nena utxaana kũhçxa', yafx yu'ju Jesus çxidatx pkhi'kxku. Khĩçxak txajx dxkhasju adxi'jçxa weçxá'. Sa' aceite wēt putasa's Jesus çxidakhē awku.

³⁹ Txã'wē yũuni's fxariseo Jesusa's pi'kxsathē'j uyçxa', na'wēk yajkx: Naa piçthē'j isa Dxus yuwe's pta'sxsa dxihwaça', jiyuna naa u'ya' pkalsa ewmeesaçxa txã'wē çxidatx pkhi'kxna aceite awna u'ptewa sũjũ'k.

⁴⁰ Aça' Jesusa' na'jĩk:

—Simon, idxa's na'wē we'wewa'j ji'pthu jĩte', fxariseo pasçxa':

—Mwe'we jĩte',

⁴¹ Jesusa' na'jĩk:

—Teeçx piçthē'ja's e'z nasatx yuul yu' vxyu pki'jçxa. Teeçxsa' kinientos pesok yuul yu'. Aça' vxite' cinkwenta pesok yuul yu'.

⁴² Aça' e'zĩi txãawe'sx yuultxi dukhya' ãjãmeete', vxyuu pki'jsa' txãawe'sxtxi' peltunãyku. Aça' ¿maa sũjũki'g txãa yuulusa e'zsatx maaki'k wejx thaakwe weçxa pki'jsa's? jĩte',

⁴³ Simon pasçxa':

—Wala yuulusane' wejx thaakwe weçxa jĩte', Jesusa':

—Isa yuh we'we'g, jĩk.

⁴⁴ Txajũ' Jesusa' txãa u'ya's thegçxa' Simona's na'jĩk:

—Adxa' iidx yatte pa'thewa, yu' ũsmeeq adx çxidatx pkhi'kwa'j. Nawa naa u'ya's mtheg, txajx yafx yu'juk pkhi'khi' sa' txajx dxkhasjuk adxi'j.

⁴⁵ Adxa's weçxameeg. Nawa naa u'ya' ayte u'kaĩn nvxiitnime' adx çxidatx weçxana.

⁴⁶ Adx jxkwetkhě aceite awmeeg. Nawa naa u'ya' aceite wět putasaak aw adx çxidakhě.

⁴⁷ Na'ji'th na', pkal iiméh wala kazxsatewa peltunāyni neeyūusa' txā'wēyku wala wedxna utxá' peltunāysa's. Nawa walamée peltunāynisa' jwee yu' weçxana utxa'çme'.

⁴⁸ Txajū' txāa u'ya's we'weçxa':

—I'kwe' peltunāyni yā'ji'kwe jĭk.

⁴⁹ Aça' pi'kxnasa Jesus yakh ũ'na u'psa' txāawe'sx pwe'sx na'wētx puutx we'we':

—Naa piçthē'ja' çkiimki saki'k pkalsa yuhtxwa peltunaĩ'? jĭ'tx.

⁵⁰ Aça' Jesusa' na'wēk we'we txāa u'ya's:

—Adx peltunaĩna sūhçxane'kwe adx tasxte utxāa naa pa'ga ewte yā'ji'kwe neeyūu na' açxha' wět weçx weçxa me'jwe jĭk.

8

U'ywe'sx Jesusa's pi'kxna u'jusa

¹ Txāa e'su' Jesusa' maazkuēe çxhabsuwa pekūjk Dxus jxkaahwa'j ena's pta'sxna txāa yakh u'jusawe'sx docesa yakh, çxhab le'çxkuēsu wala-suwa txā'wēy.

² Vxite' u'ywe'sxwa pi'kxna u'ju'tx na'wē eçxtxi kutxi'jna kĭh weete açā'satxwa nuykatx-hik txā'wē yuuniisa, aça' txāa ksxavxyte teeçxsa' Maria Magdalena yaasesa txajx ũusuh siete eçxtxi kutxi'kh txāak yu'.

³ Vxite' Herodesa's pu'çxsa Çxusa nyu Juanak yaasesa yu', vxite' Susanak yaasesa yu'. Kuh u'ysatx Jesusa's pu'çxna u'jusa yu' txāawe'sx ji'phuni kĭjkwe yakhçxáawa.

Skuutxh uuhsa's kaaja'da'jni
(Mt 13.1-9; Mr 4.1-9)

⁴ Txajũ' çxhabuwe'sx wala nasa kasehtx, Jesusa's thegya'. Aça' nasa txaazkuëe pkhaakhete', Jesusa' ejemplo yakhku pta'sx na'jĩna:

⁵ —Skuutxh uuhsa' uujxa' kasejk. Aça' msuufi yu' maz nxinx dxi'jsu āasu neeyũute', nasa waakhi'khi'jiçte, vxiçxakwewa fxiwçxa ũ'tx.

⁶ Aça' msuufi yu', kwet-sutx ũsxi. Nawa buçxaçxawa kiwe ew ji'phmeete', tuphaameeçxa jxuka uhdxtxi.

⁷ Msuufi yu', çhũçh ksxavxsutx ũsxi. Aça' çhũçhwa ja'da buçxaçxa' skuutxha's aphçxa ivxi-itutx.

⁸ Sa' vxite ahsu' kiwe ewsatek ũsxi. Txãa yu' walaaçxa teeçx tasçxáa cien nxinxtxi ji'phu.

Txajũ' Jesusa' suhsku na'jĩna we'we:

—Jiyuwa'jsa ũsçxa', jiyune'kwe jĩk.

⁹ Txajũ' txãa yakh u'jusawe'sxa' Jesusa's pějxtxi txãa ejemplo's ma'jĩnitewa jiyuya'.

¹⁰ Aça' Jesus pasçxa' na'jĩk:

—Dxus jxkaahni ensu ma'wẽ yũuwa'ja'swa kim yuhwa jiyunimeesa's i'kwe'sx yuutxi's āate kaajiyu'ju'nja. Nawa vxite yuutxi' ejemplo yakhçxáath pta'sxi', kxah makwe uyçxawa, uysamée na'wẽçxáa neeyũutxna. Sa' pta'sxni's wẽsẽ'jçxawa, jiyumée neeyũutxna.

¹¹ Naa ejemplo' na'wẽsa': Skuutxh fxiwa' Dxus yuwe jĩni'.

¹² Aça' maz nxinx dxi'jsu ũsxisá', nasa Dxus yuwe's wẽsẽ'thewa eçxthẽ'ja' kutxi'jina wẽsẽ'jçxa yu'akhni's jĩni'. Txã'wẽ Dxus yuwe's ũusuh kutxi'the', txãawe'sx ũusa' vxituna.

13 Aça' maz nxinx kwet-su ũsxisá', nasa Dxus yuwe's jxpa'gaçxa maz en yu' weçxana wēsē'jna fxi'zetzna. Nawa ũuste ew yu'akhmееçxa', thēysa nxusu en pa'theçxáa, Dxus tasxu ki' txuteetzna jīni'.

14 Aça' maz nxinx çhūçh ksxavxysu ũsxisá', nasa wēsē'jçxawa, naa kiwetewe'sx ji'phu wēeniçxá's yajkxna pa'pçxuna ewmeesuçxáa weçxweçxa fxi'zesa jīni'. Sa' Dxus yuwe's peçxkanatxna, aça' kxul íiçxáa yuuna.

15 Nawa nasa ũus ewsa Dxus yuwe's jxpa'yakx wēsē'jçxa nwēesē'jna Dxus yakhçxáa u'juçxa', kīhsuwa ewçxáa yūuna fxi'zena, txā' maz nxinx yu' kiwe ewsate ũsxisáa na'wēta'.

Āate jiyuwa'j yu' neeyūuwa'jsamée
(Mr 4.21-25)

16 Lampara's atūu dxiite aphçxa txajxa' txā'wē ya'pki'taçme'. Wejxwa ēetek ya'txaja' eena' kweethkahn, kxah maawa u'kasa' eena'te u'kakahn.

17 Makwe paaçte sūthnisaçxawa, kīh yuhwa āate vxyaamée yu' neeyūuwa'jme'. Sa' makwe ũusteçxáa yaakxnisa'swa, kim yuhwa āate jiyu-nimée yu' neeyūuwa'jme'.

18 Txā'wēyā'the', ew mwēesē'jwe. Maawa wa'lmée wēsē'the', jxthaakwe kaajiyu'juna Dxusa'. Nawa wēsē'jya' wa'lsa's, kaajiyu'jnimée yuuna. Jxuka kusa'jni yuuna.

Jesus nĵĵ vxite' txajx nyakhwe'sx
(Mt 12.46-50; Mr 3.31-35)

19 Txajũ' Jesus ũsnite pa'jtx njĩ'j vxite' nyakhwe'sx. Nawa nasa wala ũste', Jesus tasxte utxaaya' ājāmeeta'.

20 Aça' kxtee ũssa teeçxa' Jesusa's pta'sxku na'jĩna:

—Iidx mama, iidx nyakhwe'sx, iidx npe'sxwe'sx idxa's thegya' pa'jçxa ekate ũsta', sa' idxa's peejxta' jĩte',

21 Jesus paçxa':

—Dxus yuwe's wēsē'jçxa' kxtey yuutxna txã'wē yuusaaxaa, adx mama, adx nyakh, adx npe'sxwe'sx na'wēsata' jĩk.

Marte wejxa wala's Jesus kxuujjñi
(Mt 8.23-27; Mr 4.35-41)

22 Teeçx ente' Jesusa' txāa yakh u'jusawe'sx yakh barkote khēeçxa':

—Vxite ahn ĩkh kuten u'jwega jĩçxa' u'jtx.

23 Nawa ĩkh pxājũy u'jweçpkaçxha' Jesusa' dejt. Naapkaçxha' wejxaa wala seena' kiiteçxa, yu'a's barkote yuutaçku yu'. Aça' barko' ĩkh dxiikhē khēeya'wak yu'.

24 Txajũ' Jesusa's fxĩtxtxi na'jĩna:

—Kwe'stxxi jxpe'jsa mkiite, ĩkh dxiikhē khējēçtha'w jĩte', Jesus kiiteçxa' wejxaa wala petx ĩkh yā'jçxa yujukaathe', jxuka yujuk, aça' kĩh yuhwamée ewçxáak neeyũ.

25 Txajũ' txāa yakh u'jusawe'stxxi' na'jĩk:

—¿Mjĩçxakwe Dxusa' pu'çxhina sũhna yajxmeé? jĩte', txāa yakh u'jusawe'sxa' ũukhçxa txāawe'sx pwe'sxçxáatx na'jĩna puutx we'we':

—Naa piçthē'ja' ¿kimki açki'tx wejxaa wala ĩkh txã'wēsa yuhwa nwēese'je'? jĩ'tx.

*Gadara kiwetewe'sx eçx iiyamunisa
(Mt 8.28-34; Mr 5.1-20)*

²⁶ Txajũ' pejka Gadara kiwete pesahtx Galilea ìkh kuteju.

²⁷ Aça' Jesusa' txãa kiwete pa'jaçte', kxte' teeçx çxhabuwe'sx piçthê'j kasejk Jesus yakh puutx uyya'. Txãa piçthê'ja' wala txaçxyã'j eçx luuku vxitni u'ju'k. Sa' ropa athmée yattewa u'psameek yu', naasáa uusáa pedaní kwet kafxsuçxáak u'psa yu'.

²⁸ Sa' Jesusa's uyçxa', tasxte peejxũkweçxa', na'jĩnak suhs we'we:

—Jesus, Dxus ìtxisa Nçxi'k, adxa'sa' çkĩhga yũu wějê'? Adxa's nxuste ũswa'the akhkahmén pxthaath we'we' jĩk.

²⁹ Jesusa' txãa eçx luuku vxit-sa's ũusu kaseh kajaçku yu', txãa pa'gak txã'wě we'we'. Txãa eçxa' ũuste khêeçxa nasa's luuku vxitpa'gatx, kadenaju kuse petx çxida yã'jçxa tud wée. Nawa kĩh yuhnawa weji'meek çxuktede'. Txã'wě yuuçxak txãa eçx luuku vxit-sa' nasa u'pnimeesu jxũna u'jwe' txãa piçthê'ja's.

³⁰ Txajũ' Jesusa' txãa eçxa's pějxku:

—çKĩh yaasega? jĩte':

—Legion yaaseth jĩnak pas.

Txãa piçthê'j ũuste wala kuh eçx khêeçxa ũsu'tx, txãasak legion yaaseth jĩna pas.

³¹ Sa' txãa eçx luuku vxit-sa' Jesusa's px-thaa we'wetx kafx wala seena' ũukhũukhsakhê akhkahmén.

32 Sa' kxsũ thã'jsũ kuçxi wala ùsu'tx aphna, aça' txãa kuçxi ùssu khēeya' u'jwaja'stxi Jesusa's pējx pxthaa we'wena. Aça' Jesusa' kuçxi ùssu khēeya' u'khaakh.

33 Txajũ' txãa eçx luuku vxit-sa txãa piçthē'j ùssu kasehçxa, kuçxi ùssu khēete', txãa kuçxi' penxakhē peluçxa, ìkh walakhē khēeçxa jxuka uutx.

34 Aça' kuçxi thegsa' txã'wē yūute uyçxa', ùkhçxa pta'sxya' wala dud u'jtx çxhabna vxite' çxhab peeku'jsuwa jxuka.

35 Aça' kīh yūutewa uyya' nasa' thegya' pa'jtx. Sa' Jesus ùsnite kūhçxa', uytxi eçx luuku vxit-sa' txãa piçthē'j ùssu jxuka kasehte', Jesus tasxte wēt yã'j ropa athçxa kaçxçxa u'pte. Sa' wala ùukhtxi.

36 Aça' txãa piçthē'j eçx luuku vxitnisa' ma'wē yūuçxa katxhitewa uysa' kxtee thegya' pa'jsatx pta'sxtxi.

37 Txãa pa'gaçxáa Gadara kiwesuwe'sx jxukaysa ùkhçxa Jesusa's txãa kiweju kasehna u'khaahtx. Txã'jĩyã'the', Jesusa' barkote khēeçxa ki' sxawedku.

38 Aça' txãa piçthē'j luuku vxitnijũ katxhisa' Jesusa's pxthaa we'wek pe'jçxa u'khan. Nawa Jesusa' txajx yatnak u'khaah na'jĩna:

39 —Iidx yatna sxawedna me'j, sa' mtuuthe'j idxa's Dxus na'wē ew yūuni's jĩte', txãa piçthē'j u'jçxa', çxhabsu jxuka pta'sxku Jesus ma'wē ew yūuni'swa jxuka.

*Jairo niisa vxite' Jesus atxhte jxa'dxsa
(Mt 9.18-26; Mr 5.21-43)*

40 Txajũ' Jesusa' Galilea kiwetey ki' sxawedna pesathe', nasa ũythāsna ũssa' wala weçxana jxpa'gatx.

41 Kxte' teeçx piçthē'j judiwe'sx pkhaakhen-ite npiičthē'jsa Jairo yaasesak pa'j. Sa' txāa piçthē'ja' Jesus tasxte peejxūkweçxa', pxthaa we'wek txajx yatna yuukahn.

42 Kxtee yu' txajx niisa teeçxçxáasa doce anxu ji'phsa āçã'çxa uuwa'theçxáa yā'kh ũs yu' naa pa'ga. Aça' Jesusa' u'jweçte', txāa yakh u'jsa nasa wala kuh dxi'the utaçxáatx u'jna ũsu'.

43 Txāa nasa kuh ksxavxyte teeçx u'y doce anxu yā'j kakwe yu' vxyaate āçã'sak kaseh. Sa' txāa u'ya' txajx vxyu's jxuka pebak yu'çe'jsatx dewena, nanwa maa yuhwa nuykatxhiya' ājāmeeta'.

44 Aça' txāa u'ya' Jesus e'ste utxaaçxa, atxh vxixkhē kpaajxa'dxku, naapkaçxha' txāa dudtey kakwe yu'a' yujuk.

45 Txajũ' Jesusa' paapējxku:

—¿Kimga adxa's jxa'dx? jīna.

Aça' jxukaysa: Maa yuhwa jxa'dxmeetha'w jīte', Pedro vxite' txāa yakh u'jusa' na'jītx:

—Nasaa ksxavxyte zuuna'çxáa u'jna ũsgu sayuja' ¿ma'wēga kimga jxa'dx jīna pēyi'? jīte',

46 Jesus pasçxa':

—Teeçxsa adxa's jxa'dxyujk, txā'wē adxa's jxa'dxpa'gaçxáa āçã'çxawa katxhiçxak neeyūu adx pu'çxte jīk.

47 Aça' txāa u'y ma'wē yūuni'swa Jesusa' jiyute', txajx tasxte ũukhna yayana kūhçxa peejxūkwek. Sa' nasaa dxi'pte jxuka pta'sxku

ãã'çxa Jesus atxhte jxa'dxçxa' txãa dudtey katx-hiçxa neeyũuni's.

⁴⁸ Txajũ' Jesus we'weçxa':

—Katxhi'nja sũhçxane'kwe adx tasxte txã'wẽ yũuya' yuwé' txãa pa'ga açxha' katxhi'kwe neeyũu na' weçxana me'jwe jĩk.

⁴⁹ Kxtee nee Jesus we'wena ũsíyna, judiuwe'sx pkhaakhenite npiiçthẽ'jsa Jairo yatu yuusa teeçx pa'jçxa', Jairo's pta'sxku:

—Iidx niisa' uuyã'kh, aça' Jesusa's kuçx pe'jna yuunu jĩte',

⁵⁰ Jesus wẽsẽ'jçxa':

—Nxusnu, adxçxá's myajkx aççxáa iidx niisa' katxhina jĩk.

⁵¹ Txajũ' Jairo yatte pa'jçxa', vxite yuutxi' ka'ga'jmée, naasáa Pedro, Jakobo, Juan, vxite' kna'sa neywe'sxtxiçxáak ka'ga'j.

⁵² Kxte' nxus we'wena ũ'nenatx ũsu'. Nawa Jesus we'weçxa':

—Ũ'nenuwe, txãa kna'sa' uunime', naasáa deeniçxá' jĩte',

⁵³ kxtee ũssa' npeevxysxijkatx, uuníi ũste txã'jĩpa'ga.

⁵⁴ Txajũ' Jesusa' uuniisa's kuseju pu'kisna' suh-sku we'we:

—Kna'sa, mkiiteçx jĩna.

⁵⁵ Naapkaçxha', dudtey ãtxĩ yuuçxa kiitek, aça' Jesusa' puuçkaakh.

⁵⁶ Aça' neywe'sxa' wala kuh yajkxna weçxana thegtxi. Nawa Jesusa' maa yuhtxwa pta'sxkaahme' txã'wẽ uuniitewa ãtxĩ vxitni's.

9

Docesatx Dxus yuwe's pta'sxya' kaahni
(Mt 10.5-15; Mr 6.7-13)

¹ Jesusa' txāa yakh u'jusa docesatx kxteeçxah pa'yaçxa' kīh weete āçã'satxwa nuykatxhiya' ājāwa'ja's ũsku, eçx luuku vxit-satxwa nasa ũusu kutxi'khan.

² Txā'wē yuuçxak kaah Dxus jxkaahwa'j ena's pta'sxna āçã'satxwa nuykatxhikahn.

³ Sa' na'wēk yu'kxpeh:

—Dxi'the kīh yuhwa jxūmée me'jwe khāabu, ya'ja, vxyu, kaame txā'wēsax. Kmiisa yuhwa e'z yu' jxūçxa u'jnuwe.

⁴ Maa yatte paadejxa' pa'jyā'jçxa', kxteeçxāa paadehna ũsune'kwe txajū ki' kasehna u'phkaçx.

⁵ Maa çxhabteya' i'kwe'sxtxi jxpa'gameete', i'kwe'sx çxideate kiwe tuhda's sakweekweçxa kasejene'kwe, kxah Dxus yuwe's makwe jxpa'gameeçxawa, yuuwesa yuutxna jīnak yu'kxpeh.

⁶ Txajū' txāawe'sxa' kasehçxa', çxhab le'çxsū mtee mteewa jxuka Dxus yuwe's pta'sxna āçã'satxwa nuykatxhinatx pekūh.

Juan Bautista uuní
(Mt 14.1-12; Mr 6.14-29)

⁷ Txajū' ne'jwe'sx Herodesa' Jesus kījkihwa ew yūuni's jiyuçxa', wala kuh yajkxku, txā'wē maai' yu' Juan Bautistane' uuçxawa ki' itxī yuu jī'tx txāa pa'ga.

⁸ Aça' vxite yu', Dxus yuwe's pta'sxsa Eliasne' ki' vxyaa jī'tx. Naapkaçxha' vxite we'weçxa':

Dxus yuwe pta'sxsawe'sx jwee yaçğaywe'sxne' ki' ãtxĩ yuu jĩ'tx.

⁹ Nawa Herodes yu' na'jĩ'k:

—Adxĩith Juan Bautista txhikha's kaaspẽ'the'j txãana. Txãameeçxa' jwee yu' çkimçxah txakwe kĩjkĩhwa yũuya' ãjãkx? jĩ'k.

Txãasak Herodesa' txakwe uy wějě' Jesusa's.

Cinko mil nasatx Jesus sã'jĩni

(Mt 14.13-21; Mr 6.30-44; Jn 6.1-14)

¹⁰ Jesus kaahnisawe'sxa' ki' sxawedna pa'jçxa', txãawe'sx kĩhçxahne'ta yũu txã'sna pta'sxtxi Jesusa's. Txajũ' Jesusa' txãawe'sxçxáatx fxi-ite pe'jna u'kh Beçaida çxhab ja'dasu nasa u'pnimeesu.

¹¹ Nawa nasa' jiyuçxa', txãawe'sxwa Jesus e'stey u'jtx. Aça' Jesusa' jxpa'gaçxa', Dxus ma'wě jxkaahwa'ja'swa pta'sxku sa' ãçã'satxwa nuykatxhik.

¹² Txajũ' kusuçte', Jesus yakh u'jusawe'sx docesa' na'jĩtx Jesus tasxte utxaaçxa:

—Nasatxi' mkaah, çxhabsu paadee yat-su ũ' weyçxa ũ'kahn. Txã'wěme' ayte' nasa yat utx-ameesũ ũstha'w jĩte',

¹³ Jesus pasçxa':

—I'kwe'sxĩwa mpuuçwe jĩk. Aça' txãawe'sx pasçxa':

—Tahç pan, e'z wedxçxáa ji'ptha'w. Kwe'sxa' çxhabna weyya' u'jmeete yu', ãhmeena naazkuẽesatx puuçwa'j jĩtx.

¹⁴ Nasa yu', piçthẽ'jçxáa cinko mil ãhtx yu'. Nawa Jesusa' txãa yakh u'jusawe'sxtxi' na'jĩk:

—Cinkwenta txuhdeçxa fxiifxii txaksu mkaaçxi'jwe jïte',

¹⁵ txãawe'sxa' txã'wëy nasatx jxukay kaykaçxi'tx.

¹⁶ Txajũ' Jesusa' tahç pan e'z wedxtxi jxpa'gana'wa cielute pagayçxa, Dxusna weçxana orãyku. Sa' pe'ltedeçxa txãa yakh u'jusawe'sxtxi ũsku, nasa jxukaysatx ũsu'skahn.

¹⁷ Txajũ' jxukaysa ũ'çxa txikte', kijxasaatx doce kanastate utatx pkhakh.

Pedro' jiyuk Jesusa' Dxus tasxu yuusaatewa

(Mt 16.13-19; Mr 8.27-29)

¹⁸ Teeçx ente Jesusa' txãa yakh u'jusawe'sx yakhçxãa fxii txuteena u'jçxa Dxusna orãyna u'pçxa', txãawe'sxtxi pëjxku:

—Nasa' adxa'sa' çkimna jï'ta? jïte',

¹⁹ txãawe'sx paşçxa':

—Maaï': Juan Bautistana jï'tx. Vxite': Eliasna jï'tx. Aça' vxite yu': Dxus yuwe pta'sxsa txãniiteywe'sx uuniiçxawa itxï yuusaana jï'tx jïte',

²⁰ Jesus pëjxçxa':

—Txajũ' i'kwe'sxa' adxa'sa' çkimna sũjũ'kwe? jïte', Pedro paşçxa':

—Idxa' Kristo, Dxus tasxu yuusag jïk.

²¹ Txajũ' wala neewe'wek Jesusa' Dxus tasxu yuusa Kristo' jïna maa yuhtxwa pta'sxkahn.

Jesusa' txajx uuwa'ja's pta'sxni

(Mt 16.20-28; Mr 8.30-9.1)

²² Txajũ' na'wëk pta'sx:

—Dxus Nçxi'k Nasa Yuusá' wala pkuuuni yuuwa'ja's jxpa'gawa'j pejka peejxyuja',

txãa pa'ga judiu nthê'jsawe'sx vxite' sacerdote npiiçthê'jwe'sx vxite' Dxus leya's kaapiya'jsawe'sx ahçeçxa ikhetxna. Nawa uuçxawa tekh ente' ki' ãtxĩ yuuna jĩnak pta'sx.

²³ Txajũ' jxukaysatx na'jĩk:

—Maawa adx yakh yuu wẽeçxa', peekx kakwe jxthãasni's kĩhnawa jxuka nvxihtçxa yuuçxãa adx yakh yujxa' ãjãne'kwe, makwe pxthaa yu-uwa'j seena'sa een isa ma'k pa'jnawa txã'sa' ũukhmée.

²⁴ Maa nasawa naa kiwete ãtxĩ fxi'zewa'jçxá's ya'nwe'wesa' Dxus yakh fxi'zewa'j yu'sa' ivxiituna. Nawa maa nasawa adx yakh fxi'zepa'gaçxãa naa kiwete ãtxĩ fxi'zeni's yajxnmée ivxiitusa', Dxus yakh fxi'zewa'j yu'sa' ivxiitumeena.

²⁵ Nasa' naa kiwetewe'sxçxá's jxuka knayçxa', txajx ũus yu's ivxiitute', çkĩhte selpiikx, peekx ũus yu's nwe'wemeete'?

²⁶ Maa nasawa adxa's jxpa'gaya' wa'lna adx pta'sxnitxwa wa'lutxna aç'a' Dxus Nçxi'k Nasa Yuusaawa adx Tata eena' kweethniite Dxus angeleswe'sx yakh jxkaajxa' kĩhçxa', txã'wẽ yũusatxi' jxpa'gaya' wa'luna.

²⁷ Isath we'we', ayte ũssa uuméy uyuune'kwe Dxus jxkaajxa' kĩini's jĩk.

Jesusa' zhiçxkwe yu'pthehçxa vxyaani
(Mt 17.1-8; Mr 9.2-8)

²⁸ Txã'wẽ we'weni teeçx ki'su skhẽwniite', Jesusa' thã'the orãyya' u'kh Pedro, Jakobo, Juan txãawe'sx yakh.

29 Jesusa' orãyna u'piyna, txajx dxi'pa' fxiyku zhiçxkwe yu'ptheh, açã' txajx athni ropawa txã'wëytxi çxihme kwehnesa yuu.

30 Txajũ' txãa yakha' e'z piçthê'jtx puutx we'wena vxyaa, teeçxsa' Moises vxite' Elias txãawe'sxtxi yu'.

31 Jxuka zhiçxkwe eena' kweethni pxãhte Jesus ma'wê nxus pxthaa yuuçxa Jerusالente uuwa'ja'stxi we'we'.

32 Pedrowe'sxa' wala dee wëeçxawa, dehmée u'pçxa' uytxi, Jesus eena' kweethni vxite e'zsa txãa yakh üssatx.

33 Txajũ' txãa e'z piçthê'jwe'sxa' Jesusa's txu-teena u'jweçte', Pedro' na'jĩk:

—Ayte' kwe'sx üswa'j wala ewa', açã' tekx wa' txajaga, teeçxsa' iidx jĩi, vxite' Moises jĩi, vxite' Elias jĩi jĩk.

Nawa Pedro' üus yuu yajkxméy we'wesaçxáak yu'.

34 Naapkaçxha' tãaph kĩhna'wa, jxuka aphku. Açã' wala üukhtxi tãaph dxiite neeyüuçxa.

35 Txajũ' tãaph dxiiju na'wêk we'we:

—Na' adx Nçxi'k wala wedxnisa', açã' txã'sa' nwëesê'jna kxtey myuuwe jĩnik pthũuse.

36 Txã'wê we'wenijũ', Jesusçxãa yã'j üstetx uy. Sa' txãawe'sxa' sxuuna'tx neeyüu, sa' txãn ensu' kim yuhtxwa pta'sxmeeta' txã'wê uyni's.

*Teeçx luuçx wëeçxpa'jsa's Jesus nuykatxhini
(Mt 17.14-21; Mr 9.14-29)*

37 Sa' kuskuus enkhê', thã'ju kĩaçte', nasa wala kuh Jesusa's pu'thegya' kasehtx.

³⁸ Aça' teeçx piçthê'ja' nasaa ksxavxyte ùssa' sus we'weçxa':

—Adx nçxi'k teeçxçxáa ji'pthu txã'sa' meen theg.

³⁹ Txã'sa' eçx luuku vxit-sa uweçxa kay-wêçxpa'ja'jna kweeyi'jna wala pkxu'k sa' tx-hwete wêjë'çme'. Txã'wê yũute', yuwesu bu'çxçxáak sêjë'.

⁴⁰ Idx yakh u'jusawe'sxtxi' pxthaa we'weyã'th, txãa eçxa's adx nçxi'k ùusu kutxi'khan. Nawa txãawe'sxa' ãjãmeeta' jíte',

⁴¹ Jesus pasçxa':

—Dxusa' pu'çxhina sũhwa'j yu'sa' ji'phmeesata' naa nasa'. ¿Bagaçxpkaçx i'kwe'sx yakh pu'çxna ùs ya'watka? ¿Bagaçxpkaçx ãjãmée fxi'ze ya'wakwe? Mneejxũh iidx nçxi'ka's jíte',

⁴² txãa piçtakxa' Jesus tasxte utxaana kũjũçpkaçxha', txãa eçx luuku vxit-sa' kaywêçxpa'ja'jçxa pêtçku. Nawa Jesusa' juuna' we'weçxa eçx luuku vxit-sa's ùusu kutxi'the', txãa piçtakxa' ew katxhik aça' Jesusa' neya's dukhku.

⁴³ Aça' Dxus txakwe wala ew yũute', jxukaysa wala kuh yajkxtxi.

Jesusa' txajx uuwa'ja's ki' pta'sxni

(Mt 17.22-23; Mr 9.30-32)

Na'wê yũuni's nasa wala kuh yajkxna ùspkaçxha', Jesusa' txãa yakh u'jusawe'sxtxi' na'wêk we'we:

⁴⁴ —Na'sa' ew wêsê'jçxa peçxkananuwe: Dxus Nçxi'k Nasa Yuusá's nasa ewmeesa kusete dukhni yuuwa'ja' jítewa,

45 txãa yakh u'jusawe'sx yu' jiyuya' ãjãmeeta', txãawe'sx jiyuwa'jmeene' yu' naa pa'ga. Sa' txã'wẽçxawa pẽjx yu' meeta' ũukhçxa.

*Kim wejx jxthaakwe jxtuhthesakx
(Mt 18.1-5; Mr 9.33-37)*

46 Txajũ' Jesus yakh u'jusawe'sxa' txãawe'sx pwe'sx puutx paapẽyi'tx:

—Ayte' kwe'sx pwe'sx çmaa wejx jxthaakwe walasakxtha'w? jĩna.

47 Nawa kĩh yajkxçxa txã'wẽ puutx we'weçtewa Jesusa' jiyuçxa', teeçx luuçxkuẽ's txajx pukate txahçxa' na'jĩk:

48 —Adxa's wedxsa' maawa naa luuçx na'wẽsatx ahçemée jxpa'gasa', adxa's jxpa'gasa yuutxna. Sa' adxa's jxpa'gasa', adxa's jxkaahsanawa jxpa'gasa yuutxna. I'kwe'sx pwe'sx maa txã'wẽ ãhmeekwesa na'wẽ yajkxna fxi'zena txãa yuuçxáa jxthaakwe walasa yuuna jĩk.

*Kwe'sxtxi açesamée yu' kwe'sx yakh
fxi'zesatxna*

(Mr 9.38-40)

49 Txajũ' Juan we'weçxa':

—Kwe'sxtxi jxpe'jsa mwẽese'j. Teeçx piçthẽ'j iidx yase's kxsusçxa eçx luuku vxit-sa's nasaa ũusu kutxi'jiçte kwe'sxa' uyçxa', txã'wẽ yũunu jĩnatha'w we'we, kwe'sx yakh u'jusameek yu' naa pa'ga jĩte',

50 Jesus paççxa':

—Maawa kwe'sxtxi açewe'wesamée yu' kwe'sxtxi pu'çxsa íçxáatxna, aç'a' txãawe'sxtxi' kuçx txã'wẽ yuunuwe jĩk.

Juanwe'sx cieluju ipx kaak̄ji'j wēeni

⁵¹ Txajũ' Jesus cielun u'jwa'j en utxaaçte', ũukhmée Jerusalen çxhabna u'jya' kasejk.

⁵² Sa' u'jweççxa', yaçte yuwe kaakh, aça' txãawe'sxa' Samaria kiwete teeçx çxhabetex deewa'j yat pakweya' u'j.

⁵³ Nawa txãa çxhabetewe'sxa' Jesus Jerusalenna u'jweçte uyçxa', jxpa'ga wēemeeta'.

⁵⁴ Txajũ' txã'wē yũute', Jakobo, Juanwe'sxa' Jesusa's na'jĩtx:

—Kwe'sxa' cieluju ipx kaak̄ji'jçxa txãa nasatxi' peba jxthãaswaça', kwe'sxa' kxtey yu'nja'w Dxus yuwe pta'sxsa Eliaswa ma'wēga yũu txã'wēy jĩte',

⁵⁵ Jesusa' thegçxa' na'jĩnak yu'kxpeh:

—I'kwe'sxa' jiyu'çmeei'kwe ma'wē yũuwa'ja'swa.

⁵⁶ Dxus Nçxi'k Nasa Yuuçxawa, adxa' nasatx pebaya' yuwe'çmeeth, naasáa nwe'weçxa ewte nvxiht-ya'çxáath k̄ih j̄ik.

Txajũ' vxite çxhabnatx u'j.

Jesus yakh fxi'ze wēesa

(Mt 8.19-22)

⁵⁷ Txãawe'sx dxi'the u'jweçte', teeçx piçthē'j Jesusa's na'j̄ik:

—Jxpe'jsa, idx yakh yuu wēeth, idx mtee u'jweçtewa jĩte',

⁵⁸ Jesus pasçxa':

—Yu'kh niimal yuhwa deewa'j kafx ji'phta', aça' vxiçxakuēwa yat ji'phta'. Nawa Dxus Nçxi'k Nasa Yuusa' mtee yuhwa txajx dxiktheçxáa yuja'swa khikhwa'j ji'phme' j̄ik.

59 Txajũ' Jesusa' vxite's pa'yak:

—Adx yakh myuh jīna.

Aça' txāa pasçxa':

—Jxpe'jsa, mūythās, adx tata khuẽ'yna pedaaya' u'jweçthu jīte',

60 Jesus pasçxa':

—Uusaawe'sxa' peekx uusáa pwe'sx ya'pedaatxna. Aça' idxa' Dxus jxkaahwa'j ena'sçxáa pta'sxya' me'j jīk.

61 Txajũ' vxite' na'jīk:

—Jxpe'jsa, adxa' idx yakh yuu wēeth, nawa adx yattewe'sx khuẽ'ytxi neewe'weya' u'jweçthu jīte',

62 Jesus pasçxa':

—Maawa mjīia's takhçxaçxáa e'su yu' thegsa' selpimeena Dxus ma'wē jxkaahwa'ja'swa pta'sxya' jīk.

10

Setenta nasatx Jesus kaahni

1 Txāa e'su' vxite setenta txhitxhçxa, e'z e'zku yaçte kaah, txajx pa'jwa'j çxhabsu mteewa jxuka.

2 Sa' na'jīk:

—Isa mjīiwa'ja' wala yuh ūsa', nawa mjīisa yu' kuhmeeta'. Aça' mjīi namu's pxthaa we'wena mpējxwe nasa mjīiwa'jsa txajx mjīitewe'sx.

3 I'kwe'sxa' jxpa'yakx me'jwe, piisxakuētx alum ksxavxysu na'wē kajaçthu naa pa'ga.

4 Ya'ja, vxyu, pelgatxi txã'wēsa jxūmée me'jwe. Sa' dxi'the nasa pu'jykhēw yuhçxawa weçxana jxthēyuumeene'kwe.

5 Kiim yatte pa'jçxawa, ewçxáa we'wena weçxana pa'jane'kwe.

6 Aça' txãa yattewe'sx açesameeçxa', txã'wẽ weçxana pa'jni's ewçxáa jxpa'gatxna. Nawa jxpa'gameete', txajũ ki' u'jwene'kwe.

7 Sa' mtee ew jxpa'gatxna, txãa yatte paade-jene'kwe, txãawe'sx kĩh sã'jĩni'swa ã'na, txãa pa'gatey mjĩisa' ã'wa'ja's jxpa'gawa'j ji'pha'. Aça' i'kwe'sxa' yat iisa paadehna pekũhnuwe.

8 Maa çxhabetewe'sx i'kwe'sxtxi jxpa'gate', kx-tee ã'sune'kwe kĩh puuçtewa wa'lmée jxpa'gana.

9 Sa' kxtee açã'satxwa nuykatxhiçxa na'wẽ pta'sxine'kwe: Dxus jxkaahna pa'jwa'j ena' i'kwe'sx yakh utxa ãsa'.

10 Nawa maa çxhabetewa i'kwe'sxtxi jxpa'gameete', txãa çxhabte jxuka na'jĩne'kwe:

11 I'kwe'sxa' jxpa'gameeçxawa yuuwesa yuukahn i'kwe'sx çxhabte kxtã'tuhd yuhnawa sakweekweçxa u'jweçtha'w kwe'sx çxidate uweni's. Sa' makwe jxpa'gameeçxawa, jiyuçxa neeyũuçi'kwe: i'kwe'sxtxi Dxus jxkaahna pa'jwa'j ena' utxa ãsa' jĩne'kwe.

12 Na'jĩ'th na': Dxus kastigãywa'j ente', txãa çxhabetewe'sxa' Sodoma çxhabetewe'sxte jxthaakwe nxus ya'kastigaĩtxna.

*Çxhab nwěese'jsamée yakh ãukhũukhsa
(Mt 11.20-24)*

13 Korazín çxhabte nasa, Beçaidatewe'sx yã'jçxa, seena' yuh nxuste neeyũuwa'ji'kwe. Ayte i'kwe'sx dxi'pte na'wẽth açã'satx nuykatxhina uusáatx fxĩtxna yũu na' Tiro vxite' Sidon çxhabetewa txã'wẽy yũuwaça',

txãawe'sxa' pkaltxi nvxihtçxa Dxus tasxte
sxawedni txaçxyã'j yuuna.

14 Dxus kastigãywa'j ente', Tiro vxite' Sidon
çxhabte nasate jxthaakwe i'kwe'sxa' nxus
kastigo's knayuune'kwe.

15 Aça' Kapernaum çxhabtewe'sxa' cielute
u'jwa'jsath sũhna i'kwe yaaki', nawa infxiernote
khẽeya' u'jwa'jsai'kwe.

16 Txãa çxhabtxi' txã'wẽ we'weçxa', setenta-
sawe'sxtxi' na'jĩk:

—Maa nasawa i'kwe'sx pta'sxni's wẽsẽ'jçxa',
adxa'swa nwẽesẽ'jsa yuutxna. Sa' maawa
i'kwe'sxtxi açesa', adxa'swa açesa yuutxna. Sa'
adxa's açesa' adxçxáana ahçemée adxa's kaah-
sanawa açesa yuutxna jĩnak jxkaah.

Setentasawe'sx ki' sxawedni

17 Txajũ' setentasawe'sxa' wala weçxana ki'
sxawedtxi na'jĩna:

—Eçx luuku vxit-sa yuhwa idx pu'çxte',
kwe'sxtxi' nwẽesẽ'je'tx jĩna pta'sxte',

18 Jesusa' na'jĩk:

—Isa yuh pta'sxi'i'kwe adxa' uythu eçxthẽ'ja'
cieluju kpi'sx kwehneni na'wẽ wetena kĩaçte.

19 I'kwe'sx txã'wẽ yũukahn iĩçxáath adxa'
kĩhtewa jxuka ajãwa'ja's ũs, ul weeswée usmitx
kĩjkĩh eçx seena'sawa i'kwe'sxtxi kpã'vxit-ya'
ajãkahmén.

20 Nawa eçx luuku vxit-sa i'kwe'sxtxi
nwẽesẽ'pha'gaçxáa yu', weçxweçxa yaakxnuwe.
Naasáa cielute i'kwe'sx yase fxi'jni ũsa' txãa
pa'ga yuuçxáa weçxweçxa myajkxwe jĩçxa',

21 Jesusa' txajx ũuste wala weçxak txã'wẽ Dxus Espiritu pu'çxpa'ga. Sa' na'jik:

*Jesus ũuste wala weçxweçxa yaakxni
(Mt 11.25-27; 13.16-17)*

—Tata, idxa's wala weçxa'th, idxa' cielute vxite' naa kiwete jxuka Namug. Txãasag naa kiwete wala jxtuhtesa yuutxi's kaajiyu'jmeeçxawa, ãhmeekwesa yuutxi's jiyuwa'ja's ũsgu. Iidx jxthãasni' txã'wẽne' yu' açá' txã'sa' kxtey yuug.

22 Adx Tata' kĭjkĭhtewa jiyuwa'ja's adxçxaçxá'sku dukh. Txãa pa'ga kim yuhwa jiyu'çmeeta' Dxus Nçxi'ka's, naasáa Ney yuuçxáa jiia'. Txã'wẽy Tata'swa kim yuhwa jiyu'çmeeta', naasáa Nçxi'k yuuçxáa jiia', sa' maatxwa Nçxi'k íi khiyu'theçxáa jiyuya' ãjãtxna adx Tata's.

23 Txã'jĭçxa' txãa yakh u'jusawe'sxtxi thegçxa', na'jik txãawe'sxçxáatx:

—Ãçxh i'kwe'sx uyna ũsi'kwe txã'sna txãawe'sx yafxju uysá' wala yuh weçxawa'j ji'phta'. Txãa pa'gatey açxh i'kwe'sx uyna ũsi'kwe txã'sa'

24 nyafxiiitey Dxus yuwe pta'sxsawe'sx vxite' jxkaahsawe'sxwa wala yuh uy wẽetx, nawa uyya' ãjãmeeta'. Txã'wẽy zhiçxkwe pta'sxni's açxh i'kwe'sx wẽsẽ'jna ũsi'kwe txã'snawa wala yuh wẽsẽ'j wẽetx, nawa wẽsẽ'jya' ãjãmeeta' jĭk.

Teeçx Samaritano ew yũusa

25 Txajũ' ley kaapiya'jsa teeçxsa Jesus tasxte utxaaçxa', ewmée vxit wẽeçxa na'wẽk paapĕjx:

—Adxa' ¿ma'wẽ yũuçxa pçumée ĩtxĩ fxi'zewa'ja's ji'phuki'th? jĭte',

26 Jesus pasçxa':

—Dxus leyte' ¿ma'wě fxi'jni ũsna açga lëeyçxa jiyu'çmée? jïte',

27 ley kaapiya'jsa' na'wěk pas:

—Idxna jxpe'jsa Dxusa's ũusuh jxuka yajkxçxa bagaçxte yuhwa peena yu' txuteeya'mée utx-aaçxa txâa yuuçxá's selpiina mfxi'ze. Sa' idx ma'wěga ya'peeygâja', txâ'wěy vxite nasatxwa mpeeygâh jï'k jïte',

28 Jesus we'weçxa':

—Ew yuh pasgu. Txâ'sa' kxtey yuuçxa', pçumée ãtxï fxi'zewa'ja's ji'phune'ga jïk.

29 Nawa ley kaapiya'jsa yu', txajx yuweteyçxâa ewmeete neeyũuyã'jçxa', na'wěk pějx:

—Txâa vxite nasa jï'k txâa yu' ¿kimtxna? jïte',

30 Jesus pasçxa' na'wěk kwentu'j:

—Teeçx piçthě'j Jerusalenu kasehçxa' Jerikon u'jni dxi'jkhě u'jweçte', peswée dxi'the yupxa' kasehtx. Sa' kïjkïhne' jxũna u'jweç yu', txâ's jxuka peswéetx. Sa' kpâ'vxitçxa', uuwa'jçxâa yã'jtx nvxiht.

31 Peswée u'jni txaçxmeyna, teeçx sacerdote kïhçxa' uyku txâa kpâ'vxitnisa's, nawa pu'çxmée dxi'j skhěwku.

32 Txâ'wěy Levxi ji'thewe'sxwa kïhçxa' uyku, nawa txâawa pu'çxmée dxi'j skhěwku.

33 Txajũ' teeçx piçthě'j Samariatewe'sx txâa dxi'khěy kïhçxa', kpâ'vxitnisa's uyçxa', wala peeygâjk.

34 Sa' kpâ'yũusa tasxte utxaaçxa', kpâ'su aceite vxino yakh awna yu'çe'kh. Txajũ' txajx a'jni

jibate yakhçxa ka'ja'kh, sa' paadee yatna pe'jna u'jçxa, kxte' kĭjkĭhwa peejxmeeek sã'jĭ.

³⁵ Kuskuus enkhê', txãa Samariatewe'sxa' u'jweççxa', e'z vxyu kutxi'jçxa, yat namu's dewek. Sa' na'wêk neewe'we: Naa piçthê'j kpã'vxitnisa's meen sã'jĭ. Meeçxa' vxyu nvxi-ituçthu txãa ähmeewáana nawa ki' sxawedna pa'jçxa, dukhe'nja txãa yuuluni's jĭk.

³⁶ Jesusa' txã'wê pta'sxçxa na'wêk pëjx:

—Idx ũus myajkx. Txãa tekhtewe'sxa' çmaasaga ew yũusana' thegu'? jĭte',

³⁷ ley kaapiya'jsa pasçxa':

—Kpã'vxitnisa's peeygãasa jĭte', Jesus pasçxa':

—Idxwa txã'wêy pu'çxna peeygãhna me'ju jĭnak jxkaah.

Maria Martawe'sx yatte Jesus pa'jni

³⁸ Txajũ' Jesusa' teeçx çxhab le'çxkuêtek pa'jya' u'j. Txãa çxhabte teeçx u'y Marta yaasesa' txajx yatte jxpa'gak.

³⁹ Sa' Marta' teeçx nyakhku ji'phu' Maria yaasesa. Aça' Maria yu', Jesus pta'sxniçxá's wësê'jya' txajx tasxte kaçxku.

⁴⁰ Naapkaçxha' Marta yu', mjĭiniçxá's wala pa'pçxuna ũsçxa', Jesusa's utxaaçxa na'jĭk:

—çUyu'çmeegá' na'wê ũ'kweçxáa wala mjĭina ũste', ũ'kwe nyakh yu' pu'çxhiçme'. Aça' mpu'çxkaah jĭte',

⁴¹ Jesus pasçxa':

—Marta, i'kwe' wala yuh kuh jwed mjĭina tudumée ũsi'kwe.

42 Nawa jxthaakwe peejxsa yu' teeçx jwed yuuçxá'. Aça' Maria' wejx jxthaakwe peejxsa's wēsē'je'ça' txã'sa' kim yuhwa kusa'jmeetxna jīnak we'w e.

11

Dxus yakh na'wē puutx we'wewa'ja'

(Mt 6.9-15; 7.7-11)

1 Teeçx ente' Jesusa' Dxusna orāynak u'pu' teeçx ahte, sa' orāyna jxã'the', txãa yakh u'jusa teeçxsa' na'jīk:

—Kwe'sxtxi mkaapiya'j, Dxus yakh puutx we'wena orāyya', Juanwa ma'wēga txãa yakh u'jusawe'sxtxi' kaapiya'ja' txã'wēy jīte',

2 Jesus paščxa':

—Dxus yakh puutx we'wena oraĩççxa', na'jīne'kwe:

Kwe'sx Tata cielute ũssa,

Idxa' bagaçxtewa wala jxtuhthesag.

Iidx jxkaahwa'j ena'sçxáatha'w ũythasu'.

Naa kiwete idx ma'wēne'ga jxthāasu' txãa yu' jxuka kxtey tee yuu cielute na'wēy.

3 Āçxh kwe'sx ũ'wa'ja's meen pees.

4 Kwe'sx ewmēe yūuni's meen peltunāi, kwe'sxwa peltunāytha'w kwe'sxtxi ewmēe yūusatx txãa pa'ga.

Ewmeete wetekahmén meen nwe'we jīna oraīne'kwe.

5 Txajū' na'jīnak we'we:

—I'kwe'sxa' namiku yatte kuspxāh u'jçxa': Namiku, tekh pan mpeeki'j.

6 Dxi'j u'jsa adx namikuk yatte pa'j, aça' kîh yuhwa ji'phmeeth puuçwa'j, ¿jîmeema'kwe kîhwa ji'phmeeeçxa'?

7 Aça' dxiiju passa' na'jîna: Adx luuçx deeni yâ'tha', aça' kuçx susnu. Naapkaçxha' vxitxwa aphni yâ'j ũsa', aça' kîh yuhwa ũsya' ewume'nja jîçxawa,

8 jwee kuçx susna nes yuukahmén kiiteçxa kîh pějxtewa jxuka ũsuna. Na'jî'th na': Namiku pa'gaçxáa kuspçâh kiiteçxa ew yũumée naasáa kuçx suskahménçxáa txã'wě yũuna.

9 Txãa pa'gath adxa' i'kwe'sxtxi Dxusna pějka'ja' aça' txã' ũsuna. Kîh peejini'swa pakweçxa' uyuune'kwe. Vxitxte pa'yate' phaadena.

10 Na'jî'th na': maawa Dxusna pějysa', jxpa'gana. Aça' pakwesa', uyuuna. Aça' vxitxte tu'kakate', phaadena.

11 Ũus miiyajkxwe: i'kwe'sx luuçx pan pějxte', ¿kweta's ũsma'kwe? Meeçxa' wedx pějxte', ¿ula's ũsma'kwe?

12 Meeçxawa ziç pějxte', ¿usmitxa's ũsma'kwe?

13 I'kwe'sxa' Dxus dxi'pte ewmeesaçxawa, i'kwe'sx luuçxtxi' ewsaçxáa i'kwe peesu'. Aça' i'kwe'sx Tata cielutewe'sxa' wejx jxthaakwe ewsa Dxus Espiritu's peesuna pějysatxi's jîk.

Dxus Espiritu's açewe'weni

(Mt 12.22-30; Mr 3.19-27)

14 Jesusa' eçx luuku vxit-sa kwe'we'jsame's piçthě'j ũusuh kutxi'the', txãa eçxa' ũusuh kasejk, aça' txãa piçthě'ja' we'weya' âjak.

Txã'wě yũute', nasa' wala kuh yajkxna neeyũutx.

¹⁵ Nawa vxite yu', na'jĩnatx we'we':

—Eçxthē'j pu'çxteçxáak naa piçthē'ja' eçx luuku vxit-satxwa nasaa ũusuh kutxi'ji' jĩ'tx.

¹⁶ Naapkaçxha' vxite yu' Jesus kĩh yũutewa jiyuya' sũhçxa cielujũ seena'sa mkaavxya'ja' jĩte',

¹⁷ Jesusa' txãawe'sx ewmée ũus yaakxni's jiyuçxa', kxtey yuumée na'wěçxáak we'we':

—Maa gobiernowa peekx nasa yakhíçxáa puiiçxa', txãawe'sx pwe'sxíçxáa jxuka pçuutxna. Maa yattewe'sxwa txãawe'sx pwe'sxíçxáa puutx puiiçxa', txãawe'sx pwe'sxíçxáa jxuka pçuutxna.

¹⁸ Txã'wěy eçxthē'jwa txãawe'sx pwe'sxíçxáa puutx puiiçxa', puutx pçuutxna. Adxa'sa' eçxthē'j pu'çxteçxáak eçx luuku vxit-satxwa nasa ũusu kutxi'jya' ājā' jĩ'i'kwe txāa pa'gath txā'jĩ'.

¹⁹ Txã'wě dxihte', i'kwe'sx yakh u'jusatxwa eçxthē'jiiçxáane' pu'çxhi' eçx luuku vxit-satx kutxi'jya'. Ew yajkxwaç yu', i'kwe'sx yakh u'jusaíçxáa i'kwe'sx jxpubani's khiyu'jwa'jsata'.

²⁰ Adxa's eçxthē'j pu'çxmée, Dxus pu'çxteth eçx luuku vxit-satx nasaa ũusuh kutxi'ji'. Isa ew jiyuwaç yu', i'kwe'sxtxi Dxus jxkaahwa'j en ājk txāa pa'ga txā'wě yũuçthu.

²¹ Teeçx piçthē'j çxhāçxhasa' kījkihwa txajx ji'phuni's ivxiituya'mée sũhçxa puiiwa'j tũ'sçxa yatte yupu'k ka'ga'jya'mée.

22 Nawa vxite wejx jxthaakwe çxhãçxhasa pa'jçxa', txãa yupsa's knayçxa puiiwa'ja'swa kusa'jna yuuçxa ji'phunitxi's txãak iiyamu.

23 Adx ju'gumée ũssa', adxa's açesata'. Aça' adx yakh pkhakh pu'çxsame' neeusaçxa txã'wẽ yuuna.

*Eçxa' nasa ũuste ki' sxawedni
(Mt 12.43-45)*

24 Eçx luuku vxit-sa' nasa ũusu kasehçxa', nasa u'pnimeesuk jxkaasewa'j pakwena u'ju'. Nawa uymeeçxa' naa sũju'k: Adx kasehni yatnay sxawedna u'jwe'nja sũhçxa

25 ki' sxawedte' txãa nasa ũus yu' yata's ew padçxa txaahni na'wẽ ũstek uyna pa'ja'.

26 Sa' u'jçxa vxite siete eçx txãate jxthaakwe ewmeesatx nuypa'jçxa, txãa nasa ũuste pejka u'katx. Aça' txãa nasa' jxthaakwek ewmeesa yuuna pa'ja'.

Kim wejx thaakwe weçxawa'jsatxki

27 Jesusa' txã'wẽ pta'sxiçpkaçxha', teeçx u'y nasaa ksxavxyte na'jĩnak sus we'we:

—Idxna kçxu'çxusa mama yakha' seena' yuh wala weçxa yuhna jĩte',

28 Jesus pasçxa':

—Txã'wẽme', wejxwa Dxus we'weni's wẽsẽ'jçxa', txajx jxkaahnitxi's kxtey yuusaa yakhçxáa seena' wala weçxa yuja' jĩk.

*Nasa ewmeesa' cieluju kĩhçxáawa
kaavxya'ja'khaahni
(Mt 12.38-42; Mr 8.12)*

29 Txajũ' nasa' Jesus we'weni's wēsē'jya' txajx tasxte pkhaakhesatxi' na'jīnak we'we:

—Nasa ewmeesa naa ensuwe'sxa' kīhçxáawa seena'sa kaavxya'ja'khaja'tx. Nawa kīh yuhwa jwee yu' kaavxya'ja'jmée, naasáa Dxus yuwe pta'sxsa Jonas ma'wēsaga yu' txã'sçxáana khiyu'the ewna.

30 Jonaswa ma'wēga Níniwe çxhabte nasa ewmeesatx khiyu'j, txã'wēy Dxus Nçxi'k Nasa Yuusaawa naa ensu nasa ewmeesatx khiyu'jsa'.

31 Naa ensu nasatx Dxus kastigāywa'j en āhte', txāniitey jxu'j kiwete jxkaahsa u'ythē'ja' āçxga nasatxi' ewmeete nvxiituna. Txāa u'ya' tx-akwe jxu'juwe'sx yuhçxawa, wa'lméek Salomon pta'sxniçxá'swa wēsē'jya' pa'j. Naapkaçxha' āçxh yu' Salomonte jxthaakwesa ayte ũsa' nawa wa'lu'tx naa pa'ga txāa u'ya' ewmeete nvxiituna.

32 Txã'wēy Níniwe çxhabtewe'sxwa Dxus kastigāywa'j en āhte', naa ensu nasatx ewmeete nvxiitutxna. Txāawe'sxa' Jonas pta'sxniçxá'swa wēsē'jçxa', txāawe'sx pkaltxi nvxihtçxa Dxus tasxte sxawedtxi. Naapkaçxha' āçxh yu' Jonaste jxthaakwesa ayte ũsa' nawa wa'lu'tx naa pa'ga Níniwe çxhabtewe'sxa' ewmeete nvxiitutxna.

Yafxa' kakwe's ewte kaafx'i'ze'jsata'

(Mt 5.15; 6.22-23)

33 Lampara's atũu dxiite aphçxa txajxa' txã'wē ya'pki'taçme', wejxwa ēetek ya'txaja' eena' kweethkahn, kxah maawa u'kasa' eena'te u'kakahn.

³⁴ Peekx kakwete yafxa' lampara na'wēsata'. Aça' iidx yafxa' suwenimée ewçxa' iidx kakwete jxuka eena' kweethna nes yuuna. Nawa iidx yafx ewmée suweniite', iidx kakwe' jxuka çxhi'dxteçxáa neeyũuna.

³⁵ Iidx kakwete kĩhte yuhwa çxhi'dxsamée jxuka eena'saçxáa ũste', jxuka ew uyuune'ga, lamparawa ma'wēga ew eena' kweethe' txã'wē.

³⁶ Nawa mpa'yajkx. Txã'wēme', eena' khikhysa ji'phgu txãa kweethmeete', çxhi'dxteçxáa neeyũune'ga.

*Fxariseo vxite' ley kaapiya'jsawe'sxtxi yuuwesa
Jesus nvxiitni*

(Mt 23.1-36; Mr 12.38-40; Lk 20.45-47)

³⁷ Txajũ' Jesusa' txã'wē we'wena jxã'the', teeçx fxariseo txajx yatte sã'jĩya' pi'kxku. Aça' Jesusa' u'jçxa ũ'ya' kaçxku.

³⁸ Txajũ' txãa fxariseo' naasũjk: Naa piçthē'ja' wala yuh fxiy yu'k kusekhē yu' kaahmée ũ'ya' kaçxku sũjũ'k.

³⁹ Aça' Jesusa' na'jĩk:

—Fxariseowe'sx i'kwe'sxa' plaatu waso ma'k yuu nawa txãa yuutxi' ekakhē yu' pkhi'khi'i'kwe. Nawa i'kwe'sx ũus dxiite yu', pesweena kījkihwa ewmeeçxáa yũunisaçxáa jxuka uta ũsa'.

⁴⁰ I'kwe'sxa' jiimeewá'kwe: Dxusa' kakwekhē āakhēwe'sxçxá's uyçxa', ũustewe'sx yu's uyu'çmeene' ¿sũjũ'wá'kwe?

⁴¹ Txã'wē kĩhwa ji'phmeesatx ũusuh jxuka peeygāhna lmusxnu peeswaça', āakhēçxáa yaatesa yuumeene'kwe.

42 Fxariseowe'sx, i'kwe'sx yakha' seena' yuh ũukhũukha', i'kwe'sxa' putatxhã', me'sukwe, kĭjkĭhwa uuthasxte ũsna txãa yu'sa' jxuka diesmo dukhçxawa, Dxus yu'sa' ũusu jxuka wedxna nwēese'jna fxi'ze'çmeei'kwe naa pa'ga seena' yuh ũukhũukha'. Diesmo's dukhwa'j yuja', nawa Dxusna nwēese'jni wejx jxthaakwe ewa'.

43 Fxariseowe'sx, i'kwe'sx yakh seena' yuh ũukhũukha', i'kwe'sxa' judiuwe'sx pkhaakhenisu kaçxni wejx ewsaçxãana i'kwe pakwé', sa' çxhabsu msuuwa ewkuëçxãa weçxa jxthãasna i'kwe pekũju' naa pa'ga seena' yuh ũukhũukha'.

44 Ley kaapiya'jsawe'sx vxite' fxariseowe'sx, i'kwe'sx yakha' seena' yuh ũukhũukha', i'kwe'sxa' äajuçxãa ew we'weçxa', ũus dxiiju yu' ewmeeçxãa yajxna fxi'zepa'ga. I'kwe'sxa' uusãa pedani kafxa's aphnisa na'wēi'kwe. Txãa kafxa's aphte', nasa' ma'wē dxiiga kĭh ũstewa jĭimée kajkwesu skhēuukx txã'wēçxãa i'kwe jiyunimeete fxi'ze' jĭte',

45 ley kaapiya'jsa paçxa':

—Kwe'sxtxig açewe'we' jĭtewa,

46 Jesusa' ki' we'weçxa':

—Ley kaapiya'jsawe'sx, i'kwe'sx yakha' seena' yuh ũukhũukha', i'kwe'sxwa vxiteçxãatx txã'wē kim yuhwa äjãwa'jmée thēysa's ũsçxa', i'kwe'sx yu', ma'wēkuëçxãa yuhwa pu'çxhiçmeei'kwe naa pa'ga.

47 Txã'wēy i'kwe'sx ji'j yaçgawe'sx txã'wē Dxus yuwe pta'sxsatx ikhçxa pedaate', i'kwe'sx yu' txãa pedani's zhiçxkwe vxitnai'kwe pheu'ju'.

48 Sa' txã'wě yũuçxa', kwe'sx jìj yaçgawe'sx ew yuh yuutx jìçxane'kwe txãawe'sx ikhçxa pedani's zhiçkwe vxitna pheu'ju' naapa'ga i'kwe'sx yakha' seena' yuh ũukhũukha'.

49 Kxajii Dxusa' txã'wě yũuni's we'weçxak na'jĩ': Adx yuwee pta'sxsa txãniitey ensuwa kaja'nja, sa' naa ensuwa kaja'nja. Nawa maaiitxi' ikhetxna, sa' vxite yuutxi' wala ahçena pkxu-utxna jĩ'k.

50 Naa ensu nasa' jxukaysa kastigo's knayu-utxna,

51 txã'wě Abela's ikhnijũjx Dxus yuwe pta'sxsatx ikhçxa Zakarias'a's ikhni entepkaçx ee pkawpa'ga. Txãa Zakarias yu'sa' dxuus yat patxute altal utxatetx ikh. Txãa pa'ga naa ensu nasatx Dxusa' kastigaĩna, txã'wě Dxus kaahnisatx ikhpa'ga.

52 Ley kaapiya'jsawe'sx, i'kwe'sx yakha' seena' yuh ũukhũukha', i'kwe'sxa' txakwe wala leya's jiiisatha'w jìçxawa, vxite yuutxi's kaapiya'ja'çmeei'kwe. Txãasa vxite jiyu wēesatx i'kwe'sxa' yupnaçxáa ũsi'kwe jĩte',

53 ley kaapiya'jsawe'sx vxite' fxariseowe'sxa' wala ũusaçxaçxa kīhçxáawa wala paapējxtxi,

54 kīhteçxáawa ewmée paste' pāatxhī'khyā' sūhçxa.

12

Fxariseowe'sx yakh jxpa'yakx fxi'ze kaahni

1 Txajũ' nasa iiméh seena' wala pkhaakheçxa jxuka utate', Jesusa' txãa yakh u'jusawe'sx khuē'ytxi na'wěk we'we:

—Fɣariseowe'sx ewmée yũuna fxi'zeni's mpa'yajkxwe. Txã'wême' txãawe'sxa' ãajuçxáa ew we'weçxa', ũus dxiite yu', ewmeeçxáatx yaaki'.

² Nawa makwe paaçte sũthnisaçxawa kĩh yuhwa ãate vxyaamée yu' neeyũumeena, sa' makwe ũusteçxáa yaakxnisawa kĩh yuhwa jiyu-nimée yu' neeyũumeena.

³ Txãa pa'ga i'kwe'sxa' kim yuhwa wēsē'jnimeete wá'kwe we'we' nawa jxuka pthũusena. Meeçxa' i'kwe'sx ũusteçxáa wá'kwe ewmée yajkx, nawa maazkuēe yat-suwa jxuka kaajiyu'jni yuuna.

Kimna wejx ũukhwa'jcx
(Mt 10.28-31)

⁴ ãçxha', adx namiku i'kwe'sxtxi na'jĩ'th: Kakweçxá's ikhsatxi' ũukhnuwe. Txãawe'sxa' kakweçxá's ikhçxa', jwee yu' kĩhwa yũuya' ãjãmeetxna.

⁵ Nawa pta'sxiçthi kimna ũukhwa'thewa: Naa kiwete itxĩ u'juni's kusa'jçxa', ũusa's in-fxiernote kaahwa'jsaçxá's ũukhna mfxi'zewe. Txã'sçxáa ũukhwa'ja'.

⁶ Tahç vxiçxakuētē e'z centawoteçxáak ya'txweyú'. Nawa makwe pa'gameesatewa Dxusa' teeçxçxáa yuhnawa peçxkanaméek thegna fxi'ze'.

⁷ I'kwe'sx jxkwette dxkhas yuhwa jxuka isani ũsta'. Aça' i'kwe'sx yu' maazkuēe vxiçxakuētewa jxthaakwe pa'gasai'kwe. Txãasa ũukhmée mfxi'zewe.

Jesus kintewa thaamemée pta'sxni
(Mt 10.32-33; 12.32; 10.19-20)

⁸ I'kwe'sxtxi na'jĩçthu: maawa naa kiwete nasaa dxi'pte thaamemée Kristo jĩith jĩna ãate pta'sxsatxi', adxwa Dxus Nçxi'k Nasa Yuusa' txã'wěy Dxus angeleswe'sx dxi'pte thaamemée: Na' adx nasata' jĩna pta'sxi'nja.

⁹ Nawa maawa naa kiwete nasaa dxi'pte thaameçxa Kristo's jiimeeth jĩna ĩsxĩjana aça' adxwa Dxus angeleswe'sx dxi'pte txã'sa' jiimeeth jĩ'nja.

¹⁰ Maawa Dxus Nçxi'k Nasa Yuusa's makwe açewe'wetewa, ya'peltunaĩna. Nawa Dxus Espiritu's açewe'wete', bagaçxte yuhwa pel-tunãynimée yuuna.

¹¹ Na'jĩ'th na': i'kwe'sxtxi judiuwe'sx pkhaakhenisu meeçxa' khuẽswe'sx tasxte kuutxa'thewa, ũukhnuwe kuh yajkxna kĩh we'weki'th sũhna.

¹² Txãa pa'gatey Dxus Espiritu' ma'wě we'wewa'ja'swa kaaũusuthe'jena txãa dudte jĩk.

Teeçx ji'phsa ũ'a's jxaawya' yaaxni

¹³ Txajũ' teeçx piçthē'j nasaa ksxavxyte ũssa' Jesusa's na'jĩk:

—Adx yakthē'ja's meen we'we, tatawe'sx ji'phuni's pxãhn adx jĩ txudeekahn jĩte',

¹⁴ Jesus pasçxa':

—¿Kimga adxa'sa' txudeedewa'jsa meeçxawa khuẽs na'wěsa ki'p? jĩçxa',

¹⁵ na'wěk we'we:

—Mpa'yajkxwe, naa kiwete ji'phuniçxá's yaakxnisa's. Txã'wěme' naa kiwete kĭjkĭhwa ji'phuçxaçxáa txã'wě ĩtxĩ ya'fxi'ze'çme'.

¹⁶ Txajũ' Jesusa' na'wěk ejemplo pta'sx:

—Teeçx piçthē'j wala ji'phsa u'pu'k. Txajx kiwete uuthasx wala yũku.

¹⁷ Aça' txāa ji'phsa' yajkxya' kaçxku: ¿Ma'wě yũuki'th? Mtee yuhwa adx ũ'a's jxuka jxaawya' ājānimeeth sũjũ'k.

¹⁸ Sa' yajkxku: Jiiyā'th ma'wě yũuwa'ja'swa. Ũ' jxaaw yattxi pētxya'wath, vxite wejx walasa txajxa'. Sa' kĭjkĭh ũ'wa thē'the' vxite' kĭh ji'phunitxwa kxtee jxaawu'nja.

¹⁹ Txajũ' adx ũuste na'jĩ'nja: Wala kĭhwa jxaawni ji'phgu, wala kuh anxu selpiwa'j. Āçxha' mĭjīmée kaasena kĭhwa ũ'na weçxweçxa miya-jkx sũjũ'k.

²⁰ Nawa Dxusa' na'jĭk: Āhmeeg yaaki'. Naa kuste uuya'wag. Aça' iidx ji'phuni jxaawni' ¿kiim jĩi yuuwa'jtxna? jĭk.

²¹ Jesus we'weçxa': Txã'wěk ya'yu' naa kiwete ji'phuniçxá's nuywalaana ũsçxa', Dxus dxi'pte yu' puuplek neeyũ' jĭk.

*Kwe'sx peejini's Dxusa' jxuka pu'çxhina
(Mt 6.25-34)*

²² Jesusa' txāa yakh u'jusawe'sxtxi' na'wěk yu'kxpeh:

—I'kwe'sxa' ¿kĭhte ũ'wa'j uyuukxtha'w? Sa' ropawa ¿kĭhte uyuukxtha'w? sũhna pa'pçxunuwe.

23 Txã'wẽ yuukahmeníi ìtxĩ fxi'zenisa' ù'nite jxthaakwe ewsa', aça' txã'wẽy kakwewa ropate jxthaakwe ewsa'.

24 Vxiçxakuẽtx mthegwe wakx. Txãawe'sxa' uja'çwameeta', sa' ù' jxaaw yatwa txahçxa ù' pkhakhe'çwameeta'. Nawa Dxusa' txãawe'sxtxi' sã'jĩ'k na' i'kwe'sx yuutxi's wejx txã'wẽ sã'jĩna vxiçxakuẽte jxthaakwesai'kwe naa pa'ga.

25 I'kwe'sxa' ¿maaçxá' iiméh wala pa'pçxuçxa peena medio metro thaakwe walaaya' ãjama'kwe?

26 Txã'wẽ ãjameeçxa', ¿kĩjxa'çxáakwe naa kiwetewe'sxçxáatx txakwe wala pa'pçxu'?

27 Kitetx mthegwe, ropa uyya' mjüimeeçxawa ma'wẽta zhiçxkwe walá'. Isath we'we': Jxkaahsa Salomon txakwe ji'phsa yuhçxawa txãa kite na'wẽ yu' zhiçxkwesa ropa athme'.

28 Kite' teeçx en fxi'zena', kuskuuskhẽ' ipxte kabwa'jçxáa yã'thewa txã'wẽk zhiçxkwe pheu'j. Dxusa' txã'wẽy i'kwe'sx yuutxi's wejx ropa ewsa ùsna nes yuuna na's i'kwe Dxusa' txã'wẽ yuuna sũjũ'çméé.

29 Txã'wẽ yã'the', ù'wa'j ¿kĩhte uyuukxtha'w? sũhna pa'pçxuna fxi'zenuwe.

30 Naa kiwete nasaçxáatx kakwete peejinixáana yajkxna fxi'ze'. Nawa i'kwe'sxa' cielute Tata ji'phi'kwe txã' jxuka jiiyã'ja' i'kwe'sx kĩh peejini'swa.

31 Txãa pa'ga wejxwa Dxus jxkaahnitewe'sxa's khuẽ'yna wejx thaakwe mpa'pçxuwe. Naa kiwetewe'sxtxi' wejx pa'pçxumeetewa, pejka yuh ùsni yuuna.

*Cielute ji'phuwa'jçxá's mpa'pçxuwe
(Mt 6.19-21)*

³² I'kwe'sxa' kuhmeekwe i'kwe nawa ũukhnuwe, txãa pa'gatey i'kwe'sx Tata cielutewe'sxa' i'kwe'stxi peeygãhçxa txajx jxkaahna ũsni's i'kwe'stxi ũsya'wa'.

³³ Ji'phunisa's txweyçxa jxpeejsatx mpeeswe. Vxyu jxaawni suwewa'jmeesa mvxitwe. I'kwe'sx ji'phuni cielutewe'sxa' pçumeena, kxteea' kîh peswée yuhwa u'kameena, sa' çxikaçxáa yuhwa suwmeena.

³⁴ Mtee jxaawni ji'phçxa', kxte yuuçxáak wejx jxthaakwe yajkxna ya'fxi'ze'.

Jxpa'yakx ũythasna ũsni

³⁵ Jxuka pheu'jçxa lamparatx pki'taçxa ũythasna meswe.

³⁶ Patrona' boda yatu sxawedna pa'jçxa', vx-itxte tu'kakaçpkaçxha', selpisaawe'sxa' dudtey vxitxa's phaadeya' jxpa'yakx ũythasna ũssa na'wē myuuwe.

³⁷ Jxpa'yakx ũste patron pa'the', selpisaawe'sx yakha' wala yuh weçxa yuhna. Isath we'we': Txã'wē jxpa'yakx ũsatxi' patrona' pheu'jçxa mesate kaaçxi'jina puuçya'.

³⁸ Kuspxãh ma'k yuu meeçxa' khikhiiçte ma'k yuu nawa jxpa'yakx ũste pa'the', selpisaawe'sx yakha' wala yuh weçxa yuhna.

³⁹ Ũus miyajxwe wakx: Maa yat namuwa peswée kîh orate txajx yatte pa'jwa'ja's jiyuwaça', dehmée jxpa'yakx ũsçxa' ka'ga'jmeena txajx yatte pesweewe'sxte.

40 I'kwe'sxwa txã'wěy pheu'jçxa jxpa'yakx meswe. Txã'wěme', yajkxmée ũsiyna, Dxus Nçxi'k Nasa Yuusá' kîhçxáa yuuna jîk.

Selpisáa ewsa vxite' ewmeesa

(Mt 24.45-51)

41 Txajü' Pedro' na'wěk pějx:

—Naa ejemplo' çkwe'sx jiiçxáa wáana meeçxa' jxukaysatx wá'ga pta'sxi'? jîte',

42 Jesusa' na'wěk pta'sx:

—Maa patronwa yultumu nwéesē'jsa ewsa's neewe'weçxa nvxiituna, txajx yatte mjïisatx sã'jîna nes yuukahn.

43 Aça' patron jxkaahni's kxtey yuuna ũste patron pa'the', txáa selpisáa yakha' wala yuh weçxa yuhna.

44 Isath we'we': Txã'wě yūusa's patrona' txajx ji'phuni's kîjkîhnawa jxuka txáa yultumuçxaçxá's neewe'weçxa thegkahn nvxiituna.

45 Nawa txáa yultumu': Adx patron dud pa'jmeena sũhçxa kxtee mjïisatx pkxuuya' ki-iteçxa, txáa yu' tudxna tūuya' kiitena.

46 Naapkaçxha' txajx patrona' sxaweduuna txã'wě yultumu' patron pa'jwa'ja's jiimeeçxa' ũythasmée ũsiyna. Sa' wala seena' kastigaña, nwéesē'jsameewe'sxtxi ma'wě kastigaïkx txã'wěy.

47 Maa selpisaawa txajx patron jxthãasni's jiiçxawa kxtey nwéesē'jsame', wala kujus kastigāyni yuuna.

48 Nawa maa selpisaawa patron jxkaahni's jiimeeçxa' āhmée yūuna txã'sa' kujusmée ya'kastigaña. Maanawa wala ũsçxa', wala

ya'pēyina. Aça' maanawa jxthaakwe kīhnawa neewe'weçxa', jxthaakwe ew jxpe'khaníi yuuna.

Jesusa' nasatx kaapui'jsa na'wē yuuni

(Mt 10.34-36)

⁴⁹ Naa kiwete ipx pki'taya' kīisa na'wēth kīh, behnayā'j ũswaç ma'wē wala weçxaaki'th.

⁵⁰ Adxa' uuwa'jsath txāasa wala nxusna u'juth uuwa'j en āhpkaçx.

⁵¹ Naa kiwete puiimée wēt kaafxi'ze'jya'ne' kīh ¿sūjū'wá'kwe adxa'sa'? Nawa txā'wē yūuya' kīhmeeth. Adx pa'gateçxáa maa nasaíi yu' puutx yahçena puina fxi'zetzna.

⁵² Āçxhūyā'ja' teeçx yattewe'sx taç nasaçxawa tekhsa' e'zsatx ahçena puutx txā'wēçxaçxáa puina fxi'zetzna.

⁵³ Neya' nçxi'ka's açeyajkxna fxi'zena. Aça' nçxi'ka' neya's txā'wēy yūuna fxi'zena. Nji'ja' niisa's ahçena fxi'zena, aça' niisa' nji'ja's txā'wēy yūuna fxi'zena. Swegra' nkuēmyu's açena, naapkaçxha' nkuēmyu', swegra's açena.

Naa ensu kīh yūuya'watewa txāa yu'sa' jüimée fxi'zeni

(Mt 16.1-14; Mr 8.11-13)

⁵⁴ Txajū' Jesusa' na'wēk we'we:

—I'kwe'sxa' sek khēenijū tāaph kiitena yuhte', nus pa'jya'wa' jī'i'kwe, aça' kxtey yu'k.

⁵⁵ Sa' wejxaaçte', sek ya'wa' jī'i'kwe, aça' kxtey yu'k.

⁵⁶ ¿Ma'wē yuuçxa nus pa'jna ki' sek ya'watewa jüisatha'w jīna ũuste yu' iiwejçx i'kwe yajkxna fxi'ze'? Sa' jüisaçxa' ¿ma'wētekwe naa ensu' kīh yūuçtewa txā's yu' jiyu'çmée?

*Açesa yakh yuwe's puutx we'weni
(Mt 5.25-26)*

⁵⁷ I'kwe'sxa' ¿mjïitekwe ewteçxah puutx we'wena yuwe's pheu'ju'çmée?

⁵⁸ Maawa idxa's pãatxhĩ'khte', txãa yakh khuẽs tasxte utxaaya' u'jweççxa', dxi'the ewteçxah puutx we'wena yuwe's mpheu'jwe, kxah khuẽs tasxte kuutxa'jmeena. Txã'wême', khuẽsa' idxa's policia's dukhena, açã' policia yu', karcelte kxuuphana.

⁵⁹ Na'jĩ'th na': Txajÿyã'ja' vxyu nmeh ji'phuni's dukhmeçxa yu', karceluh kasehmeene'ga jĩk.

13

Pkaltxi nvxihtmeeçxa' maawa jxuka vxituni

¹ Txãa ensuy nasa maai' yu' Jesusa's na'wẽtx pta'sxna utxãa:

—Galileajuwe'sxa' Dxusna weçxana neewe'weya' altalte kabwa'j tajkx ikheçpkaçxha', Pilato' txãawe'sxtxi' ikhkaakh, açã' txãawe'sx eea' takx ee yakh jxuka ka'duk jĩte',

² Jesusa' na'jĩk:

—Galileaju nasatx txã'wẽ yũute', txãa uusaawe'sxa' Galileasu nasate jxthaakwe pkalsane'ta yu', txãa pa'gatx txã'wẽ uu ena's ji'phu ¿sũjũkwé'?

³ Na'jĩ'th na': Txãawe'sxçxãa thaakwe pkalsa yu'çmeeta'. Açã' i'kwe'sxwa pkaltxi nvxihtçxa Dxus tasxte sxawedmeeçxa', txãawe'sx na'wẽyçxãa uuwa'jsai'kwe.

4 Txã'wěy diecioçxo nasa Siloete toçxe kajkwekhě wetete' uutx txãa uusaawe'sxa' Jerusalen çxhabte u'psawe'sxte jxthaakwe yuuwesane'ta yu', txãa pa'gatx txã'wě uu ena's ji'phu ¿sũjũkwé'?

5 Na'jĩ'th na': txãawe'sxçxáa thaakwe yu-uwesa yu'çmeeta'. Aça' i'kwe'sxwa pkaltxi nvx-ihtçxa Dxus tasxte sxawedmeeçxa', txãawe'sx na'wěyçxáa uuwa'jsai'kwe.

Higwera tasxa's spě'th kaahni

6 Jesusa' naa ejemplo'sku pta'sx:

—Teeçx piçthě'ja' higwera fxtũu tasxku txajx kiwete uhni ji'phu'. Sa' thegya' u'kh, yũnwáana sũhçxa. Nawa uyme'.

7 Txajũ' na'jĩk kxtee uuthasx thegsa's: Naa fxtũu tasx yũnuuçwáana sũhçxa adx thegya' pa'jna ũsni tekx anxuyã'ja', nawa teeçx yũn yuhwa uynimeeth. Aça' mespě'th, ¿mjĩya'çxáa kxul ũsya'wana? jĩte',

8 uuthasx thegsa pasçxa': Menvxiht naa anxuçxáawa, aça' kiwe's luupe'jçxa sxaakwe'je'nja.

9 Aça' yũnne'jwáana. Txã'wě yũute yũnmeete, kaaspě'the'jene'ga jĩk.

Teeçx u'y ku'le u'juya' ãjasame's sapatu ente nuykatxhini

10 Teeçx sapatu jxkaase ente', Jesusa' judi-uwe'sx pkhaakhenitek kaapiya'jna ũsu'.

11 Aça' kxte' teeçx u'y diecioçxo anxuyã'j ãçã'na u'jusak ũsu', eçx luuku vxit-sa pkxuute ku'le u'juya' ãjasamée.

12 Aça' Jesus uyçxa', pa'yak:

—I'kwe' naa weeju katxhiyã'ji'kwe jĩçxa',

¹³ Jesusa' ãçã'sa kakwete jxa'dxku. Naap-kaçxha' txãa u'ya' dudtey ku'le'ya' ãjãçxa', seena' wala Dxusa's weçxana we'wek.

¹⁴ Jesusa' txã'wẽ sapatu jxkaase entewa ãçã'a's nuykatxhite', judiuwe'sx pkhaakhenite npiičthẽ'jsa' ũusaçxaçxa nasatx na'jĩk:

—Ki'su' seis en ji'pha' mjĩiwa'j. Aça' katxhi wẽeçxa' vxite ensu myuhwe. Nawa sapatu jxkaase ente yu', katxhiya'çxãa yu' pa'jnuwe jĩnak jxkaah.

¹⁵ Aça' Jesus pasçxa':

—Ãateçxãa ew we'weçxa' ũuste yu' ewmeeçxãa yaakxsawe'sx mpaaswe: I'kwe'sx kla meeçxawa i'kwe'sx jiba tudni ũste', makwe jxkaase entewa jxũkhwedeçxa yu' yusya' çjxũna u'jmeema'kwe?

¹⁶ Naa u'ya' Abrahaman ji'ja' nawa eçxthẽ'ja' diecioçxo anxuk kaãçã'jna ji'phu'. Aça' makwe jxkaase entewa eçxthẽ'j kuseju kusa'the çewmeemanx? jĩte',

¹⁷ Jesusa's açeyaakxsawe'sxa' wẽsẽ'jçxa', thaametx. Nawa nasa jwee kuhsa yu' weçxa'tx, Jesus txakwe wala ew yũupa'ga.

Mostasa fxiwa's kaaja'da'jni

(Mt 13.31-32; Mr 4.30-32)

¹⁸ Txajũ' Jesusa' na'jĩk:

—Dxus jxkaahwa'j ena' çma'wẽkx sũjũ'kwe? Txã'sa' çkĩh yakh kaaja'da'jaki'th?

¹⁹ Nawa na'wẽ': teeçx piçthẽ'j txajx kiwete mostasa fxiwa's uhte', ma'wẽ seena' walaakx.

Aça' vxiçxakuẽ yuhwa txãa mostasa ku'tasu yaatutxki txã'wësa'.

Lewadura's kaaja'da'jnisa

(Mt 13.33)

²⁰ Ki'kin vxite ejemplo na'wësa yakhku kaaja'da'jna pta'sx Dxus jxkaahwa'j ena's:

²¹ —Teeçx u'ya' tekh libra skuutxh ù'wete le'çxkwe lewadura's ka'dte', ma'wë jxuka pëethêjekx txã'wëy yuuna jík.

Vxitx pteezsa

(Mt 7.13-14, 21-23)

²² Jesusa' Jerusalenna u'jweççxa', çxhabsu msuwa iikaapiya'kh u'jwe'.

²³ Aça' teeççsa' na'wëk pejx:

—Dxus tasxte ewte neeyũuwa'jsa' ¿kuhmeewáatxna? jíte', Jesus pasçxa':

²⁴ —I'kwe'sxa' wala yuh mpa'pçxuwe vxitx pteezte u'kaya'. Na'jĩ'th na': Maawa wala yuh u'ka wëjêtxna, nawa thëytewa pa'pçxumeeçxa yu' u'kaya' âjãmeetxna.

²⁵ Yat namu' vxitxa's aphyã'the', i'kwe'sxa' ekaju neeyũuçxa' vxitxte tu'kakana na'jĩne'kwe: Vxitxa's meen phaade, kwe'sx u'kaya'watha'w jĩne'kwe. Nawa txãa pasçxa': Adxa' jiimeeth i'kwe'sxa' majũwe'sxne'kwe nawa jíte',

²⁶ i'kwe'sxa' na'jĩne'kwe: Kwe'sxa' idx yakh txutemée mteewa u'jusatha'w. Aça' idxa' kwe'sx çxhabsuwa kaapiya'jg jĩwá'kwe.

²⁷ Nawa txã' na'wë pasuna: Na'jĩyã'th na', i'kwe'sxtxi' jiimeeth majũwe'sxne'kwe nawa. Adx tasxu me'jwe, i'kwe'sxa' jxukay ewmée yũusaçxáa i'kwe jĩna.

28 Aça' i'kwe'sx yu' eka kutxi'jni neeyũuçpkaçxa', Abrahan, Isaak, Jakob vxite' Dxus yuwe pta'sxsa txãawe'sx yu' Dxus jxkaahna ũsnite ũste uyçxa', seena' wala ũ'nene'kwe ki'th yuhtxwa ksuusu'jna.

29 Ekaju neeyũusáa txã'wẽ nxuskahnii sek kãanijũwe'sx, sek khëenijũwe'sx, majũ majũwe'sxwa jxuka pa'jya'wata', Dxus jxkaahna ũsnite u'kaya'.

30 Aça' kxtee u'kawa'jsa açxh maaíi yu' e'stewe'sx ũsta' txãa yu' yaçte yuutxna, naapkaçxa' yaçtewe'sx yu' e'ste yuutxna jĩk.

Jesusa' Jerusaleña's thegçxa ũ'neni
(Mt 23.37-39)

31 Txãa entey maz fxariseowe'sx pa'jçxa', Jesusa's na'jĩtx:

—Me'j ayjxu. Txã'wẽme', Herodesa' idxa's ikhya'wa' jĩna pta'sxte',

32 Jesus paşçxa':

—U'jçxa na'jĩne'kwe txãa thẽ'ja's: Açxh yakh kuskus yakh nee mjĩwa'j ji'phthu eçx luuku vxit-satx nasa ũusu kutxi'jna açã'satxwa nuykatx-hina. Sa' tekh ente' mjĩina jxã'ja'nja jĩ'k jĩne'kwe.

33 Adxa' nee u'juwa'j en ji'phíçxáath tekh en ähpkaçx, txãa pa'gatey Dxus yuwe pta'sxsa' Jerusaleña ekaju yu' uuwa'j ji'phme'.

34 Jerusalentewe'sxa' Dxus yuwe pta'sxsatx ikhna Dxus kaahnisatxwa pãpana pkxuui'kwe. Nawa adxa' i'kwe'sxtxi' maazkuëe uswa pa'yath nwe'weya', atalxwa ma'wẽga luuçxkuëttx fxuu

ku'ta dxiite yu'ãsxì' txã'wěy yũuya', nawa nwěesě'jmeei'kwe.

³⁵ Txãa pa'ga mpa'yajkxwe. I'kwe'sx çxhaba' jxuka pçuuna sa' ãçxhũyã'ja' adxa's peena yu' uymeene'kwe, Dxus kaahni jxtuhthe ki' kïiwa'j en ähpkaçx jĩ k.

14

Çu'vxy weete ãça'sa's nuykatxhini

¹ Teeçx sapatu jxkaase ente' Jesusa' fxariseo npiiçthě'j yattek ũ'ya' u'j. Aça' vxite fxariseowe'sx yu' peethegu'natx ũsu'.

² Txãa yatte' teeçx piçthě'j çu'vxy weete ãçã'sak ũsu'.

³ Aça' Jesusa' na'jĩnak pějx ley kaapiya'jsawe'sx vxite' fxariseowe'sxtxi:

—Sapatu jxkaase entewa ãçã'sa's nuykatxhite çewmanx? jĩte',

⁴ txãawe'sxa' pasmée sxuuna'tx neeyũu. Aça' Jesusa' txãa ãçã'sa's pa'yaçxa nuykatxhiçxak kaah.

⁵ Sa' fxariseowe'sxtxi' na'jĩk:

—I'kwe'sx jiba meeçxawa i'kwe'sx kla kafxte khěeçxa u'pte', çdudtey kutxi'jmeema'kwe jxkaase entewa?

⁶ Txã'jĩte', weh yuhwa pasya' äjãmeeta'.

Boda fxiestate pi'kxte walasath sũhna pa'jsa

⁷ Fxiestate pi'kxnisa' kaçxni ewsaçxáatx txhitxhiçte uyçxa', Jesusa' na'wěk yu'kxpeh:

⁸ —Boda fxiestate i'kwe'sxtxi pi'kxte', kaçxni ewsu yu' kaçxnuwe. Txã'wěme' vxite i'kwe'sxte jxthaakwe jxtuhthesa wáa pa'jana,

⁹ aça' fxiesta namu' i'kwe'sxtxi kiisuna: Ayte' naajx kaçxwa'jçxá' jĩçxa. Aça' wala thaamena u'jwene'kwe kaçxní açxamée ewkhẽ kaçxya'.

¹⁰ Fxiestate i'kwe'sxtxi pi'kxte', wejxwa nmeh puzakhẽ mkaaçxwe, kxah i'kwe'sxtxi pi'kksa uyçxa': Namiku, ay yaçkhẽ wejx ewkhẽ myuh kaçxya' jĩte', wala weçxana yaçkhẽ kaçxya' u'jwene'kwe.

¹¹ Maawa walasath sũhna iiwejçx iiwejçx yaakksa' thaamewa'jçxáa ji'phuna. Nawa ãhmeekwesa na'wẽçxáa yajkxna fxi'zesa' jx-tuhthe wálasa yuuna.

¹² Sa' fxiesta namu pi'kksa'swa na'jĩk Jesusa':

—Idxa' sã'jĩya' pi'kiççxa', iidx namikuwe'sxtxi yakhthẽ'jwe'sxtxi pukakhẽ npe'sxtxi meeçxawa utxasuwe'sx vxyu ji'phsatx pi'kxnu. Txã'wẽme' txãawe'sxwa kaasxwedu'ju'tha'w jĩna idxa's txã'wẽy sã'jĩya' pi'kitxna.

¹³ Aça' sã'jĩya' fxiesta vxituççxa', wejxwa puuple ãhmeekwesa legsa uysamée txã'wẽsaçxáatx mpi'kx sã'jĩya'.

¹⁴ Aça' txãawe'sxa' ka'tu' txã'wẽy kaasxwedu'jya' ãjãmeetxna idxa's. Nawa weçxana mneeyũu, txãa pa'gatey Dxusa' idxa's deweena Dxus luuçx ki' ãtxĩ yuu ente' jĩk.

Fxiestate pi'kxte wa'lsa

¹⁵ Txã'wẽ pta'sxni's wẽsẽ'jçxa', mesate u'psa teeçxsa' na'wẽk we'we Jesusa's:

—Dxus jxkaahna ũsnite u'kaçxa ũ'sa yakha' wala yuh weçxa yuhna jĩte',

¹⁶ Jesusa' na'wẽk kwentu'j:

—Teeçx piçthê'j fxiesta wala vxituççxa', nasa seena' wala kuh pi'kxku sã'jïya'.

¹⁷ Sa' ù'wa'j ora ãjãçte', teeçx selpisa's pa'yaya' kaakh: Û'ya' myuhwe, jxuka pheu'jniyã'j ùsa' jïna pa'yakah.

¹⁸ Nawa jxukaysa wa'lçxa na'wêçxáatx pas: Nyafxte'we'sx pasçxa': Kiweth wey, sa' thegya' u'jwe ji'phthu. Aça' tee peltunaï jïk.

¹⁹ Aça' vxite we'weçxa': Diez novxilxoth wey, sa' thegya' u'jweçthu. Naa pa'ga tee peltunaï jïk.

²⁰ Aça' tekhtewe'sxa' na'wêk pas: ãçxçxáatha'w ptamúu, sa' yujxa' tuduume'nja jïk.

²¹ Txajũ' selpisá' sxawedna u'jçxa txajx patrona's jxuka pta'sxku. Aça' patrona' wala ùusaçxaçxa txã's selpisa's na'jïnak jxkaah: Dudtey plaasasu klxiikhunsu ki' u'jçxa puuple ãhmeekwesa legsa yafx puuple uysamée txã'wêsatx pi'kxçxa ayte pe'jna yuweene'ga jïk.

²² Aça' selpisá' u'jçxa ki' sxawedna pa'jçxa': Iidx jxkaahni's kxtey yuuth, aça' pa'jtx. Nawa kaçxwa'j yu' nee ùsiyçxáata' jïte',

²³ patrona' selpisá's na'jïk: ãçxha' çxhab ekaju jxu'juwe'sx vxite' dxi'j u'jsatxwa pi'kxçxa ayte ka'ga'jane'kwe makwe wa'luçtewa ãadxijimée, adx yatte utapkaçx.

²⁴ Nawa nyafxte pi'kxnisa wa'ltxi txãawe'sx yuutxi' kaapa'ja'jme'nja adx yatte puuçya' jïk. Txã'jïnak kwentu'j Jesusa'.

Jesus yakh fxi'zewa'j thëya'

²⁵ Txajũ' Jesus e'ste nasa wala u'jweç yu'tx, aça' txãawe'stxxi yu'thegçxa na'jïk:

26 —Maawa adx yakh yuusá' txajx ney, nj'j, nyu, luuçx, nyakhwe'sx, npe'sxwe'sxtxi nvxihtçxa txã'wëy iiwejçx yajkxna fxi'zeni's uu entepkaçx nvxihtmeeçxa yu', adx yakh fxi'zeya' ãjãmeena.

27 Sa' makwe thëyte uupçxãhtewa txãatxi' yajxmée, adx yakh yuhmeeçxa yu' adx yakh fxi'zeya' ãjãmeena.

28 I'kwe'sxa' yat wálasa txajxa'waçxa', jxuka jxã'jwa'j kĭjkĭhwa ãh ũstxmanx sũhna kaçxçxa çyajkxmeema'kwe?

29 Txã'wë yũumeete', kiwete pxãhn pa'j mjĭiçxaçxáa nvxihtte', maawa uysa' npeevxysxikatxna:

30 Jxã'jya' ãjãme' jĭna.

31 Txã'wëy maa npiiçthë'jwa vxite npiiçthë'j yakh puiiya'waçxa', kaçxçxa ũus yajkxmeema'k: Naa diez mil soldau yakhçxáa weinte mil soldautx çknayma'th? sũhna.

32 Sa' ewupçxãhmeete', vxite npiiçthë'j utxameyna, yuwe kajana kuçx puiimée ewteçxah neeyũuya'.

33 Aça' txã'wëy i'kwe'sxwa dxiikhëy jxuka ũus yajkxçxa i'kwe'sx ji'phuni's nvxihtmeeçxa yu', adx yakh fxi'zeya' ãjãmeene'kwe.

Nega seelpimeesa

(Mt 5.13; Mr 9.50)

34 Nega' selpi'k, nawa jxuka sxũukãhçxa' çma'wë selpiikx?

35 Kiwete sxaakwe'jwa'jçxáa yuhwa selpi'çme', pubwa'jçxáak yu'. Jiyuwa'jsa ũsçxa', jiyune'kwe jĭk.

15

Piisxáa vxitusa yakh kaaja'dajni (Mt 18.10-14)

¹ Gobierno j̄i vx̄yu p̄khakhsawe'sx vxite' p̄kal-sawe'sx j̄xukaysa Jesus p̄ta'sxni's wēsē'jya' utx-aatx.

² Txāa pa'gatx Dxus ley kaapiya'jsawe'sx vxite' fxariseowe'sxa' Jesusa's na'j̄ina nuywe'we:

—Naa piçthē'ja' wala fxiy yu'k, p̄kalsawe'sxtxi j̄xpa'gaçxa txāawe'sx yakhku ũ'we' j̄ite',

³ Jesusa' naa ejemplo'sku p̄ta'sx:

⁴ —I'kwe'sxa' cien piisxáa j̄i'phçxa', teeçxsa' vx̄yaameete', vxite nowenta y nwewesatx kxsūu nvxihtçxa ç̄piisxáa vxitusa's pakweya' u'jmeema'kwe uypkaçx?

⁵ Sa' piisxa's uyçxa', yakhçxa wala weçxana

⁶ yatte pa'jçxa, namikuwe'sx vxite' kxsūu utxasuwe'sxtxi pa'yaçxa: Adx piisxáa vxitusa's uyyā'th, aça' adx yakh ja'da weçxa mpu'çxwe j̄ina ç̄pta'sxmeema'kwe?

⁷ Na'j̄i'th na': Cielutewa txā'wēy nowenta y nwewe nasa ewsate j̄xthaakwe wala weçxa yuja' teeçx nasaçxáawa p̄kaltxi nvxihtçxa Dxus tasxte sxawedte'.

Vx̄yu weteni's kaaja'dajni

⁸ Txā'wēy teeçx u'y diez vx̄yu musx j̄i'phçxa', teeçxsa wetete', ç̄lampara's p̄ki'taçxa yatte j̄xpa'yaxk padna pakwemeema'k uypkaçx?

⁹ Sa' txāa vx̄yu's uyçxa' txajx namikuwe'sx vxite' kxsūu utxasuwe'sxtxi pa'yaçxa: Ũ'kwe vx̄yu wetesa's uythu, aça' ũ'kwe yakh ja'da weçxa mpu'çxwe j̄ina ç̄pta'sxmeema'k?

10 Na'jī'th na': Dxus angeleswe'sxtxiwa txā'wēy weçxa yuja' teeçx nasaçxáawa pkaltxi nvxihtçxa Dxus tasxte sxawedte'.

Luuçx ney yatu kasehni

11 Txajū' Jesusa' vxite ejemplo na'wēsak pta'sx: —Teeçx piçthē'j e'z nçxi'kku ji'phu'.

12 Aça' nuuçxsa' neya's na'jīk: Tata, iidx ji'phuni adx jīi yuuwa'ja's txuhdeçxa mah jīte', neya' txuhdeçxa dukhku.

13 Aça' jxpa'gani maz enteçxáa txāa nçxi'k nuuçxsa' ney dukhni's jxuka pkhakhçxa jxu'j kiwen u'kh. Sa' kxteea' ewmēe yūuna jxuka vxyu's psuwna pebak.

14 Txā'wē vxyu's psuwna pebaaçpkaçxha', wējē en pa'kh txāa kiwete. Aça' txāa piçtakxa' wēeya' yajkxku.

15 Sa' kxsū mjīi pakweya' u'kh teeçx piçthē'j tasxte. Aça' txāa piçthē'j yu' kuçxi sã'jīya'k kaah txajx tulte.

16 Txajū' txāa piçtakxa' wēeçxa kuçxi ũ'pusnawa ũ' wēek. Nawa txā'wēsaçxáa yuhnawa puuçmeeta' txāa piçtakxa's.

17 Txajū' ũus yajkxya' kaçxçxa naa sūjk: Adx yu' ayte wēeçxa uuya'wath, naapkaçxha' adx tata yatte mjīisa piuna' kīh yuhwa wēemēe ũstxna maazkuēeçxawa.

18 Aça' adx tata yatna ki' sxawedna u'jçxa na'jī'nja: Tata, Dxus dxi'pte wala āhmēe yūuth, sa' idxa'swa txā'wēythu wala āhmēe yūu.

19 Sa' nçxi'kçxawa āçxha' iidx peeygāawa'jmeeyā'th. Nawa iidx piun na'wēçxáawa meen jxpa'ga jī'nja sūhnak yajkx.

20 Txajũ' kiiteçxa ney yatna sxawedna u'kh. Aça' pa'jaçte', neya' jiyuk jxu'the yujíyna. Sa' nçxi'ka's peeygâhçxa pu'thegya' wuwuuna u'jçxa, psxa'dçxak weçxa.

21 Txajũ' nçxi'ka' na'jîk neya's: Tata, Dxus dxi'pte wala âhmée yũuth. Sa' idxa'swa txã'wēythu wala âhmée yũu. Nçxi'kçxawa, açxha' iidx peeygãawa'jmeeyã'th jîte',

22 neya' selpisaatx pa'yaçxa na'jînak jxkaah: Ropa ewsa kutxi'jçxa dud mkaathe'jwe. Sa' sultx-hikhawa kusete ki'pçxa spaatuwa mpaathwe.

23 Teeçx tulu piçtakx niisxsa's nikxya' u'jçxa miikhwe, fxiesta vxitçxa ũ'ya'.

24 Adx nçxi'ka' uuníi na'wē yã'jçxawa ki'kin ãtxĩ yuuk, sa' vxituna u'juçxawa ki' vxyaak jĩçxa', wala weçxana fxiesta vxittxi.

25 Naapkaçxha' nçxi'k nthē'jsa yu' mjîi ehsu u'juçxa', sxawedna yatte pa'jaççxa', wēsē'kh ku'jna tukani músika zhiçxkwesa's.

26 Sa' teeçx selpisá's pa'yaçxa pějxku: Yatte' ¿kĩh yũuna ũstxna? jîte',

27 selpisá' pta'sxku: Iidx nyakh jxu'j kiwen u'jsa ki' sxawedna pa'kh. Txãa pa'ga iidx tata' tulu niisxsa's kiikhe'jçxa fxiesta'jaça' jîte',

28 nyakh nthē'jsa' wala ũusaçxaçxa yatte u'kaya' wa'lku. Aça' neythē'ja' kasehçxa wala pxthaa we'wek u'kakahn.

29 Txajũ' txãa nçxi'k yu' na'jîk neya's: Adxa' maazkuēe anxu iidx tasxte bagaçx yuhwa wa'lmée selpiina ũstewa jiig. Nawa idxa' teeçx kaplakuēçxáa yuhwa iiūsmeeg, adx namikuwe'sx yakh fxiesta'khan.

³⁰ Nawa iidx nçxi'k txakwe wala u'y ewmeesa yakh vxyu's psuwna pebasáa yu'sa' tulu niisxa's ikhçxag fxiesta'ja' jíte',

³¹ neythē'j pasçxa': Adx nçxi'k, isa yuh we'we'g. Idxa' bagaçxtewa adx yakh txutemée nesgu yu', naa pa'ga adx ji'phuni' kīhwa jxuka iidx jīiçxaçxáata'.

³² Txā'wē iidx nyakh uuní na'wēyā'jçxawa ki'kin itxī yuuk sa' vxituna u'juçxawa ki' vxyaak txāa pa'ga weçxana pejka fxiesta'jwa'j ji'ptha'w jīk neya'.

16

Yultumu patron jī's ewmée jxpejsa

¹ Txajū' Jesusa' na'jīnak kwentu'j txāa yakh u'jusawe'sxtxi:

—Teeçx patron wala ji'phsa' teeçx yultumu ji'phu'k. Aça' txāa yultumu ewmée yūuni's pta'sxtxi: Iidx yultumu' iidx ji'phuni's wala psuwna ūsa' jíte',

² txāa patrona' txajx yultumu's pa'yaçxa na'jīk: Adx ji'phunitxi' wala psuwna ūsa' jī'tx sa' idxa' çkīh yūuna ūsga? Txā'wē yā'jçxa', idxna neewe'weni adx ji'phuni's jxuka ki' mdukh adxna. Idxa' peena yu' adx yultumu selpiiya' ājāmeene'ga jíte',

³ yultumu' ūus yajkxya' kaçxku: Āçxha' çkīh yūuki'th adx mjīia's patron kusa'the'? Adxa' uuthasxte mjīiya' yu' jiimeeth sa' lmusxnu thāasna u'jute yu' thaameyuhna.

4 Aça' patron tasxu kasehnijũ maawa txãawe'sx yat-su pe'jna sã'jĩkahn na'wẽ yũuya'k yajkx:

5 Patrona's yuulsatx teeçx teeçxçxah pa'yaçxa, nyafxte utxaasa's pẽjxku: Idxa' ¿maz yuulga adx patrona's? jĩte',

6 Cien taçxo aceite yuulthu jĩk. Aça' yultumu' na'jĩk: Iidx yuuluni eça' ayga ũsa' txã'sa' dud yuh khũkhçxa, yuula's cinkwentaçxáa mki'p jĩk.

7 Txajũ' vxite'sku pẽjx: Idxa' ¿makwe yuulga? jĩte', cien açxoba skuutxh yuulthu jĩk. Aça' yultumu' na'jĩk: Iidx yuuluni eça' ayga ũsa' txã'sa' dud yuh khũkhçxa, yuula's oçxentaçxáa mki'p jĩk.

8 Txajũ' txãa yultumu ewmeesa' txã'wẽ dudtey yũuni's patrona' jiyuçxa': Ma'wẽ fxi'zewa'ja'swa dud yuh ũus yaaki'k jĩk. Aça' naa kiwete nasa pkalsa' Dxus luuçxte jxthaakwetx dud ũus yaaki' txãawe'sx ma'wẽ puutx we'wewa'ja'swa.

9 Aça' adxa' i'kwe'sxtxi' yu'kxpeje'th txã'wẽy yũukahn, naa kiwete ji'phuni's psuwmée jxpa'yakx mkseelpi'jwe namiku vxitna. Kxah naa kiwete ji'phunisa pçuutewa, vxite kiwe pçuwa'jmeete i'kwe'sxtxi' jxpa'gawa'jsa ji'phune'kwe.

10 Maawa le'çxkuẽçxáa ji'phçxawa jxpa'yakx jxpe'jsa', walasa'swa txã'wẽy jxpa'yakx jxpe'jena. Aça' maawa le'çxkuẽçxáatewa jxpa'yakxmée psuwna jxpe'jsa', walasa'swa txã'wẽyçxáa jxpa'yakxmée psuwuuna.

11 Txã'wẽ naa kiwete ji'phuni'sçxáa yuhwa jxpa'yakxmée psuwna fxi'zeçte', i'kwe'sxtxi'

¿kim neewe'weçxa nvxiitukx pçuwa'jmée
ji'phuwa'ja's?

¹² Peekx jïimée vxite jïi yuhtxwa jxpa'yakxmée
psuwna fxi'zeçte', ¿kim ũsukx i'kwe'sx jïi yu-
uwa'ja's?

¹³ Maa selpisáa yuhwa e'z patrontxi selpiiya'
ájãmeena. Txã'wě vxiteçxá's wedxna fxi'zeçxa',
vxite patron yu'sa' açena. Sa' teeçxsa jxkaah-
niçxá's kxtey yuuçxa', vxite patron jxkaahni
yu'sa' kxtey yuuya' ájãmeena. Txã'wěy Dxusna
selpiina naa kiwete ji'phuni'swa pa'pçxuna e'z
ahtey yajxna fxi'zeya' ájãmeena jïte',

¹⁴ fxariseowe'sxa' naa kiwete ji'phuniçxá's
wejx pa'pçxuna fxi'zesa wēsē'jçxa', Jesusa's
weeçx we'wetx.

¹⁵ Aça' Jesusa' na'jïk fxariseowe'sxtxi':

—I'kwe'sxa' naa kiwete nasaa dxi'pte yu' wala
ewsá na'wě fxi'ze'i'kwe. Nawa Dxusa' i'kwe'sx
ũus yaakxnitxi' jxuka jiia'. Naa kiwete nasaçxáa
i'kwe'sxtxi' ewsata' jïte', Dxus yu' txã'jïmeena.

Dxus jxkaahni ley skhēwwa'jsamée

¹⁶ Moises ley vxite' Dxus yuwe pta'sxsawe'sx
kaapiya'jni' Juan Bautista entepkaçxtxi' ũsu'. Kx-
ajuk yuwe u'sesa' Dxus jxkaahwa'j ena's pta'sxni
yuu, aça' maawa Dxus jxkaahnitewe'sx yuuya'
wala pa'pçxu'tx.

¹⁷ Makwe cielu pçuuna, kiwewa pçuuna,
nawa Dxus jxkaahni ley yu' weh yuhwa
yu'pthehwa'jsame' bagaçxte yuhwa jïk.

Ptamsa txuteewa'jme's Jesus kaapiya'jni
(Mt 19.1-12; Mr 10.1-12)

18 Maa piçthê'jwa peekx nyu's wâatâhçxa vx-ite yakh ptamuuçxa', txã' pkal yuuna. Aça' maa piçthê'jwa txãa u'y wâatâanisa yakh ptamuuçxa', txãawa pkal íiçxáa yuuna.

Teeçx ji'phsa vxite' puuple Lasaro

19 Txajũ' Jesusa' vxite kwentu na'wēsak pta'sx: —Teeçx piçthê'j wala ji'phsa u'pu'k. Sa' ropa ewsa yuuçxáa athçxa een isak wala weçxana fxiesta vxitu'.

20 Txãa ji'phsa yat vxitxte teeçx puuple wã'jyçxáa uta ji'phsa Lasaro yaasesak kiwete kaçxçxa u'pu'.

21 Txãa puuple yu' wēeçxa ji'phsa mesa tasxsu kīh ũ' pe'laçxáawa ũsxisatx ũ'wēn ũythasna u'pte', alku' kūhçxa txãa wã'jytxi teçxi'tx.

22 Nawa teeçx ente' txãa puuple' uuk. Aça' angeleswe'sxa' jxũna u'jtx wēt ũsnite Abrahan yakh ũskahn. Txãa e'su' ji'phsawa uuk, aça' txã'sa' pedaatx.

23 Aça' ji'phsa' uusaawe'sx ũsni ksxavxyte px-thaa yaaçxana ũsçxa', pesayçxa jxu'the uyku Lasaro yu' Abrahan yakh wēt weçxana u'pte.

24 Txajũ' na'jīnak sus we'we: Tata Abrahan, adxa's meen peeygāh. Seena' yuh wala pa'ga yuuna ũsthu naa ipx wala açxate. Aça' Lasaro's mkaah txajx kuse vxiççxáanawa yu'te tuupha'jçxa adx thunete tuupha'jya' yuukahn jīte',

25 Abrahan pasçxa': Nçxi'k, miiyajkx. Idxa' nee itxī u'juy yu', wala yuh wēt weçxana fxi'zesa yu'g. Naapkaçxha' Lasaro yu' wala pxthaa yuuna nxuste fxi'zek. Nawa ãçxha' ayte wēt weçxana

ũsa', naapkaçxa' idxa' wala yuh pxthaa yuuna ũsgu.

²⁶ Pxthaag we'we' nawa penxa thkafx wala txuhdena ũsa', açã' ayjxuwe'sx kxtee pesah wêeçxawa ãjãmeetxna, sa' txajuwe'sxwa ayte pesajxa' ãjãmeetxna jĩte',

²⁷ çxhavxysáa pasçxa': Txã'wëyã'the', Tata Abrahan, idxa'sthu pxthaa we'we', açã' Lasaro's meen kaah adx tata yatna,

²⁸ kxte' taç nyakh ji'pthu txãawe'sxtxi pta'sxya' adx ayte nakwe wala pxthaa yuuna ũsthu kxtee yuukahmén jĩte',

²⁹ Abrahan pasçxa': Txãawe'sxa' Moises vxite' Dxus yuwe pta'sxsawe'sx fxi'jnitx ji'phta' na' txãatx wêsê'jetxna jĩte',

³⁰ çxhavxysáa pasçxa': Tata Abrahan, txã'wë yuhta'. Nawa maaçxáawa uusaawe'sx ksxavxyu ãtxĩ yuuçxa txãawe'sxtxi' pta'sxya' u'jwaça', pkaltxi nvxihtçxa Dxus tasxte ki' sxaweduutxna jĩk.

³¹ Açã' Abrahan pasçxa': Moises vxite' Dxus yuwe pta'sxsa txãawe'sxtxi nwêesê'jmeeyã'jçxa', makwe uusaawe'sx ksxavxyu ki' ãtxĩ yuuçxa pta'sxtewa, kxul yuhna jĩk.

17

Pkalte kweete'jya'mée jxpa'yakxwa'ja'
(Mt 18.6-7, 21-22; Mr 9.42)

¹ Jesusa' na'wëk kaapiya'j txãa yakh u'jusawe'sxtxi:

—Nasatx pkalte kweete'jsa yu' bagaçxtewa nes yuutxna. Nawa pkalte kweete'jsa' wala yuh nxus kastigo knayuuna.

² Aça' txãa pkalte kweete'jsa's skuutxh ù'khni kweta's txhikhte tudçxa ìkh wala dxiikhẽ wãatãhwaç yuuçxãa wejx ewna, naa le'çxkwesatx pkalte kweete'khamen.

³ Txã'wẽ yũuya'mée jxp'a'yakx me'juwe.

Meeçxawa idxa's wãa ãhmée yũuna iidx yakthẽ'j aça' txã'sa' myu'kxpeh. Txajũ' ãhmée yũusa': Meen peltunaĩ jĩte', idxa' peltunãywa'j ji'phgu.

⁴ Makwe teenteçxãa sietepkaçx ãhmée yũuçxawa, kzaz usi' idxa's perdon pějxya' pa'the', idxa' peltunãywa'j ji'phgu jĩk.

Dxusa's jwee'ixãa çxhãçxha yaakxwa'ja's pēyni

⁵ Txajũ' Jesus yakh u'jusawe'sxa' na'wẽtx pějx: —Dxusçxãana wejx çxhãçxha yajkxna fxi'zekahn kwe'stxi' meen pu'çx jĩte',

⁶ Jesus paşçxa':

—Dxusa' pu'çxhina sũhwa'ja's mostasa nxinx na'wẽkuẽçxãawa ji'phwaça', naa fxtũu tasxa's khubeteçxãa ìkh walate me'j khēeya' jĩte', txãa fxtũu tasxa' kxtey yuuna jĩk.

Selpisa' na'wẽ yuuwa'jsa'

⁷ I'kwe'sxa' teeçx selpisãa ji'phte', txã' mjĩi ehsu u'juçxa kusuçte pa'the': Myuh ayte kaçxçxa ù'ya' çjĩma'kwe?

⁸ Txã'jĩmée wejxwa na'wẽ kajane'kwe: Adx ù'wa'j ñiçe'jçxa mesate pheu'jçxa mtzah. Sa' adx ù'na jxã'the, idxa' ù'wene'ga jĩne'kwe.

9 Patrona' ¿selpisa's weçxama'k txã'wẽ kxtey yuupa'ga? Weçxameena.

10 Txã'wẽy i'kwe'sxa' Dxusa's selpiwa'jsai'kwe na' makwe txajx jxkaahni's jxuka kxtey yuuçxawa, weçxaa jxthãaswa'jsameei'kwe jĩk.

Diez piçthẽ'j wã'jy weete aç'a'satx nuykatxhini

11 Txajũ' Jesusa' Jerusalenna u'jweçxa', Samaria vxite' Galilea kiwesuk skhẽwna u'j.

12 Aç'a' teeçx çxhabte' diez piçthẽ'j wã'jy wee kazx ji'phsatx Jesusa's puutx uyya' kaseh. Nawa jxu'theçxáa yujuçxa,

13 na'jĩnatx sus we'we:

—Kwe'sxtxi meen peeygãh jĩte',

14 Jesusa' txãawe'sxtxi' na'wẽk jxkaah:

—I'kwe'sx kakwetx sacerdotewe'sxtxi txwesya' me'jwe jĩna jxkaathe', txãawe'sxa' dxi'the u'jweçtxi yu', naapkaçxha' txãa wã'jy we' naa dudte jxuka wẽetku.

15 Aç'a' teeçxsa' katxhiyã'jçxa', dxi'juu sxawedku Dxusa's sus we'wena weçxana.

16 Sa' Jesus tasxte kũhçxa' peejxũkwek: Weçx ew yũug jĩna. Txãa piçthẽ'j yu' Samari-ajũwe'sxku yu'.

17 Aç'a' Jesusa' na'jĩk:

—¿Diezsaĩ jxuka katxhimeewá'nta? Vxite nwewesa yu' ¿mteeta yuu?

18 ¿Naa piçthẽ'j vxite ajũwe'sxçxáa wá' Dxusna weçxaya' sxawed? jĩçxa',

19 txãa piçthẽ'ja's na'jĩk:

—Kiiteçxa me'j. Idxa' katxhinig neeyũu, txã'wẽ Dxusa' nuykatxhina sũhçxane'ga kxtey nwẽesẽ'j naa pa'ga jĩk.

*Dxus Nçxi'k Nasa Yuusáa pa'jwa'j en
(Mt 24.23-28, 36-41)*

²⁰ Txajũ' fxariseowe'sxa' Jesusa's na'jĩnatx pẽjx:

—¿Bagaçx Dxusa' isa naa kiwete jxkaajakx? jĩte', Jesus pasçxa':

—Dxus naa kiwete jxkaahni's yafxju yu' áate ya'uymeena.

²¹ Dxusa' jxkaajxa' pa'jçxa: ãçxha' ayte ũsa' meeçxawa kxtee ũsa' jĩna ya'we'wemeena. Txãa pa'gatey i'kwe'sxa' Dxus jxkaahni enteyã'j ũsi'kwe.

²² Txajũ' txãa yakh u'jusawe'sxtxi na'jĩnak yu'kxpeh:

—I'kwe'sxa' Dxus Nçxi'k Nasa Yuusáa naa kiwete kĩini's dud uy wẽjẽne'kwe, nawa dud yu' uymeene'kwe.

²³ I'kwe'sxtxi' nasa yu' na'jĩwáatxna: Ayte ũsa' meeçxa' kxtee ũsa' jĩtewa, u'jmeene'kwe sa' nwẽesẽ'jwameene'kwe.

²⁴ Kpi'sx kwehnewaççxáa ma'wẽ naa dudte majũwa jxuka vxyaakx, txã'wẽyçxáa yuuna Dxus Nçxi'k Nasa Yuusáa pa'jwa'j en áhte'.

²⁵ Nawa txãa en áhmeyna, Dxus Nçxi'k Nasa Yuusa' wala pa'ga yuuna naa ensu nasa yaaçeni.

²⁶ Noé ensuwa ma'wẽga yuu, txã'wẽyçxáa yuuna Dxus Nçxi'k Nasa Yuusáa pa'jwa'j ensuwa.

²⁷ Noé ensu nasa' kĩh yuhwa peejxmée ũ'na ptamuuna vxite' txãawe'sx niisatx kaaimi'a'jnatx

ũsu'. Nawa Noé barkote u'kaçpkaçxha', nus wala pa'jçxa ìkh utate' jxuka uutx.

28 Lot ensuwa txã'wëytxi yũuna ũsu', kîh yuhwa peejxmée ũ'na, uuthasx vxitna, txweyna, yatwa txã'wëytxi wala txahna ũsu'.

29 Nawa Lot Sodomajũ kasejeçpkaçxha', cielujũ asufxre behna kîhçxa jxukaysatx kabku.

30 Txã'wëyçxáa yuuna Dxus Nçxi'k Nasa Yu-usáa vxyaa entewa.

31 Txãa ente' ëeyatte wáa u'psa yuuna, nawa sa'jçxa kîhçxáanawa dxiiju kutxi'jwa'j ençxáa yuhwa ji'phumeena. Sa' maaíi yu' çxhab ekaju wáa u'ju yuuna, nawa yatna sxawedwa'j ençxáa yuhwa uymeena.

32 Lot nyuuwa ma'wëga yuu txã'sna miiya-jkxwe.

33 Txãa ente' maa nasawa naa kiwete ìtxí fxi'zeniçxá's yaakxsa', Dxus yakh ìtxí fxi'zewa'j yu'sa' ivxiituna. Nawa maawa naa kiwete ìtxí fxi'zeni's yaakxsame', Dxus yakh ìtxí fxi'zewa'ja's ji'phuna.

34 Najĩ'th na': Txãa kuste' teeçx kamaga e'z wáa dehna ũs yuutxna. Nawa teeçxsa's pehna u'jni yuuna, naapkaçxha' vxite yu' neeyũuna.

35 Txã'wëy e'z u'y wáa kxteeçxah ũ'khna ũs yuutxna. Nawa teeçxsa's jxũna u'jni yuuna, naapkaçxha' vxite yu' neeyũuna.

36 Meeçxa' e'z piçthē'j wáa kxteeçxah mjüina ũs yuutxna. Nawa teeçxsa's jxũna u'jni yuuna, naapkaçxha' vxite yu' neeyũuna jíte',

37 Jesus yakh u'jusawe'sxa' na'wëtx pëjx:
—¿Mtee txã'wë yuukx? jĩtx. Aça' Jesus pasçxa':

—Kakwe kha'tx mkaa uuna ũstewa, mēewējxa' āate pkhaakhetsna jĭk.

18

Khuēs ewmeesa vxiuda's nwe'weni

¹ Dxusa's peçxkanamée багаçxtewa txāa yakh puutx we'wena nes yuukahn naa ejemplo'sku pta'sx Jesusa':

² —Teeçx çxhabte teeçx khuēs u'pu'k, Dxusa's yaakxsamée sa' nasatxwa peeygāja'çme'.

³ Txāa çxhabte' teeçx u'y vxiudak u'pu', sa' khuēs tasxte pāatxhĩ'khya' u'jna nesku yu': Ũ'kwe's meen nwe'we, açesa wala pkxu'tx jĭna.

⁴ Maazkuēe uswa pa'thewa, txāa khuēsa' pu'çxme', nawa na'wēk yajkx: Dxusnawa yaakiçmeeth sa' nasa maa yuhtxwa peeygāasameeth.

⁵ Nawa naa vxiuda' wala kuçx tahtatey pa'ja'k aça' pu'çxhi'nja peena yu' pa'khamén jĭk.

⁶ —Khuēs ewmeesa yuhwa txā'wēk pu'çxya' yajkx jĭk Jesusa'.

⁷ Dxusa' ¿txā'wēyçxáa pu'çxmeema'k txajx txhitxhnisatxi? Txā'wē kus ma'k yuu en ma'k yuu nawa pxthaa we'wena nes yuute' pu'çxya' jxthēeyuumeena.

⁸ Na'jĭ'th na': Dxus Nçxi'k Nasa Yuusáa naa kiwete sxawedna kĭi entewa ¿txā'wē Dxus yakh pu'vxitumée neewe'wesa ũsma'tx yuu? jĭk.

E'zsa dxuus yatte Dxus yakh puutx we'weya' u'kani

9 Jesusa' na'wēk vxite ejemplo pta'sx txã'wē maai' yu' wala ewspatha'w sũhna vxite yuutxi' ahçena fxi'zesawe'sxtxi:

10 —E'z piçthē'jtx dxuus yatte Dxus yakh weçxana puutx we'weya' u'ka. Teeçxsa' fxariseo', aça' vxite' gobierno jii vxyu pkhakhsak yu'.

11 Fxariseo yu' yujuçxa na'jĩnak Dxus yakh puutx we'we': Dxus, idxa's wala weçxa'th, adxa' vxite nasa na'wēmeeth. Txãawe'sxa' pesweeta', ewmée kazxsata'. Sa' nyu ji'phçxawa vxite yakh pkal yuusata'. Aça' adxa' txã'wēsameeth. Naa piçthē'j ayte ũsa' gobierno jii vxyu pkhakhsa txã'wēsaçxáa yuhwa meeth.

12 Sa' ki'sute e'z us yũuna'th. Adx knayni kĭjkĩhnawa diesmo dukhe'th idxa's jĭk.

13 Naapkaçxha' gobierno jii vxyu pkhakhsa yu' jxu'theçxáa yujuçxa cielute yuhwa pagaymée naasáa txajx peçxuteçxáak iikakana Dxusa's na'jĩ': Dxus, adxa's meen peeygãh. Wala yuuwewasath jĩnaçxáak we'we'.

14 Na'jĩ'th na': Gobierno jii vxyu pkhakhsa we'weni's Dxusa' pasne'. Nawa fxariseo yu' pasnimeene' yatna sxawedna u'j. Maawa iiwejçx iiwejçx yajkxçxa we'wesa', jxthaakwe ãhmeekwesa yuuna. Nawa maawa ãhmeekwesa na'wē yajkxna we'wesa' iiwejçx yaakxsate jxthaakwe ewsa yuuna jĭk.

Luuçkuētx Jesus bedekĩyni

(Mt 19.13-15; Mr 10.13-16)

15 Txajũ' nasa' Jesus tasxte txãawe'sx
luuçkuētx nuypa'jtx Dxus kusete

neewe'wekahn. Aça' Jesus yakh u'jusawe'sxa' ũuşçxa we'wetx luuçxkuēt̃x nuypa'jsatx.

¹⁶ Nawa Jesusa' txāa yakh u'jusawe'sxtxi pa'yaçxa na'jĭk:

—Luuçxkuē adx tasxte yuhte', kuçx yup-nuwe, txāa pa'gatey Dxus jxkaahna ũsnisa' naa luuçxkuēwe'sx na'wēsa jĭi iıçxá'.

¹⁷ Isath we'we', maawa luuçxkuē na'wē Dxus jxkaahwa'j ena's wa'lmée jxpa'gameeçxa yu', bagaçxte yuhwa Dxus tasxte u'kameetxna jĭk.

*Piçtakx wala ji'phsa Jesus yakh puutx we'weni
(Mt 19.16-30; Mr 10.17-31)*

¹⁸ Txajū' teeçx piçtakx npiiçthě'jsa na'wēk paapējx Jesusa's:

—Idxa' wala ewgu kĭhsuwa jxuka, txāa pa'ga na'wēth paapēyi': ¿Ma'wē yūuşçxa pçumée itxĭ fxi'zewa'ja's ji'phuki'th? jĭte',

¹⁹ Jesusa' na'jĭk:

—¿Kĭh yuupa'gaga adxa's ewsa jĭ'? Naa kiwete' teeçxçxáa yuhwa ewsa yu' meeta'? naasáa Dxus yuuçxáa ewsa ũsa'.

²⁰ Pçumée itxĭ fxi'zewa'ja's ji'phu wēeçxa', Dxus jxkaahnitxi' jĭig txāatxi' kxtey myuu. Txā' naata': Ptamsayā'ja' vxite yakh pkal yu-uwa'jme'. Nasa ikhwa'jme'. Pesweewa'jme'. Vxitetx ĩsxĭina nuywe'wewa'jme'. Neywe'sxtxi peeygāhna ewçxáa yūuna fxi'zewa'ja' jĭte',

²¹ txāa piçtakx paşçxa':

—Txāatxi' le'çxkuējūjx jxuka kxtey yuunath waláa jĭk.

²² Aça' Jesus wēsě'jçxa' na'wēk jxkaah:

—Txã'wētewa, nee peeji'. Iidx ji'phuni's jxuka txweyçxa, puuplesatx peesune'ga. Txã'wē yūuçxa', cielute ji'phsa yuune'ga. Txã'wē yūuçxa adx yakh myuh jīte',

²³ txãa piçtakxa' wala nxusna neeyūuk, wala ji'phsa yu'k txãapa'ga.

²⁴ Txã'wē nxuste', Jesusa' na'jīnak we'we:

—Maawa wala ji'phsa yakha', wala yuh thēya' Dxus jxkaahna ūsnite u'kawa'ja'.

²⁵ Aça' txã'wē thēysa's yajkxte yu', kamelxo yuhwa thēymée wáa yūz kafxga u'kaya' ājatxna.

²⁶ Txã'jīte', na'wēttx we'we:

—Txã'wē thēyte', ¿kim ewte neeyūuya' ājākx? jī'tx.

²⁷ Aça' Jesusa' na'jīk:

—I'kwe'sxçxáa yu' ājāmeene'kwe. Nawa Dxus yakh yu', kīh yuhwa thēysa meea' jīte',

²⁸ Pedro' na'wēk we'we:

—Kwe'sxa' idx yakh yujxa' kwe'sx ji'phuni's jxuka nvxihttha'w jīk.

²⁹ Aça' Jesus pasçxa' na'jīk:

—Isath we'we': Dxus jxkaahni's nwēesē'jya' maawa yat, neywe'sx, nyakhwe'sx, nyu, nçxi'kwe'sx txã'wēsatsx nvxihtçxa',

³⁰ naa kiwete nee ūsíi txãa nvxiitnisate jx-thaakwe jxpa'gatxna, sa' vxite kiwete' pçumée itxī fxi'zewa'ja's ji'phutxna jīk.

Jesusa' txajx uuwa'ja's ki' pta'sxni

(Mt 20.17-19; Mr 10.32-34)

³¹ Jesusa' txãa yakh u'jusawe'sx docesatsx fxiite pa'yaçxa na'wēk pta'sx:

—Āçxha' Jerusالente pa'jya' u'jweçtha'w, aça' Dxus yuwe pta'sxsawe'sxa' fxi'jtx Dxus Nçxi'k Nasa Yuusá's ma'wē yūuwa'thewa txā' jxuka kxtey yuuna.

³² Dxus Nçxi'ka's vxite nasatx dukh ya'wata', aça' txāawe'sxa' npeevxysxijkana wēesxuuna fxne'sx avxythethna yūuya'wata'.

³³ Sa' wala peçxujkwena yuuçxa ikhetxna. Nawa tekx ente' ki' itxī yuuna jītewa,

³⁴ txāa yakh u'jusawe'sxa' weh yuhwa jiyumeeta' sa' txā'wē kxtey yuutxna sūjū'çwameeta'.

Teeçx piçthē'j Jerikotewe'sx uyya' ājasame's Jesus nuykatxhini

(Mt 20.29-34; Mr 10.46-52)

³⁵ Txajū' Jesusa' Jeriko çxhabte pa'jaçte', teeçx piçthē'j uysaméek dxi'j pukate kaçxçxa lmusxnu pējxna u'pu'.

³⁶ Sa' nasa wala skhēwna susuçte wēsē'jçxa', pējxku:

—¿Kīh yuuçna? jīna.

³⁷ Aça' nasa paççxa':

—Jesus Nasarethuwe'sx aysu skhēuuça' jīte',

³⁸ uysame' na'jīnak sus we'we:

—Jesus, Davxid ji'j, adxa's meen peeygāh! jīna pxthaa we'wete',

³⁹ nasa yaçte u'jsawe'sx yu':

—Sxuuna' myuu jīnatx wēesxu we'we. Nawa txāa yu' jweeíçxáak sus we'we:

—Davxid ji'j, adxa's meen peeygāh! jīna.

⁴⁰ Txajū' Jesusa' nee yujuçxa pe'jya' kaakh. Sa' utxaana kūhte', na'jīk:

41 —¿Kĩhga yũu jxthãasu'? jĩte':

—Adxa' uyya' ãjã'çmeeth, txãasath uy wějě' jĩk.

42 Aça' Jesus we'weçxa':

—Kaauyu'juna sũhçxane'ga adxa's pi'kx, txãa pa'ga ãçxha' uyna mneeyũu jĩçpkaçxha',

43 txãa dudtey uyya' ãjãk, sa' Dxusna wala weçxana Jesus e'stey u'kh. Txã'wě uyya' ãjãte nasa uyçxa', txãawe'sxwa txã'wěytxi Dxusa's wala weçxa.

19

Zakeo yakh Jesus puutx we'weni

1 Txajũ' Jesusa' Jeriko çxhabte pa'jçxa', txãa çxhabsu skhẽuuçku yu'.

2 Aça' kxte' teeçx piçthě'j wala ji'phsa Zakeo yaasesak ũsu'. Txãa yu' gobierno jĩ vxyu pkhaksana npiiçthě'jsak yu'.

3 Txãa Zakeo' Jesus kimtewa jiyuya' puutx uy wěeçxawa, nasaa wala ksxavxyte' ãjãme', txãa yu' le'çxkuěek yu' naa pa'ga.

4 Sa' yaçte wuwuuçxa, sikómoro fxtũu tasxtek tejka Jesusa's uyya'.

5 Aça' Jesusa' kxuy uykhẽuuçxa', fxtũu tasxte pagayçxa Zakeo's we'wek:

—Dudçxáa txajũ miisa'j, adxa' iidx yatte ãçxhĩi pa'jwa'j ji'pthu jĩte',

6 Zakeo' dudçxáa sa'jçxa, Jesusa's weçxanak txajx yatte jxpa'ga.

7 Txã'wě yũute' nasa jxukaysa açewe'wetx: Jesusa' txãa piçthě'j pkalsa yattek pa'jya' u'j jĩna.

8 Txajũ' Zakeo' yujuçxa na'jĩnak we'we:

—Adx ji'phuni's puupxâhn txuhdeçxa puupletx peesu'nja, sa' maaítxi's ísxíiçxa jxthaakwe wá'ntka vxyu kusa'j nawa kusa'jnite pahz us jxthaakwe kaasxwedu'ju'nja jíte',

⁹ Jesusa' na'jík:

—Naa piçthē'ja' Abrahan ji'kh yuu naa pa'ga naa yattewe'sx ewte neeyüuwa'j en pa'kh açxha'.

¹⁰ Dxus Nçxi'k Nasa Yuusa' txã'wě vxituna ũssatx pakweçxa ewte nvxiht-ya' íçxáath kíh jík.

Patron vxyu's nuypenakahñ selpisaatx nvxiitni

¹¹ Jesus we'weni's wēsē'jsa yu', naa sūhñatx ũsu': Jesusa' Jerusalente pa'jaça' na' açxha' txãa jxkaahsa yuuna sūhñatx ũsu'.

¹² Naa pa'ga na'wēk kwentu'jna pta'sx:

—Teeçx piçthē'j jxtuhthesa jxu'j kiwen u'kh, kxtee pa'jçxa jxkaahsa yuuçxa ki' sxawedxa'.

¹³ Nawa u'jmey, diez selpisaatx pa'yaçxa, kxazíitx txakweçxaçxáak vxyu ũçxa na'jína neewe'we: Adx sxawedna pa'phkaçx naa vxyu yakh mjíine'kwe nuypehnaya'. Txã'jĩçxak jxkaahsa yuuya' jxu'j kiwen u'j.

¹⁴ Nawa txajx kiwete nasa' jxkaahsa ki'pni's wa'lçxa, na'jínatx pāatxhí'khyá' kaah txajx e'stey: Naa piçthē'j kwe'sxtxi jxkaahni's pee-jxmeetha'w jítewa,

¹⁵ pejka jxkaahsa yuuçxa ki' sxawedku txajx kiweníi. Sa' pa'jçxa' selpisaatx vxyu ũsne' txāatx pa'yak, nasa iisa maz nuypehnatewa jiyuya'.

¹⁶ Aça' nyafxtewe'sx kũhçxa' na'jík: Iidx vxyu ũsgu txāate diezthu jxthaakwe nuypehna jíte',

17 jxkaahsa pasçxa': Wala ew selpiig. Txã'wě walameekuěsa'swa ew jxpe'pha'ga, diez çxhabte jxkaahwa'jsa ne'jwe'sx ki'pu'nja jĭk.

18 Txajũ' vxitewa utxaaçxa na'jĭk: Iidx vxyu ũsgu txãate tahçthu jxthaakwe nuypenhna jĭte',

19 jxkaahsa pasçxa': Idxa' tahç çxhabte jxkaahwa'jsa ne'jwe'sx yuune'ga jĭk.

20 Txajũ' tekhtewe'sxwa utxaaçxa na'jĭk: Iidx vxyu ũsgu txã'sa' panxwelote yapçxa jxaawthu. Txã' ayga ũsa'.

21 Idxa' wala juuna' yu'g, txã'wě mjĩimeeçxawa vxyu pēyi'g sa' iidx uuthasxmeetewa kxtee u'kaçxa jxuka pkhakhe'g. Aça' ũukhçxa iidx vxyu'sa' kmãaji'jmeeth jĭte',

22 jxkaahsa pasçxa': Idxa' seelpimeeg. Iidx yuweteyçxáa ewmeete neeyũuçgu. Adxa' juuna'saçxa' mjĩimeeçxawa vxyu pējxna adx uuthasxmeetewa pkhaksatewa jiiçxa',

23 ¿kĭh yũutega adx vxyu'sa' bankoga jx-aawmée? pehnate adx sxawedna pa'jçxa' jxthaakwe kutxi'khan jĭk.

24 Sa' txãa jxkaahsa' na'jĭnak we'we kxtee ũssatx: Txãa vxyu's kusa'jçxa diez vxyu ji'phsa's meswe jĭte',

25 txãawe'sx pasçxa': Txã' vxyu walayã'j ji'pha', aça' ¿ma'wě txã'síiçxáa ũsukxtha'w? jĭtewa,

26 jxkaahsa pasçxa' na'jĭk: Maawa jxpa'yakx jxpe'jçxa nuypenasa's jxthaakwe ũswa'j yuuna. Nawa jxpe'jya' ajãmeeçxa nuypenasame's jxuka kusa'jwa'j yuuna, le'çxkuẽçxáa ji'phtewa.

27 Sa' adxa's ahçeçxa jxkaahsa yuukahmén

pāatxhī'khsawe'sxtxi' ayte pe'jna kūhçxa adx uyna ūste miikhwe jīk.

Jesus Jerusalente u'kani

(Mt 21.1-11; Mr 11.1-11; Jn 12.12-19)

²⁸ Txāa ejemplo's pta'sxna jxā'jçxa', Jerusalente pa'jya' u'kh.

²⁹ Sa' Betfxagé vxite' Betania çxhab ūsu'tx Oliwos vxiç utxaga kxtee pa'jya'çxāa txāa yakh u'jusa e'zsax kaakh

³⁰ na'jīna:

—Naaga çxhab ūsa' kxtee me'jwe. Sa' kxtee pa'jaççxa', teeçx buçxukuē uyuune'kwe kim yuhwa a'jnimeesa tudni ūsna. Txā'sa' jxūkhwedeçxa jxūna yuweene'kwe.

³¹ Jxūna yuhte', maaí yu' pēyiwáatxna aça': Kwe'sxtxi jxpe'jsak nikxya' kaah jīne'kwe.

³² Aça' txā'jīte' u'jçxa', Jesus ma'wēne' we'we txā'wēy uytxi.

³³ Txajū' buçxu's jxūkhwedeçte', namuwe'sxa' pējxtxi:

—¿Kījxa' buçxu's jxūkhwedeçkwe? jīte',

³⁴ txāawe'sx pasçxa':

—Kwe'sxtxi jxpe'jsak nikxya' kaah jītx.

³⁵ Sa' Jesus tasxte jxūna kūhçxa', txāawe'sx atxhtxi pusçxa Jesusa's ka'ja'jtx.

³⁶ Txajū' Jesus u'jwa'j dxi'jsu yaçtetx txāawe'sx atxhtxi pusna u'jwe'.

³⁷ Sa' Oliwos vxiç e'skhē u'jweçpkaççxa', Jesus yakh yuusa nasa' Dxusa's wala weççxana weyya' takhtxi txā'wē Jesusa' kījkīhwa ew yūuna u'juni's uyçxa.

³⁸ Sa' na'jīnatx weyi':

—İDxus kaahni wala yuh ew jxkaahwa'jsa yuja! İDxus cielutewe'sxa's weçxaaga wala ew yūupa'ga! jĩ'tx.

³⁹ Txajũ' nasaa ksxavxyte yuusa fxarise-owe'sxa' na'jĩtx:

—İidx e'ste kuçx susna yuusatx mwe'we, sxu-una' yuukahn jĩte',

⁴⁰ Jesus paşça':

—Makwe txãawe'sx yu' sxuuna' yuutewa, kweta' Dxusa's tuuthe'jetxna jĩk.

⁴¹ Txajũ' Jerusالente utxa pa'jçxa', çxhaba's thegçxa ũ'nek

⁴² na'jĩna:

—I'kwe'sxa' wēt kfxi'ze'jwa'jsa's jiyuçxa naa ente jxpa'gawaça', wala yuh ewna. Nawa i'kwe'sxa' jiumée ũsi'kwe na' jxpa'gameene'kwe.

⁴³ Naa pa'ga i'kwe'sxtxi' nxuswa'j en pa'jana, aça' txãa ente' çxhaba's jxuka yupna ktadxiçxa

⁴⁴ çxhaba's kĩh yuhwa nvxihtmée jxuka suwu-utxna kxtee ũssatx ikhna. Sa' teeçx kwetçxáa yuhwa kēese'jnimée yu' neeyūumeena, i'kwe'sx ksxavxyte Dxus kĩhtewa, jxpa'gameei'kwe naa pa'ga jĩk.

Dxuus yatte txweysaatx Jesus kasxisxni

(Mt 21.12-17; Mr 11.15-19; Jn 2.13-22)

⁴⁵ Txajũ' Jesusa' dxuus yatte u'kaçxa kxtee txweyna ũssatx jxuka eka kasxisxku

⁴⁶ na'jĩna:

—Dxus librute na'wē fxi'jni': Adx yata' Dxus yakh puutx we'wena ũswa'j yatçxá' jĩna fxi'jni'. Nawa i'kwe'sx yu' peswée pkhaakhena ũsni kafx na'wēçxáa vxitçxa ji'phi'kwe jĩk.

47 Jesusa' een isak dxuus yatte u'kaçxa kaapiya'ja'. Naapkaçxha' sacerdote npiiçthê'jwe'sx vxite' Dxus leya's kaapiya'jsawe'sx vxite' çxhabte ne'jwe'sx txâawe'sx yu': ¿Ma'wê yũuçxa ikhekxtha'w? jĩnatx puutx we'wena ũsu'.

48 Nawa ikhya' yu' ãjã'çmeeta', nasa jxukaysa Jesus ju'guçxaçxáatx ũsu' naa pa'ga.

20

*Dxuus yatte Jesus juuna' yũuni's pẽyni
(Mt 21.23-27; Mr 11.27-33)*

1 Teeçx ente' Jesusa' dxuus yatte Dxus yuwe ewte nvxiitwa'jsa's pta'sxna ũste', sacerdote npiiçthê'j vxite' Dxus leya's kaapiya'jsa vxite' judiu nthê'jsa txâawe'sx pa'jçxa'

2 na'jĩnatx pẽjx:

—Idxa' ¿kim jxkaathega dxuus yatte txã'wê juuna' yũu? Kim jxkaathe txã'wê yũuçxawa mpeeta'sx jĩte',

3 Jesusa' na'wêk pas:

—Adxwa i'kwe'sxtxi' pẽjx ya'wath açã' txã'sa' mpaaswe.

4 Juan Bautista's ¿kinga jxkaah yu'te bautisãykahn? ¿Dxus wá' jxkaah meeçxa' naa kiwete piçthê'j jxkaahni wá' yu'? jĩte',

5 txâawe'sx pwe'sx na'jĩnatx puutx we'we':

—¿Ma'jĩna pasukxtha'w? Dxusne' jxkaah jĩwaçwa, txã'wê Dxus jxkaathe' ¿mjĩya'kwe Juan pta'sxni's jxpa'gamée? jĩna.

6 Açã' naa kiwete nasane'ta jxkaah jĩte', kwe'sxtxi kwet wãatatahçxa ikhetxna,

nasa' jxukaysa Juana's ew jiita' Dxus yuwe pta'sxsatewa. Txãasa kwe'sxtxi' txã'wẽ yũutxna jĩ'tx.

⁷ Txajũ' Jesusa's pasçxa':

—Juana's kimne' jxkaah bautisãykahn nawa jiimeetha'w jĩte',

⁸ Jesus pasçxa':

—Adxwa kim jxkaathe txã'wẽ yũuçxawa pta'sxme'nja jĩk.

Mjĩsawe'sx patron nçxi'ka's ikhni yakh kaaja'da'jni

(Mt 21.33-44; Mr 12.1-11)

⁹ Txajũ' Jesusa' naa ejemplo'sku pta'sx:

—Teeçx piçthẽ'ja' txajx kiwete jxuka uwa uhçxa mjĩsatx ew neewe'weçxa wala txaçx u'kh.

¹⁰ Sa' uwa thẽ'jeçte', kiwe namu' teeçx selpisa's kaakh kiweepa'ga pẽjxya'. Nawa kiwe's mjĩsawe'sxa' txãa selpisa's pãpãçxa kĩh yuhwa dukhmée kahtx.

¹¹ Aça' kiwe namu' vxite selpisa's ki' kaakh. Nawa txã'snawa txã'wẽy iiwẽesxuna pãpãçxa kĩh yuhwa dukhmée neeutx.

¹² Txajũ' kiwe namu' ki' vxite selpisa's kaakh. Nawa kiwe's mjĩsawe'sxa' txã'snawa kpã'vxitçxa dukhmée neeutx.

¹³ Txã'wẽ yũute', nmehte' kiwe namu' na'jĩk: ãçxha' çkĩh yũuki'th? Meeçxa' adx nçxi'k wedxnisa's kaja'nja. Aça' txã'sa' ũukhçxa txã'wẽ yũumeewáatxna jĩçxak kaah.

¹⁴ Aça' mjĩsawe'sxa' kiwe namu' nçxi'ka's uyçxa', txãawe'sx pwe'sx na'jĩnatx puutx we'we:

Ney uute', kiwe's naathē'j iiyamuwa'jsana. Aça' ikhega, khĩçxa kiwe's kwe'sx iiyamu'nja'w jĩçxa
 15 eka kutxi'jçxa ikhtxi jĩk.

Txajũ' Jesusa' txã'wē pta'sxçxa' pějxku:

—Txã'wē yũute', kiwe namu' txãa mjĩisawe'sxtxi' çkĩh yũukx?

16 Txã'wē yũupa'ga kiwe namu' txãa mjĩisawe'sxtxi' jxuka ikhçxa kiwe's vxitetx ũsuna jĩte', txã'wē pta'sxni's wēsē'jçxa na'jĩtx:

—Dxusa' kxtee pa'j yu' wedxmeena jĩ'tx.

17 Txã'wē paste', Jesusa' txãawe'sx dxi'psu thegçxa na'wēk pta'sx:

—Txã'wē yuune'jmeete', çkĩjxa'çxáaki'k Dxus libroute na'wē we'we'?:

Yat txaahsawe'sxa': Naa kweta' selpime' jĩçxa wãatãhtx,

Nawa txãa íik yat makwesanaawa çxhãçxha neewewa'jsa yuuna pa'j.

18 Aça' maawa txãa kwette iikasa' jxuka çxkateteetxna. Meeçxawa txãa kwet nasaa kajkwekhē weteçxa', jxuka ku'çxina jĩna fxi'jni'.

Gobierno's dukhwa'ja'swa pēyni

(Mt 21.45-46; 22.15-22; Mr 12.12-17)

19 Txajũ' sacerdote npiiçthē'j vxite' ley kaapiya'jsawe'sxa' jiyutx txãa ejemplo' txãawe'sxtxi' we'wenitewa. Sa' ũusaçxaçxa txãa dudtey Jesusa's tud wēetx. Nawa Jesus ju'gusa nasa wala kuh ũste', ũukhçxa kĩhwa yũumeeta'.

20 Nawa kīhteçxáawa ewmeete nvxiht-ya' sūhçxa thegsa kaahtx. Aça' txāawe'sxa' Jesusa's ew paapēysa na'wē yuh we'wena utx-aatx, jxkaahsa's ewmée we'wetewa jiyuçxa' ne'jwe'sxa's pāatxhī'khya' sūhçxa.

21 Sa' na'jīnatx paapējx:

—Kwe'sxa' idxa's jiitha'w. Idxa' isasaçxá'sgu pta'sxi', Dxus tasxte pa'jwa'j dxi'ja's kaapiya'jna. Sa' nasaa jxkaahna yu'kxpehnitx nwēese'je'çmeeg, txāa pa'gatey idxa' nasa ewsa na'wē thegsatx jiyumey ju'gu yu'çmeeg.

22 Āçxha' na'wētha'w jiyu wējē': Jxkaahsa Cesara's vxyu dukhte ¿ewmanx? meeçxa' dukhmeete ¿ewmanx? jīte',

23 ewmée yajkçxa txā'wē pējxna ūstewa Jesusa' jiyuçxa na'jīk:

—¿Kījxa'kwe adxa's ewmeete nvxiit wējē'? jīçxa

24 txāawe'sxtxi' teeçx vxyu musx pējxku. Sa':

—Naa vxyu' ¿kiim dxi'pa's ji'phna, sa' kiim yase's fxi'jnina? jīte', txāawe'sx pasçxa':

—Cesar dxi'pa's ji'pha' sa' txajx yase's fxi'jni' jītx.

25 Aça' Jesusa' na'wēk jxkaah:

—Cesar jī'sa' Cesara's dukhwa'ja'. Sa' Dxus jī'sa' Dxusna dukhwa'ja' jīk.

26 Txā'wē nasaa dxi'pte isasaçxáana paste', Jesusa's ewmée vxit-ya' ājāmeeçxa, kuh yajkxna sxuuna'tx neeyūu.

*Uusaawe'sx ki' itxi yuuwa'ja'swa pēyni
(Mt 22.23-33; Mr 12.18-27)*

27 Txajũ' saduceowe'sx maafi yu' Jesus tasxte paapẽjxya' pa'jtx. Nasa' uuyã'jçxa' peena yu' ãtxĩ yuumeetxna sũhsatx yu' txãa saduceowe'sxa', txãasatx na'wẽ pẽjx:

28 —Moisesa' na'jĩnak fxi'jçxa nvxiht: Maa piçthẽ'jwa luuçx ji'phumey nyu's nvxihtçxa uute', uusáa nyakha' txãa u'ya's iiyuuna, açã' txãate luuçxa' uusáa nçxi'k na'wẽ neeyũuna jĩnak fxi'j.

29 Açã' kwe'sxa' jiitha'w siete piçthẽ'j pxakhtxi u'pu', sa' nyakh nthẽ'jsa' iiyuuçxawa luuçx ji'phumey uuk.

30 Açã' nyakh e'stewe'sxku iiyuu txãa u'ya'siıçxáa. Nawa txãawa luuçx ji'phumey uuk.

31 Txajũ' nyakh tekhtewe'sxwa txãa u'ya's iıçxáak iiyuu. Txãawa luuçx ji'phumey uuk. Txã'wẽçxaçxáatx sietesay txãa u'yçxaçxá's iiyuuna jxã'j. Nawa maa yuhwa luuçx ji'phumey uutx.

32 Açã' nmehte' txãa u'ywa uuk.

33 Açã' uusaawe'sx ki' ãtxĩ yuu ente', txãa u'ya' ¿maa yakh isa nyu yuuwa'jsakx? jĩte',

34 Jesus pasçxa':

—Naa kiwete nasa' ptamuuna txãawe'sx luuçxtxiwa kaaptamu'ju'tx.

35 Nawa vxite kiwete pçumée ãtxĩ fxi'zewa'the pa'jya' ãjãsa' ki' ãtxĩ yuuçxa' txãawe'sxa' ptamuwa'jsameeta', sa' txãawe'sx luuçxtxiwa kaaptamu'jna ũswa'jsameeta',

36 txãa pa'gatey txãawe'sxa' Dxus angeleswe'sx na'wẽsa yã'tha', sa' Dxus luuçx yã'tha' na' ãtxĩ yuuyã'jçxa' peena yu' uuwa'jsameeta'.

37 Txã'wẽ uusaawe'sxa' ki' ãtxĩ yuuwa'jsate ãçxáak Moisesiwa jiyukahn na'wẽ fxi'jçxa nvx-ih̄t txajx librute. Kxteea' Dxusa' çhũçh̄ yu'kh behna ũsni pxãjũ we'weçxa': Abrahan, Isaak, Jakob txãawe'sx Dxusthu jĩk.

38 Dxusa' uusaawe'sx Dxusme', naasáa ãtxĩsawe'sx Dxusçxá'. Dxus tasxte' maa yuhwa uumée ãtxĩ ũsta' jĩnak pta'sx.

39 Txajũ' Dxus leya's kaapiya'jsawe'sx we'weçxa':

—Wala ew pta'sxgu jĩçxa,

40 peena yu' kĩhwa jwee yu' pẽjxmeeta'.

Dxus tasxu yuusa' çkiim nçxi'kki? jĩna Jesus pẽyni

(Mt 22.41-46; Mr 12.35-37)

41 Txajũ' Jesusa' na'wẽk pẽjx:

—çMa'wẽteta Kristo' Davxid nçxi'ka' jĩna we'we' nasa'?

42 Naapkaçxha' Salmos librute Davxid we'weçxa yu' na'jĩ'k:

Adxna jxpe'jsa Kristo's Dxusa' na'jĩk:

Adx pukate paçu ju'gte mkaaçx,

43 Idxna açesatx idxçxaçxáana nwẽese'jwa'ja's vxitna jxã'phkaçx jĩk.

44 Davxida' Kristo's we'weçxa': Adxna jxpe'jsa jĩk, açã' Kristo' çma'wẽ yuuçxa Davxid nçxi'k yuukx?

Fxariseo vxite' ley kaapiya'jsawe'sxtxi yuuwesa Jesus nvxiitni

(Mt 23.1-36; Mr 12.38-40; Lk 11.37-54)

45 Nasa jxukaysa wẽsẽ'jna ũssa ksxavxyte Jesusa' txãa yakh u'jusawe'sxtxi na'jĩnak we'we:

46 —Dxus leya's kaapiya'jsawe'sxtxi' mpa'yajkxwe. Txãawe'sxa' ropa jxu'jsa athçxa plaasasu msuuwa weçxa jxthãasnatx pekũjũ'. Sa' judiuwe'sx pkhaakhenisuwa kaçxní wejx zhiçxkwe ewsaçxáanatx pakwé'. Maa yat-su sã'jïya' pi'kxtewa, txã'wëytxi kaçxwa'j ewsaçxáana pakwé'.

47 Sa' vxiudawe'sx yattxiwa kusa'ja'tx, kïjkïh ji'phuni'swa jxuka. Nawa ewsata' sũjkahn wala jxu'j lisa'tx. Txã'wë yũupa'ga txãawe'sxa' wejx jxthaakwe Dxus kastigãyni yuutxna jïnak pta'sx.

21

Vxiuda ofxreda akhni

(Mr 12.41-44)

1 Wala ji'phsawe'sx dxuus yatte ofxreda wala ãsxiçtek uy Jesusa'.

2 Txã'wëy teeçx vxiuda puuplesawa kũhçxa', e'z vxyuu musxkuẽ akheçte uyçxa'

3 na'jïk:

—Isath we'we', naa vxiuda puuple' maatewa jxthaakwek wala akh.

4 Vxite yu' akhçxawa, neeyũusáa peejxmeesaçxáan yã'jtx akhe'. Nawa naa u'ya' kïh yuhwa ji'phmeesaçxawa txajx ũ' weywa'ja's jxukak akh jïk.

Dxuus yat pçuwa'ja's Jesus pta'sxni

(Mt 24.1-2; Mr 13.1-2)

5 Txajũ' kxtee ũssa maaíi yu' dxuus yata's thegçxatx we'wena ũsu': Ofxreda peesni yakh wala yuh zhiçxkwe pheu'jna txaahni' jïte', Jesusa' na'jïk:

⁶ —Āçxhíi yu' txã'wẽ yuh zhiçxkwe thegna ũsa', nawa kîh yuhwa nvxihtmée jxuka suwní yuuwa'j en pa'jana. Aça' teeçx kwetçxáa yuhwa kéesē'jnimée yu' neeyũumeetxna naa yattewe'sx jîk.

*Naa kiwe pçuwa'j en ãjaçte seena'sa vxyaawa'j
(Mt 24.3-28; Mr 13.3-23)*

⁷ Txã'jîte':

—¿Bagaçx txã'wẽ yuukx? meeçxawa txã'wẽ yũuwa'j en ãjãçte' ¿kîhçxa yuukx? jîna pêjxte',

⁸ na'wêk pta'sx:

—I'kwe'sxtxi kaypuba'jwe'sxte mpa'yajkxwe. Txã'wẽme' wala kasejetxna Dxus kaahnisatha'w jîna na'jîna: Adxa' Kristoth, aça' ãçxha' nmeh en ãjk jîtxna. Nawa txãawe'sxtxi' nwéesē'jnuwe.

⁹ I'kwe'sxa' wēsē'jene'kwe gweçxa seena'sa yuja' jîni, nawa txã' nyafxtewe'sxçxáata' aça' ũukhmeene'kwe. Nmeh en yu' ähméy txã'wẽ yuuna.

¹⁰ Txajũ' ma'wẽ yũuwa'ja'swa jxuka pta'sxku na'jîna:

—Txãn en ãjãçte', gobierno' vxite kiwete gobierno yakh puiitxna. Naapkaçxha' puutx jxu'j kiweju pwe'sxwa puiitxna.

¹¹ Sa' msuu msuuwa seena' ehd u'jwena. Wējēwa txã'wẽ wala pa'jana. Naapkaçxha' kakwete wee seena'sawa pa'jana. Sa' cieluju kîjkîhwa seena'saçxáa vxyaatxna.

¹² Nawa txã'wẽ seena' yũuwa'j en pa'jmeyna, i'kwe'sxtxi ahçççxa preesu'jya' pakweetxna. Sa' judiuwe'sx pkhaakhenisuwa jxũna u'jwetxna: Nasa ewmeesa' jîna. Txã'wẽ yũuna karceltewa

txajatxna, i'kwe'sxa' adxna nwēesē'pha'gaçxáa jxkaahsawe'sx tasxsu vxite' ne'jwe'sx tasxsuwa kuutxa'jni yuune'kwe.

¹³ Txã'wē yūute', Dxus yuwe's txãawe'sxtxiwa pta'sxwa'j en ji'phune'kwe.

¹⁴ I'kwe'sxa' txãawe'sxtxi' ¿ma'wē pasukx-tha'w? sūhna kuh yajkxmeene'kwe,

¹⁵ txãa pa'gatey adxa' i'kwe'sxtxi açesawe'sxtxi ma'wē paswa'ja'swa kaaũusuthe'je'nja. Aça' txãawe'sxa': Īsxĩija'g jīya' ājāmeetxna maa yuhwa.

¹⁶ Sa' i'kwe'sx nwe'sxii yuhwa açeni yuune'kwe, tatawe'sx, yakthē'jwe'sx, namikuwe'sx preesu'jutxna. Aça' maai yu' ikhni yuune'kwe.

¹⁷ I'kwe'sxa' adxna nwēesē'pha'ga naa kiwete jxukaysa açeni yuune'kwe.

¹⁸ Nawa i'kwe'sx dxkhasçxáa yuhwa vxi-tumeetxna teeçxçxáa yuhwa.

¹⁹ I'kwe'sxa' uu entepkaçx Dxus yakh tx-utemée fxi'zeçxa', Dxus tasxte itxĩ fxi'zewa'ja's ji'phune'kwe.

²⁰ Jerusalen çxhaba's soldauçxaçxáa jxuka ktadxiiçxa ũste uyçxa', āçxha' naa çxhaba' jxuka pçuwa'jsana sūhna jii ũsune'kwe.

²¹ Naapkaçxha' Judeasuwe'sxa' ũphna u'jwetxna yu'khsu, aça' Jerusalen çxhabtewe'sxwa txãa çxhabu ũphna kasejetxna, vxite' çxhab ekajuyã'j ũssa' çxhabte u'kameetxna.

²² Txã'wēme' txãn ensu' kastigo seena'sa yu-una Dxus librute ma'wēga pta'sxi' txã' jxuka kxtey yuuna.

²³ Aça' txã'n ensu' nasa ji'phsa meeçxawa luuçx ãpãkuẽ ji'phsa' wala yuh pxthaa yuutxna, txã'wẽ txãa nasatx kastigo seena'sa pa'the', naa kiwete wala yuh nxuswa'j yuuna.

²⁴ Maaítxi's gweçxate ikhetxna, sa' vxite yu-utxi's preesu'jçxa jxu'j kiwen jxũna u'jwetxna. Naapkaçxha' Jerusalem çxhaba's vxite nasa u'kaçxa jxuka suwçxa kxtee makwe txaçxwa ũsutxna.

Dxus Nçxi'k Nasa Yuusáa seena' zhiçxkwe vxyaana

(Mt 24.29-35, 42-44; Mr 13.24-37)

²⁵ Txã'wẽ yũunijũ' sek a'te estrelxa txãasu seena'çxáa vxyaatxna. Aça' naa kiwete nasa mtee mteewe'sxwa jxuka jxpubana iiméh wala ũukhutxna txã'wẽ ãkh wala seena' yuuna susni's wēsẽ'jçxa.

²⁶ Txã'wẽ seena' yuuçte', naa kiwete nasa' ũukhçxa ũus yu'swa ivxiitutxna, naapkaçxha' ãe walate kãjkãh ũssawa jxuka seena' kãesẽ'jni yuutxna.

²⁷ Txajũ' Dxus Nçxi'k Nasa Yuusa's uyu-utxna, tãaph pxãhte sek na'wẽ seena' zhiçxkwe khikhyna kãjaçte.

²⁸ Txã'wẽ seena' yuuya' takheçte', i'kwe'sxa' ũukhmée weçxana ũythasna meswe, jwee yu' jxthëeyuumée nwe'weni yuune'kwe jãk.

²⁹ Txãa e'su' vxite ejemplo pta'sxku:

—Mthegwe higwera fxtũu tasx meeçxawa vx-ite fxtũu tasxtxi.

³⁰ Sa' txãa fxtũu tasx yeeçuçte uyçxa', yũnya'watewa jiyu'i'kwe.

³¹ Txã'wěy adx pta'sxni kxtey yuuçte uyçxa', Dxus naa kiwete kiiwa'j en utxaaçna sũhna jii meswe.

³² Isath we'we': naa ensu nasa uumeyna, txã'wě kxtey yuuna.

³³ Cielu naa kiwe jxuka skhẽuutxna, nawa adx we'weni' jxuka kxtey yuumeey yu', skhẽwmeetxna.

³⁴ Wala jxpa'yakx meswe, ewmée yũuna tũuna kījkihwa naa kiwetewe'sxçxá's yajkxna fxi'zenuwe. Txã'wěme' Dxus yu's yajkxmée ũsiyna, Dxus kiiwa'j en ãhçxáa yuuna.

³⁵ Niimalwa jiimeeçxa' ma'wěga yajkxte khẽje', txã'wěyçxáa Dxus kiiwa'j ena' kpaakina naa kiwete nasa mtee mteewe'sxtxiwa jxukaysatx.

³⁶ I'kwe'sxwa wala jxpa'yakx meswe, na'wě seena' yuuya'wa' txajũ iyuya'. Dxus yakh puutx we'wena nes myuuwe bagaçxtewa, sa' txã'wě yũuçxa' Dxus Nçxi'k Nasa Yuusáa tasxte utxaaya' ãjãne'kwe jĩk.

³⁷ Jesusa' en yu' dxuus yattek kaapiya'ja', nawa kus yu' Oliwos vxıçnak u'jwe'.

³⁸ Aça' nasa' een isa kuusıtx dxuus yatte pa'ja' Jesus kaapiya'jni's wěsẽ'jya '.

22

Jesusa's ikhwa'ja's puutx we'weni

(Mt 26.1-5, 14-16; Mr 14.1-2, 10-11; Jn 11.45-53)

¹ Pan lewadura jiphmée ũ'ni Paskua fxiesta ãjãçku yu'.

² Aça' sacerdote npiiçthẽ'jwe'sx vxite' ley kaapiya'jsawe'sxa': Jesusa's çma'wě yũuçxa

ikhekxtha'w? jĩnatx txãawe'sx pwe'sx puutx we'wena ũsu'. Nawa nasa wala kuh Jesus ju'gusa ũste', ũukhu'tx.

³ Naapkaçxha' eçxthê'ja' Judas Iskariote ũuste u'kak. Txãa Judas yu', Jesus yakh u'jusa doce-satewe'sxíçxáak yu'.

⁴ Txajũ' txãa Judasa' puutx we'weya' u'kh sacerdote npiičthê'jwe'sx vxite' dxuus yatte theg-sawe'sxtxi, Jesusa's txãawe'sx kusete dukhya'.

⁵ Aça' txã'wê puutx we'wete', txãawe'sxa' vxyu dukhya' neeyũutx Judasa's.

⁶ Txajũ' Judasa' nasa uynimeete paaçte dukhwa'ja's pakwek.

Jesusa' docesawe'sx yakh nmeh ũ'ni

(Mt 26.17-29; Mr 14.12-25; Jn 13.21-30; 1 Ko 11.23-26)

⁷ Txajũ' pan lewadura ji'phmée ũ'ni fxiesta en ãjk. Txãa ente' piisxáa luuçxtxi ikhe' Pasku-atewe'sx.

⁸ Aça' txãa ente' Jesusa' na'jĩnak jxkaah Pedro Juanwe'sxtxi:

—Me'jwe Paskua fxiestate ũ'wa'ja's pheu'jya' jĩte',

⁹ txãawe'sxa' pějxtxi:

—¿Mteega pheu'j jxthãasu'? jĩte',

¹⁰ Jesus pasçxa':

—Çxhabna u'jçxa kxtee pa'jaççxa', teeçx piçthê'j uyuune'kwe yu' mitxha's yakhçxa u'jweçte. Sa' e'ste u'jwene'kwe yatte u'kapkaçx.

11 Sa' kxtee pa'jçxa', yat namu's na'jïne'kwe: Kwe'sxtxi jxpe'jsa' pějxya'k kaah: Paskua fxiestate txãa yakh u'jusawe'sx yakh ũ'wa'j çmtee piesa pheu'jni ũsna? jĩkaja'k jïne'kwe.

12 Aça' yat namu' ēe yatte piesa walasa pheu'jniyã'jsa's pta'sxina. Kxtee ũ'wa'ja's pheu'june'kwe jĩnak jxkaah.

13 Aça' Pedrowe'sxa' u'jçxa', Jesus ma'jĩni'swa jxuka kxtey uyçxa Paskua fxiestate ũ'wa'ja's pheu'jtx.

14 Txajũ' ũ'wa'j ora āhte', Jesusa' txãa yakh u'jusawe'sx yakh kaçxku mesate ũ'ya'.

15 Sa' na'wēk we'we:

—jMazkuē uswa wala yuh yaaki'th, adxa's uu en pa'jmeyna, naa Paskua fxiestate i'kwe'sx yakh nmeh ũ'wa'ja's!

16 Na'jĩ'th na': āçxha' ayte peena yu' naa Paskua fxiestatewe'sxa's ũ'me'nja, Dxus ki' jxkaajxa' pa'jwa'j en āhpkaçx.

17 Txajũ' waso's uweçxa Dxusna weçxana orãyçxa', na'jĩk:

—Jxpa'gaçxa jxukaysa mtudxwe naa wa-sotewe'sxa's.

18 Na'jĩ'th na': āçxha' ayte peena yu' uwa yu'a's tudxme'nja, ki' Dxus jxkaajxa' pa'jwa'j en āhpkaçx.

19 Txajũ' pana'swa Dxusna weçxana orãyçxa', pe'ltedeçxa txãawe'sxtxi ũsu'sku na'jĩna:

—I'kwe'sx pa'gate adx kakwe' dukhwa'j yu-uya'wa', aça' naa pana' adx kakwe na'wēsa'. I'kwe'sx pa'gate adx pxthaa yuuçxa uuni's ya-jkxna txã'wē myũuwe багаçxtewa.

20 Ũ'na jxã'jçxa', waso's jxpa'gaçxa na'wêk we'we:

—Adx eea's pkawçxa yuuçxáak Dxusa' i'kwe'sxtxi nwe'wewa'ja's u'se pheu'jçxa nvxiht. Aça' naa wasotewe'sxa' adx ee na'wêsa'.

21 Aça' ãçxha' adx yakh ũ'na u'pa' ay mesate txãa piçthê'ja' adxa's açesawe'sx kusete dukhya'wa'.

22 Dxus Nçxi'k Nasa Yuusá' ãçxha' pejka uuya'wayuja'. Adx uuwa'ja's ma'wêne' Dxus nvxiht txã' kxtey yuuya'wa'. Nawa adxa's açesawe'sx kusete dukhsa' įseena' yuh nxuste khêjena! jîte',

23 Jesus yakh u'jusa pwe'sx puutx ya'paapēyi'tx na'jīna: Kwe'sx ksxavxytewe'sx ¿kim txã'wē dukhya'wakx? jī'tx.

Maa wejx jxthaakwe walasa yuuwa'ja's pēyni

24 Txajū' txãawe'sx pwe'sx na'wē yūuwa'ja'stxi puutx ya'paapēyi':

—Ayte kwe'sx ksxavxytewe'sx ¿maa wejx jxthaakwe walasakx? jīte',

25 Jesus pasçxa':

—Naa kiwete jxkaahsawe'sxa' wala juuna'çxáa yuuna jxkaaja'tx. Txã'wētewa txãawe'sx yu-utxi's wala ewsata' jī'tx nasa yu'.

26 Nawa i'kwe'sxa' txã'wē yūuna jxkaahwa'jsameei'kwe, wejxwa i'kwe'sxa' maaii yu' jxthaakwe walasa ũsçxawa, nuuçxsa na'wē yuuwa'j jī'phi'kwe. Aça' maawa jxkaahwa'ja's jī'phsa', selpisáa na'wēçxáa yuuwa'j jī'phi'kwe.

27 ¿Maa wejx jxthaakwe walasakx? ¿Puuçte mesate ũ'ya' kaçxsá wejx jxthaakwe

walasamanx, meeçxa' puuçsa wáa wejx jxthaakwe walasana? Isa ew yajkxte', mesate ũ'ya' kaçxsá jxthaakwe walasana. Nawa adxa' i'kwe'sxtxi selpisáa na'wêçxáa ũsthu.

²⁸ Adxa' багаçxtewa nxuste thēyte fxi'zeçtewa i'kwe'sxwa adx yakh ja'da pxthaa yuuna nesi'kwe yu' nvxihtmée.

²⁹ Txáa pa'ga adxa' i'kwe'sxtxi ũsu'nja jxkaahwa'ja's, adxa'swa ma'wēga adx Tata jxkaahwa'ja's ũs txã'wēy,

³⁰ kxah adx jxkaahna ũsnite pa'jçxa', adx yakh ih mesate ũ'wene'kwe, sa' Israelwe'sx ji'j docesatx jxkaahsa yuune'kwe.

Pedro ĩsxiwa'ja's Jesus pta'sxni

(Mt 26.31-35; Mr 14.27-31; Jn 13.36-38)

³¹ Txajũ' Jesusa' Simona's na'wēk pta'sx:

—Simon, idxa' wala yuh mpa'yajkx. Txã'wēme' eçxthē'ja' i'kwe'sxtxi pějxku skuutxh kweeja'jsa na'wē yuuya'.

³² Nawa adxa' iidx pa'gate Dxusa's neewe'weth, Dxusçxáana yajkxna fxi'zekahn. Aça' idxa' Dxus tasxte ki' sxawedçxa', yakthē'jwe'sxtxi kçxhãaçxha'jane'ga Dxus yakh txutemée fxi'zewa'ja's jíte',

³³ Simon paççxa':

—Adxa' karcelna ma'k yuu meeçxa' uuwa'j ma'k yuu nawa adxa' kīhte yuhwa txuteme'nja jíte',

³⁴ Jesus ki' we'weçxa na'jĩk:

—Pedro, idxa's na'jĩ'th na': açxhíi atalx we'wemeyna, idxa' tekh us ĩsxĩjacyã'j yuune'ga adxa's jiimeeth jĩna.

Jxpa'yakx ūs kaahni

³⁵ Txã'wē pta'sxçxa' Jesusa' na'wēk pējx:

—Adxa' teeçx ente' i'kwe'sxtxi' Dxus yuwe pta'sxya' kaahçxa' kīh yuhwa ji'phmeeth kaah, ya'ja, vxyu, pelgatxi txã'wēsax. Aça' i'kwe'sxtxi' dxi'the çkīhçxá' peejiigá? jīte', txãawe'sx pasçxa':

—Kwe'sxtxi' kīh yuhwa peejime' jītx.

³⁶ Aça' Jesus we'weçxa' na'jīk:

—Ăçxha' ya'ja ma'k yuu, vxyu ma'k yuu, kçxilx ma'k yuu nawa ji'phsa' jxūçxa me'jwe. Aça' kçxilx ji'phmeesa' atxha's txweyçxa kçxilx mweywe.

³⁷ Txã'wēme' Dxus librute we'weçxa': Ewmeesathas yuuwesa yakhku ki'pni yuu jīk naa pa'ga açxha' adxa's jxuka txã'wēy yuuya'wata' jīte',

³⁸ txãawe'sx we'weçxa':

—Ayte e'z kçxilx yu' ūsta' jīte', Jesus pasçxa':

—Txã'wēçxa'. Txãaçxáa ewtxna jīk.

Jesusa' Geçemanite Dxus yakh puutx we'weni
(Mt 26.36-46; Mr 14.32-42)

³⁹ Txajũ' Jesusa' ū'na jxã'jçxa', txajũ kasehçxa', Oliwos vxiçna ki' u'kh. Aça' txãa yakh u'jusawe'sxwa e'stey u'jtx.

⁴⁰ Kxtee pa'jçxa na'jīk:

—Dxus yakh puutx we'wena me'pwe, ewmeete weteya'mée jīçxa',

⁴¹ txãawe'sx tasxu jxu'jmeekuē txuteena u'jçxa peejxūkweçxa na'jīnak Dxus yakh puutx we'we:

⁴² —Tata, idxa's ewuweçxte', seena' nxuste uuwa'ju meen nwe'we. Nawa adx jxthãasni's

kxtey yuumeexawa, iidx jxthãasniçxá's kxtey meen yũu jĩte',

⁴³ Dxus angel cielujũwe'sx kvxiisxa'jna kçxhãaçxha'jya' kĩjk.

⁴⁴ Txã'wẽme' wala yuh pxthaa nxusna Dxus yakh puutx we'wena u'pu'k naa pa'ga pẽ'ç yuhwa ee na'wẽsak wala pkaw.

⁴⁵ Sa' Dxus yakh puutx we'wena jxã'jçxa' kiiteçxa u'kh Pedrowe'sxtxi thegya'. Nawa txãawe'sxa' deenitx yu', wala nxusçxa.

⁴⁶ Aça' kũhçxa na'wẽk we'we:

—¿Kĩjxa'kwe dejé'? Kiiteçxa Dxus yakh puutx we'wena me'pwe, ewmeete weteya'mée jĩk.

Jesusa's preesu'jni

(Mt 26.47-56; Mr 14.43-50; Jn 18.2-11)

⁴⁷ Jesusa' kxtee we'wena nee ũsiyna, nasa wala kũhtx. Aça' Jesus yakh u'jusa Judas yu' txãa nasa yaçte kũhçxa, Jesus tasxte utxaak pukakwette weçxaya'.

⁴⁸ Aça' Jesusa' na'jĩk:

—¿Judas, idxa' Dxus Nçxi'k Nasa Yuusa's weçxani yakh wáa kuuwe'jya'wane'ga? jĩte',

⁴⁹ Jesus yakh u'jusawe'sxa' Jesusa's pẽjxtxi:

—¿Txãa nasatxi's kçxilx yakh puiimtha'w? jĩtx.

⁵⁰ Txajũ' Jesus yakh u'jusa teeçxsa yu' sacerdote npiiçthẽ'ja's selpisáa thũ'wẽ's spẽ'thku paçuwe'sxna.

⁵¹ Aça' Jesusa' we'wek:

—Kxtee pa'j yu' yũunu jĩçxa', txãa thũ'wẽ spẽ'thnite jxa'dxçxa', ki' kaywẽtu'kh.

52 Sa' sacerdote npiiçthê'j vxite' dxuus yatte thegsawe'sx vxite' júdiu nthê'jsawe'sx preesu jxūna u'jya' pa'jsatx we'wek:

—Adxa' ¿pesweethas i'kwe'sxa' kçxilx petx fxtū atçxawá'kwe adxa's preesu jxūna u'jya' yuwé'?

53 Adxa' i'kwe'sx yakh een isath dxuus yatte ūsu', nawa txagaçxhíi yu' tudxa' utxaameeçxa', jxuka çxhi'dxni naa orate yu' pejka preesu'jya' pa'ji'kwe jík.

Jesusa's jiimeeth jīna Pedro we'weni

(Mt 26.57-58, 69-75; Mr 14.53-54, 66-72; Jn 18.12-18, 25-27)

54 Txajū' Jesusa's tudçxa jxūna u'jtx sacerdote npiiçthê'j yatna. Aça' Pedro' Jesus e'ste jxu'j neeyūuçxak u'jna ūsu'.

55 Kxtee pa'jçxa' patxute ipx yuthçxatx bajçxya' kaçx. Aça' Pedrowa txāawe'sx yakh ih bajçxya' kaçxku.

56 Aça' teeçx u'y selpisá' Pedro txā'wē ipx pukate bajçxna u'pte', dxi'pte ew thegçxa na'jík:

—Naa piçthê'jwa Jesus yakh u'jusa' jīte',

57 Pedro' ísxīik:

—Adxa' jiimeeth txāa piçthê'j kxsusu'i'kwe txā'sa' jík.

58 Txajū' txāa e'su' vxitewa uyçxa na'jík:

—Idxwa txāawe'sx yakh u'jusag jīte', Pedro pasçxa':

—Isa, adxa' txāawe'sx yakh u'jusameeth jík.

59 Txāa skhēwni teeçx orate' vxitek na'jīna we'we:

—Īsxīimeete, naa piçthē'ja's uythu Jesus yakh u'jute. Txāa yakh u'jusaçxaí, Galileajuwe'sxa' jīte',

⁶⁰ Pedro paşça':

—Kīhne'ga we'we' na'swa jiyuçmeeth. Txā'jīna we'wena nee ūsiyna, atalx we'wek.

⁶¹ Aça' Jesusa' tuphiçxa Pedro dxi'pte thegte', Pedro' yajkxku Jesus we'weçxa': Āçxh atalx we'wemeyna, tekh us ĩsxīijaçyã'j yuune'ga jīni's.

⁶² Txajū' Pedro' eka kasehçxa seena' wala nxusna ū'nek.

Jesusa's npeevxysxikani

(Mt 26.67-68; Mr 14.65)

⁶³ Txajū' Jesus ūphwe'sxte yupna ūssa yu' weeçx we'wenatx pāpā'.

⁶⁴ Sa' yafxtxi tudçxatx dxi'pte uka'ka' na'jīna:

—Aan jiyune'ga kim uka'kaçtewa.

⁶⁵ Txā'jīnatx wala kuh jwed we'wena wēesxu'.

Judiu nthē'jsawe'sx tasxte Jesusa's kuutxa'jni

(Mt 26.59-66; Mr 14.55-64; Jn 18.19-24)

⁶⁶ Sa' khikhyna sējēçte', judiu nthē'jsa sacerdotewe'sx, Dxus leya's kaapiya'jsa txāawe'sx pkhaakheçxatx Jesusa's kxtee kuutxa'jçxa pējx:

⁶⁷ —Mpeeta'sx, idxa' ¿Kristo dxihgá'? jīte', Jesus paşça':

—Txā'wēiith jītewa, isane' we'we' sūhmeene'kwe.

⁶⁸ Sa' i'kwe'sxtxi adx paapējxwaçwa, pasya'wameei'kwe. Sa' adxa's txh-weteya'wameei'kwe.

⁶⁹ Nawa āçxhūyā'ja' Dxus Nçxi'k Nasa Yuusá' Dxus ĩtxīsa pukate kaçxya' u'jwena jīk.

70 Aça' jxukaysa na'wêtx pêjx:

—Na'jî'g na', idxa' Dxus Nçxi'kthu jîne'ga jîte',
Jesus pasçxa':

—Txã'wêíith. I'kwe'sxa' isa i'kwe we'we' jîk.

71 Aça' txãawe'sx we'weçxa':

—¿Kîjxa' jwee vxite testigo peejiikxtha'w?
Kwe'sx thũ'wêju yuutha'w txajx we'weni's wêsê'j
jî'tx.

23

Jesusa's Pilato kusete dukhni

(Mt 27.1-2, 11-14; Mr 15.1-5; Jn 18.28-38)

1 Txã'wê yũuçxa' Jesusa's Pilato tasxna jxūna
u'jtx.

2 Kxtee pa'jçxa' na'jînatx pãatxhî'kh:

—Naa piçthê'ja' nasatx kaypuba'jna ũstetha'w
uy, sa' Romate gobierno's dukhwa'jme'. Sa'
Dxus txhitxçxa kaahnisa adxthu jxkaahwa'jsa
jî'k jîte',

3 Pilato' pêjxku:

—Idxa' ¿judiuwe'sxtxi jxkaahsa dxihgá'? jîte',
Jesus pasçxa':

—Txã'wê íith, isag we'we' jîk.

4 Aça' Pilato' sacerdote npiiçthê'jwe'sx nasa
jxukaysatx na'wêk we'we:

—Naa piçthê'j yuuwe yuuni's uyuçmeeth
jîtewa,

5 txãawe'sx yu' jweeíçxáatx sus we'wena
na'jî':

—Judeate nasa jxukaysatx jxuka kaypuba'jna
jxã'jaça' txajx we'weni yakh, Galileaju takhçxa

ãçxha' aysuwa jxuka pekũjuça' txã'wẽ yũuna jĩ'tx.

Jesusa's Herodes tasxte kuutxa'jni

⁶ Txã'wẽ we'wete Pilato wẽsẽ'jçxa', nasatx pẽjxku:

—Txãa piçthẽ'ja' Galileajũwe'sxwáana jĩna.

⁷ Aça':

—Txajũwe'sxí'k jĩna pta'sxte', Galileate ne'jwe'sx Herodes tasxnak kaah, txãn ensu' Herodeswa Jerusalenteyku ũsu' naa pa'ga.

⁸ Aça' Herodesa' Jesusa's uyçxa', wala weçxak, txã'wẽ Jesusa' kĩhwa yu'k jĩni's wẽsẽ'jçxa' nyafxíik Jesus yakh puutx uy wẽena ũsu', cieluju kĩhçxáawa kaavxya'ja'the' txáawa uyu'nja sũhçxa.

⁹ Txajũ' Jesusa's kĩjkĩhwa wala pẽjxku, nawa pasme'.

¹⁰ Kxteewa sacerdote npiiçthẽ'jwe'sx vxite' Dxus leya's kaapiya'jsawe'sx kũhçxa wala juuna' we'wena yuwee ũstxi.

¹¹ Aça' Herodesa' txajx soldauwe'sx yakh Jesusa's weeçx we'wena ahççxa jxkaahsa ropa na'wẽ zhiçxkwesa kaathe'jçxatx npeevxysxi-jkana ũsu'. Txã'wẽ yũuçxak Herodesa' Pilato tasxtey Jesusa's ki' kaah.

¹² Pilato yakh Herodes yakha' nyafxíi yu' iipui-satx yu', nawa txãn ente txã'wẽ yũuçxa' yuwe ewuutx.

Jesusa's ikhwa'j vxitni

(Mt 27.15-26; Mr 15.6-15; Jn 18.39-19.16)

13 Txajũ' Pilato' sacerdote npiičthě'jwe'sx vx-ite' judiu nthě'jsawe'sx çxhabte nasa jxukaysatx kaapkhakhe'jçxa,

14 na'jĩnak we'we:

—I'kwe'sxa' naa piçthě'ja' nasatx kaypuba'jna ũsa' jĩçxa adx tasxte nuypa'ji'kwe. Aça' adxa' i'kwe'sx wěsě'jna ũstey jxuka paapějxthu. Nawa kĩhte yuhwa ewmée yũuni's yu' uymeeth.

15 Aça' Herodeswa ewmée yũuni's uymeeçxa', ki'kin kaasxwedu'kh. I'kwe'sxíwa jiyui'kwe naa piçthě'ja' yuuwesa kasehme'. Aça' ¿ma'wě ikhwa'j yuukx?

16 Txãa pa'ga ikhmée kaapeçxukwe'jçxaçxáa kaatxhweete'je'nja jĩte',

17-18 nasa jxukaysa na'jĩnatx sus we'we:

—Naa piçthě'ja's ikhçxa Barabasçxá's mitxh-wete jĩ'tx. (Pilato' anxu iisak txãa fxiestate teeçx preesu txhweeté' nasa weçxaakahn naa pa'gatx txã'jĩ'.)

19 Txãa Barabas yu' çxhabte gobierno's puí kiisçxa nasatx wala kiikhe'pha'ga karceltek tx-aahni ũsu'.

20 Txajũ' Pilato' Jesusa's txhweete wěeçxa nasatx ki' pějxku.

21 Nawa txãawe'sx yu' jweeíiçxáatx sus we'we:

—Kluuste pejka mkaafxuçu'j yuh jĩna.

22 Aça' Pilato' tekh uswa nasatx ki' we'wek na'jĩna:

—Naa piçthě'ja' ¿kĩhga ewmée yũu? Adxa' makwe paapějxçxawa, ewmée yũuni's yu' uymeeth ikhkahn yuuwa. Txã'wě yuuwesa kasejeçme' aça' kaapeçxukwe'jçxaçxáa kaatxh-wete'je'nja jĩtewa,

23 txãawe'sx yu' jweeíçxáatx sus ũusçxa we'wena kluuste fxuçkaah. Sacerdotewe'sx nasa jxukaysa txã'wẽ sus we'weni yakhçxáa pejka knaytxi txãawe'sx pẽyni's.

24 Txajũ' Pilato' txãawe'sx pẽyni's kxtey yuuk,

25 sa' gobierno's puíi kiisçxa nasatx ki-ikhe'jsa yu'sa' karceluh kaakutxi'jçxa Jesus yu'sa' txãawe'sx kusete nvxihtku, kíh yũu wẽeçxawa kxtey yuukahn.

Jesusa's kluuste fxuçni

(Mt 27.32-44; Mr 15.21-32; Jn 19.17-27)

26 Jesusa's kluuste fxuçya' jxũna u'jweççxa', teeçx piçthẽ'j Cirenejũwe'sx Simon yaasesa çxhabe pa'jaçte pu'jykhẽwçxa', kluusa's txã'sna kxaakhe'jçxatx Jesus e'stey pe'jna u'j.

27 Txã'wẽ yũuya' u'jweçte, nasa wala kuh u'jweç yu'tx. Txãa ksxavxyte u'ywe'sxwa txã'wẽtx wala kuhsa nxusçxa sus ũ'nena u'jna ũsu'.

28 Aça' Jesusa' txãawe'sxtxi yu'thegçxa':

—Jerusalente u'ywe'sx, adxa's nxusçxa ũ'ne na'wẽ' wejx yuuwa i'kwe'sx fxi'zewa'ja's ya-jkçxa mnxuswe, i'kwe'sx luuçx pa'gate.

29 Txã'wẽme' naa kiwete nxusu en yuja'. Txãa en pa'the', txãawe'sx luuçx pxthaa yuuçte uyçxa' na'jĩtxna: Bagaçx yuhwa nasa ji'phuçxa kçxu'çxu'jsamée yakha' txakwe nxus yuhmeena jĩtxna.

30 Txajũ' nasa' nxusna ũukhna vxiç wala upeçxa jxuka ikh jxthãasutxna, sa' thã'j le'çxkwesatxwa txã'wẽy yũu jxthãasutxna.

³¹ Fxtũu tasx buçxaçteçxáa yuhwa na'wêtx yũ' na' fxtũu tasx ewsa ukawa'j en âhte yu' wejx txã'wê yũutxna jĩk.

³² Jesus yakh ikhya' e'z piçthê'j wala yuuwesatx jxũna u'jtx.

³³ Sa' teeçx ahte Uusáa dxikthé dxi'thçxáasa jĩnisate pa'jçxa', Jesusa's kluuskhê ki'ptxi, txã'wêy e'z yuuwesatxwa teeçxsa's paçu, vxite's jebu.

³⁴ Txã'wê kluuste fxuçuçte', Jesusa' na'jĩnak we'we:

—Tata, meen peltunaĩ adxa's açesawe'sxtxi. Txãawe'sxa' jiimeeçxatx txã'wê yũ' jĩk.

Txajũ' soldauwe'sxa' swerte kaahtx, Jesus athni ropa's maa soldau knaytewa jiyuya'.

³⁵ Naapkaçxha' nasa kuhsa kxtee thegna ũssa vxite' judiu npiiçthê'jwe'sxwa Jesusa's weeçx we'wena npeevxysijkatx na'jĩna:

—Vxitetxwa nwe'weya' âjã'k na' âçxha' peekíi kluusuwa iyuna, Dxus txhitxhçxa kaahnisa dxihçxa' jĩ'tx.

³⁶ Aça' soldauwe'sxwa weeçx we'wena utx-aaçxa', vxino ewmeesa's yus wëena

³⁷ na'jĩ'tx:

—Idxa' judiuwe'sxtxi jxkaahsa dxihçxa', peekíi kluusu iyuçxa msa'j jĩ'tx.

³⁸ Kluus vxiçte' griego, latin, hebreo yuweju fxi'jni na'jĩ'k: Naaí Judiuwe'sxtxi Jxkaahsa' jĩ'k.

³⁹ Txajũ' yuuwesa kluuskhê a'kxni u'psa teeçxsa' na'jĩk Jesusa's iiwëesxuna:

—Idxa' Kristo dxihçxa', peekíi kluusu iyuçxa kwe'sxtxiwa meen nwe'we jĩte',

⁴⁰ vxite' ka'tu pukakhê u'psa yu' na'jĩnak pas:

—Idxa' yuuwesaçxa txã'wě seena' kastigãyni u'pçxawa, Dxusa's ũukhu'çmeewá'ga txã'wě wěesxu'.

⁴¹ Kwe'sxa' isa yuuwesayuhtha'w, txãa pa'ga kastigãyni u'ptha'w. Nawa naa piçthě'ja' kîhte yuhwa yuuwesa meek yu' jĩçxa',

⁴² Jesusa's na'wěk we'we:

—Iidx jxkaahwa'the pa'jçxa', adxa's yaakine'ga jĩte',

⁴³ Jesus paççxa':

—Isath we'we', Dxus ũsnite açxhíi adx yakh ũsune'ga jĩk.

Jesus uuníi

(Mt 27.45-56; Mr 15.33-41; Jn 19.28-30)

⁴⁴ Txajũ' ēepxāh yuuçpkaçxha', naa kiwete jxuka çxhi'dxku kusuçte las trestepkaçx.

⁴⁵ Seka' kweethme', naapkaçxha' dxuus yatte txudenisa liensu pesath a'kxnisá' puupxājkhěk sute.

⁴⁶ Naapkaçxha' Jesusa' na'jĩnak sus we'we:

—Tata, iidx kusete adx ũusa's nvxiituçthu jĩna'wa uuk.

⁴⁷ Txã'wě yũute', soldau kpiitan uyçxa', na'jĩnak Dxusna weçxa:

—Isa, naa piçthě'ja' yuuwemeesa yuh yu'ga jĩk.

⁴⁸ Aça' nasa jxukay kxtee ũssawa txã'wě yũute uyçxa', ¿txã'wě yuja' yuumanx? sũhnatx nxusna ũukhna u'j.

⁴⁹ Aça' Jesusa's jĩsawe'sx vxite' Galileajũjx Jesus yakh yuusa u'ywe'sxa' jxu'juçxáatx thegna ũsu' txã'wě yũuçte.

*Jesusa's pedaní**(Mt 27.57-61; Mr 15.42-47; Jn 19.38-42)*

⁵⁰ Kxte' teeçx piçthê'j José yaasesa ũsu'k. Txãa yu' Judea kiwete Arimatea çxhabetewe'sx judiu npiiçthê'j walasatewe'sxku yu'.

⁵¹ Txãa Jose' isa багаçx Dxus jxkaajxa' takhekx sũhna ũythassak yu'. Txã'wêçxaíik vxite judiu npiiçthê'jwe'sx Jesusa's ikhya' puutx we'weçte', txãa yu' wa'l.

⁵² Txajũ' txãa Jose' Pilato tasxte u'jçxa Jesus kakwe's pějxku.

⁵³ Sa' kluusuh spajkxçxa liensute yapçxa kwet penxa u'se phaadeni kim yuhwa pedanimeegak khikh.

⁵⁴ Txã'wê sapatu jxkaasewa'j en jxuka ãjãçku yu'.

⁵⁵ Aça' u'ywe'sx Galileajũjx Jesus yakh pi'kxna yuusa' txãawe'sxwa u'jçxa kwet kafx pedani's uytxi Jesus kakwe's mkaa khikheçtewa.

⁵⁶ Sa' yatna sxawedna u'jçxa, Jesus kakwete sxũsxwa'j jxuka pheu'jçxatx sapatu jxkaase ente ki'sna fxi'ze, Dxus jxkaahni's kxtey nwëesê'j na.

24*Jesus ki' itxi yuuni**(Mt 28.1-10; Mr 16.1-8; Jn 20.1-10)*

¹ Jxkaase en skhẽwnijũ kuskuskhẽ wala kusii u'ywe'sxa' Jesus kakwete sxũsxwa'j pheu'jnisa's atçxa pedaní kwet kafxna u'jtx. Vxite u'ywa txãawe'sx yakh ja'da pi'kxna u'jtx.

² Kxtee pa'jçxa', kafxte aphnisa kweta's fxiite ki'pni u'pte uyçxa',

3 kafxte u'katx. Nawa Jesus kakwe yu'sa' uymeeta'.

4 Sa' wala ũukhna ma'wẽ yũuwa'ja's yuuwa jiimeetx ũsu', naapkaçxha' e'z piçthẽ'jtx ropa zhiçxkwe zmeena' çxihmesa athçxa txãawe'sx pukate vxyaa.

5 Aça' wala ũukhçxa kiwekhëtçx kiiçhu, naapkaçxha' txãa piçthẽ'jwe'sxa' na'jïtx:

—Uusaawe'sx ksxavxyu ïtxĩ yuusa's çkijxa'kwe pakwé'?

6 Ayte meeyã'ja'. Uuçxawa ki' ïtxĩ yuuyã'kh. Galileate ũsçxa' na'jïnak we'we txã'sa' miiya-jkxwe:

7 Dxus Nçxi'k Nasa Yuusa's ewmeesawe'sx kusete dukhni yuuna, aça' txãawe'sxa' kluuskhẽ ki'pçxa ikhetxna. Aça' uuçxawa tekh ente' ki' ïtxĩ kiiteena çjïna pta'sxmeená'?

8 Txã'jïte' Jesus we'weni's yajkxtxi.

9 Sa' pedaniiũ sxawedna u'jçxa ma'wẽ uyni'swa jxuka pta'sxtxi oncesatx, sa' Jesus yakh u'jusa vxitesatxwa pta'sxtxi.

10 Txã'wẽ pta'sxsa yu' Maria Magdalena, Juana, Jakobo nji'j Maria, vxite' u'ywe'sx ja'da u'jsa txãawe'sxtxi yu'.

11 Nawa Jesus yakh u'jusawe'sx yuutxi' luuku we'weni na'wẽçxãane' pthũuse' txãa u'ywe'sx pta'sxnisa yu', aça' isane'ta we'we' sũjũ'çmeeta'.

12 Txã'wëtewa Pedro' wuwuuçxak thegya' u'j pedaní kafxte, sa' dxiiga kuyçxa', liensuçxá's puçte ki'pni u'pte uyçxa': çTxã'wẽ yuja' yu-umanx? sũhna wala kuh yajkxna yatna sxawedku.

*Emaus çxhabna u'jsatx Jesus vxyaani
(Mr 16.12-13)*

¹³ Txãa entey Jesus yakh u'jusa e'zsa' Emaus çxhabnatx u'jweç yu'. Txãa çxhaba' Jerusalenuh once kilometro ãh jxu'khak ũsu'.

¹⁴ Txãa e'zsa' jũ'nakhẽ kĭjkĭh yũuni'swa jxuka yajkxnatx puutx we'wena u'jweç yu'.

¹⁵ Txã'wẽ dxi'the we'wena u'jweçpkaçxa', Jesusa' vxyaaçxáa yuuçxa txãawe'sx yakh ja'da u'kh.

¹⁶ Txã'wẽtewa, txãawe'sx yu' uyçxawa, kintewa jiyumeeta'.

¹⁷ Txajũ' Jesusa' pějxku:

—¿Kĭjkwe txakwe puutx we'wena u'jwe'? ¿Kĭh yuupa'ga txã'wẽ nxusna u'jweçkwe? jĭte',

¹⁸ Kleofxas yaasesa teeçxsa' na'jĭnak pas:

—Jũ'nakhẽçxáa Jerusالente txã'wẽ seena' nxus nxus yũunisa's majũwe'sxwa jxukatx jiyu, açã' idxçxáawá'ga jiyumée neeyũu kxtee ũsçxawa jĭte',

¹⁹ Jesusa' pějxku:

—¿Kĭhga yuu? jĭna. Açã' txãawe'sxa' pta'sxtxi jxuka:

—Jesus Nasarethũwe'sxa's seena' nxusnxus vxitçxa ikhni'stha'w ji'phu. Txã' Dxus yuwe pta'sxsa kĭjkĭh yũuya'wa ãjãsak yu', sa' Dxus dxi'pte vxite' nasaa ksxavxytewa txã'wẽk ewçxáa yũuna fxi'zesa yu'.

²⁰ Txã'wẽtewa sacerdote npiiçthẽ'jwe'sx vxite' kwe'sx npiiçthẽ'jwe'sx yu' txã'sa' ikhwa'jçxáa vxitçxa dukhtxi, açã' kluuste fxuççxa ikhtxi.

21 Kwe'sx yu' Israelwe'sxtxi nwe'wewa'jsana sũjũ'tha'w, nawa kxtey yuume'. Txã'wẽ nxus yũuni ãçxha' tekh en yã'j yuuça'.

22 Aça' u'ywe'sx kwe'sx yakh ih pkhaakhena u'jusa maai' yu' pedani' kafxte thegya' u'jçxa

23 ki' sxawedçxa', kwe'sxtxi khãawãsxix txãawe'sx pta'sxçxa': Uusãa kakwe yu's uy meeçxawa, angeleswe'sxçxáatxtha'w uy, aça' Jesusa' itxi' yuuk jĩ'tx jĩnatx kwe'sxtxi pta'sx txãa pa'gatha'w ũukh.

24 Aça' kwe'sx yakh u'jusa piçthẽ'j maai' yu' pedani' kafxna u'jçxa u'ywe'sx ma'wẽne'ta pta'sx txã'wẽyçxáatha'w uy. Nawa Jesus yu'sa' uy meetha'w jĩnatx pta'sx jĩte',

25 Jesusa' na'wẽk we'we:

—Dxus yuwe pta'sxsawe'sx we'weni's nakwe txaçxtewa, jiyuya' ãjã'çmée íçxáai'kwe.

26 Kristo' cielute u'kamey, çseena' nxus pxthaa yuuwa'jsa yu'çmeená'? jĩçxa',

27 Dxus librute ma'wẽ fxi'jni'swa jxuka pta'sxya' takhku, txã's ma'wẽ yũuwa'ja'swa Moises we'wenijũjx takhçxa mtee pa'jne'ta Dxus yuwe pta'sxsawe'sx fxi'jçxa nvxiht kxtee pa'j.

28 Sa' txãawe'sx pa'jwa'j çxhabte pa'the', Jesus yu' u'jnik u'jweç yu'.

29 Aça' txãawe'sxa' na'jĩnatx neevxisxa:

—Kwe'sx yakh ayte me'ka dejxa'. Txã'wẽme' kusuçyã'ja' na' çxhi'dxina jĩte', Jesusa' txãawe'sx yakh u'kak kxtee dejxa'.

30 Sa' txãawe'sx yakh mesate u'pçxa', Dxusna weçxana'wa pana's pe'ltedeçxa txãawe'sxtxi ũsu'sku.

31 Txã'wẽ yũunijũtx kimtewa jiyu. Naap-kaçxha' Jesus yu' naa dudte txãawe'sx yafxju vxyaame'.

32 Aça' txãawe'sx pwe'sx na'jĩnatx puutx pta'sxi':

—Jesusne' yu' aça' isa yuhne' kwe'sx ũuste seena' weçxweçxa ũusuthe' dxi'the yuhçxa Dxus librute fxi'jni's pta'sxiçte' jĩ'tx.

33 Sa' txãa oratey kiitena'wa ki' Jerusalen çxhabna sxawedçxa Jesus yakh u'jusa oncesawe'sxtxi uyna pa'jtx vxite nasa yakh pkhaakheçxa u'pte.

34 Aça' kxtee pkhaakhena u'psa yu' e'zsa Emausu sxawedsatx pta'sxtxi na'jĩna:

—Isa, kwe'sxtxi jxpe'jsa' ki' ãtxĩ yuuyuhga aça' Simonwa uyka jĩte',

35 Emausu sxawedna pa'jsawa pta'sxtxi dxi'the ma'wẽ puutx uyçxa we'weni'swa jxuka, sa' pana's txudedepkaçxha' ma'wẽ yũuçxa Jesusstewa jiyuçxawa jxuka pta'sxtxi.

Jesusa' txãa yakh u'jusawe'sxtxi neewe'weçxa nvxiitni

(Mt 28.16-20; Mr 16.14-18; Jn 20.19-23)

36 Txãawe'sxa' kxtee we'wena u'pĩyna, Jesusa' txãawe'sx pxãhte vxyaaçxáa yuuçxa na'jĩnak weçxa:

—Ũukhmée weçxana meswe jĩte',

37 txãawe'sx yu': anximusa's ne'tka'w uy sũhçxa ũukhuçtxi yu'.

38 Aça' Jesus we'weçxa':

—¿Kĩh yuutekwe ũukhú'? Sa' pta'sxte', ¿kĩh yuuçxakwe isa yuhna sũjũ'çmée?

³⁹ Mthegwe adx kuse petx adx çxida yã'jçxa. Vxitemée, adxthu. Aça' adxa's ew jiyuya' mjxa'dxwe. Adxa' anximusmeeçxa', dxi'th ji'phsath, sa' kakwe'swa ji'phsath. I'kwe'sx yafxte ma'wêtká vxya' txãa yu'sa' jxuka ji'pthu.

⁴⁰ Txã'jĩçxa', kuse petx çxida yã'jçxa ktheegu'kh.

⁴¹ Nawa txãawe'sxa' kuh yajkxna weçxaniiteçxáa Jesusna sũhna yaakxwa'j yu'sa' ji'phumeeta'.

Txajũ' Jesusa' na'jĩk:

—¿I'kwe'sxa' ũ'wa'j kíhçxáawa ji'phmeekwe'? jĩte',

⁴² wedx khakhni pe'la vxite' çxhi'dx mil txã'wêsa'stxi ũs.

⁴³ Aça' jxpa'gaçxa' txãawe'sx dxi'ptey uyna ũste ũ'k.

⁴⁴ Sa' na'jĩnak we'we:

—Adxna na'wê yũuk txã'snath adxa' i'kwe'sx yakh nee u'juy pta'sx. Moises ley fxi'jni vxite' Dxus yuwee pta'sxsawe'sx librute fxi'jni vxite' Salmos librute fxi'jni ũsta', adxa's ma'wê yũuwa'ja'swa txã' jxuka kxtex yuuna jĩnath pta'sx.

⁴⁵ Txajũk Dxus librute fxi'jni's isa ew kaajiyu'j,

⁴⁶ sa' na'jĩk:

—Kristo' uuwa'jsa', nawa tekh ente' ki' ĩtxĩ yuuna uusaawe'sx ksxavxyuh.

⁴⁷ Aça' txã'wê yũuni's Jerusalenu pta'sxya' takhçxa maa maa kiwetewa jxuka pta'sxixna, kxah nasa' pkaltxi nvxihtçxa Dxus tasxte sxawedte', Kristo' txãawe'sxtxi peltunaĩna jĩna fxi'jni ũsa'.

⁴⁸ Aça' i'kwe'sxa' adx ma'wě yũuçxa ki' ãtxĩ yu-uni's uysaai'kwe na' txã'sa' pta'sxwaj ji'phi'kwe.

⁴⁹ Nawa mwěesě'jwe: adx Tata i'kwe'sx jĩi kaajxa' neeyũuk txã'sa' kaja'nja jxpa'gakahn. Nawa txã'sa' jxpa'gamey yu', ay Jerusalentee meswe jxpa'gapkaçx jĩk.

Jesus cielun u'jni
(Mr 16.19-20)

⁵⁰ Txãa e'su' txãa yakh u'jusawe'sxtxi pe'jna u'kh çxhab eka Betaniate pa'j. Sa' kusetx kiisçxa jxukaysatx bedekĩyku.

⁵¹ Txã'wě yũuçpkaçxha', cielun pe'jna u'jnik yuu txãawe'sxçáatx nvxihtçxa.

⁵² Aça' txãawe'sxa' Jesus yuh yu'ga jĩna weçxana Jerusalen çxhabnay wala wětwět ya-jkxna sxawedtxi.

⁵³ Sa' pu'vxitumeetx dxuus yatte Dxusna weçxana nes yu'.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd